

Kuyantika 1**Yobi****Kuyantika 2****Kuyantika 3****Kuyantika 4****Kuyantika 5****Kubasika-Levi****Kutanga-Kulonga****Yozue****Bazuzi-Ruti****1 Samuele, Bankunga****2 Samuele, 1 Bansangu****1 Bantotila****2 Bantotila, 2 Bansangu****Ezekiele, Daniele****Esdrai, Nehemia, Agai,
Zakaria, Estere, Malashi**

Foto: www.freebibleimages.org/Sweetpublishing Matondo!

Mikanda ya:
**Esdrasi, Nehemia, Agai,
 Zakaria, Estere, Malashi—**

Kuvutuka diaka na Yeruzalemi

**(Baleso 28 sambu na
 bana ti bajeune)**

Nsuka ya
Kuwakana ya Ntama

!!!!!!!!!!!!!!!!

Musoniki: *Mama Lorella Rouster. MCE*
Edition 2025



Kuvutuka, Kutunga Diaka :

Mikanda ya Esdrasi, Nehemia, Agai, Zakaria, Estere, Malashi –Baleso 28 sambu na bana

Moniteur, NB : Na mikanda ya 1 & 2 Bantotila ti 1 & 2 Bansangu, beto monaka bamfumu ya Israele, mpila bo kabanaka, ti zuzema ya Nzambi sambu na masumu na bo. Kimfumu ya Israele kwendaka na kimpika na mvula 722 Av.J-C. Yuda landaka na mvula 586 Av.J-C. Yuda salaka bamvula 70 ya kimpika na Babilonia. Na mikanda ya Ezekiele ti Daniele, beto landaka baprofete yai na kati ya Babilonia. Kansi Nzambi me sila nde Yuda ta bikala kuna bilumbu yonso ve. Na nima ya bamvula 70, Nzambi fweti vutula bo na nsi na bo diaka. Na baleso yai, beto me kuma na ntangu ya kuvutuka na bo. Na nima ya kuvutuka, kisalu na bo ya ntete vandaka kutunga diaka Nzo-Nzambi. Na nima, bo fweti tunga bibaka ya bwala Yeruzalem ti bwala yo mosi. Nzambi vandaka kutwadisa bo, kulungisa bansilulu na Yandi ya Yandi silaka ntama na tata na bo, Abrahami.

Baleso ya kele na kati ya mukanda yai :

Page

Leso 1. Bayuda vutukaka naYeruzalemi, ti yantikaka kutunga kisika ya kusamba. Esdrasi 1-3	3
Leso 2. Bambeni nwanisaka Bayuda sambu bo bika kutunga Nzo-Nzambi. Esdrasi 4	7
Leso 3. Profete Agai pesaka bantu kikesa, Yo yina bo landaka diaka kutunga Nzo-Nzambi. Esdrasi 5 :1,2, Ndambu mukanda ya Agai	10
Leso 4. Profete Zakaria bendaka bo kuvutuka na Nzambi na ntima na bo. Kisalu na bo vandaka mfunu. Bandambu ya Zakaria	13
Leso 5. Guvernere fundaka bo na Mfumu ya nene Dariusi, kansi yo simbaka ve. Bo manisaka kisalu yina na kiese. Esdrasi 5 :3-17, 6 :1-16	16
Leso 6. Bayuda sambaka na Nzo-Nzambi ya mpa ti salaka fete ya Paki na kiese yonso. Esdrasi 6 :17-22	19
Leso 7. Mfumu Arta pesaka ordre, ebuna ndambu ya Bayuda ya nkaka vutukaka na Yeruzalemi ti Esdrasi. Esdrasi 7,8	22
Leso 8. Nehemiah monaka mawa ti sambaka Nzambi sambu na rapport nde Yeruzalemi me fwaka. Nehemia 1	25
Leso 9. Nehemia lombaka nzila ti mfumu ndimaka. Yo yina, yandi vutukaka na Yeruzalem ti talaka mpila yo me fwaka. Nehemia 2 :1-16	28
Leso 10. Nehemia bendaka Bayuda kutunga bibaka ya bwala diaka, ata bambeni vandaka kuseka bo. Nehemia 2 :17-20	31
Leso 11. Makanda yonso sadisaka kutunga diaka, konso dikanda kitini na bo. Nehemia 3	34
Leso 12. Ata bambeni yangisaka Bayuda, bo salaka atasio konso ntangu. Nehemia 4	37
Leso 13. Bayuda landaka kutunga tii bo manisaka kisalu, ata bambeni sosaka bampila ya nkaka kukanga yo. Nehemia 6	40
Leso 14. Bayuda tangaka Ndinga ya Nzambi yonso, ti bo waka mbote. Nehemia 8 :1-8	43

Leso 15. Ntangu Bayuda waka Ndinga ya Nzambi, bo bakisaka masumu na bo ti balulaka ntima kulanda nzila ya Nzambi. Nehemia 9-10 :29	46
Leso 16. Bayuda ya nkaka bikalaka na Persia, na kati na bo Estere, yina kumaka Nkento ya Mfumu. Estere 1, 2.....	49
Leso 17. Amani salaka lukanu nde bo kufwa Bayuda yonso na ntoto ya Persia. Estere 3 :1-15, 4 :1-3	52
Leso 18. Estere monaka mpila kusadisa bantu na yandi Bayuda. Estere 4 :4-17.....	55
Leso 19. Estere salaka fete ya ntete, ti Amani mengaka Mordoke kuluta. Estere 5	58
Leso 20. Mfumu pesaka Mordoke luzitu, kansi Amani monaka nsoni. Estere 6	61
Leso 21. Estere salaka fete ya zole ti Mfumu fwaka Amani. Estere 7	64
Leso 22. Mfumu pesaka Bayuda nswa kunwanina bo ya zolaka kufwa bo. Yo yina, bo fwaka ve. Estere 8-10	67
Leso 23. Malashi, profete ya nsuka, songaka Bayuda nde Nzambi kele nene. Yandi lunga nde bo sadila Yandi na kieleka. Malashi 1 :6-14	71
Leso 24. Malashi songaka bo nde bo vanda kwikama na makwela. Malashi 2 :13-16	75
Leso 25. Malashi songaka bo nde Nzambi ke sakumuna bayina ke zitisa Yandi na makabu. Malashi 3 :6-12	79
Leso 26. Bantu ya kwikama ankuragana bo na bo na mambu ya kimpeve. Malashi 3 :16-18	82
27. REVISIO ya Kuwakana ya Ntama I	85
28. REVISIO ya Kuwakana ya Ntama II	87
Bangindu Kulonga Mikanda ya Bible :	89
Balinya ya Ntangu (kusadila na revisio)	91--103
Bankunga beto sadila na mukanda yai	104-107

Matondo mingi sambu na bafoto na www.freebibleimages.org/Sweet Publishing, /John Heseltine & Pam Masco, /Child Evangelism Fellowship of Europe, /John Heseltine and Pam Masco.

Baverse yonso ya Bible kele Version Mwindi, Bible simplifie sambu na bana.

Leso 1. Bayuda vutukaka na Yeruzalemi ti yantikaka kutunga sika ya bisambu.

Leso ke monika na Esdrasi kapu 1-3.

I. PREPARASIO SAMBU NA MONITEUR-

☉ Kikuma ya Leso :

Bana ta tula ntima na Nzambi, sambu Yandi kele kwikama. Bo mpi ta ndima kusala yina ya Nzambi me pesa bo kusala.

♥ Verse ya Kulonguka :

Mambu ya kinsweki kele na Mfumu Nzambi, kansi mambu ya Yandi me songa beto, yina kele na beto ti na bana na beto tii kuna... Kulonga 29 :29

🗨 Bankunga ya kwenda nzila mosi ti leso :

Nani Kele Ngolo ? (vs. Nani Ke Kwikama?)
Nani ta Lemfuka? (Mono ta lemfuka)

II. REVISIO

- † Beto me mona nde Nzambi pesaka nzila nde bambeni kufwa bwala Yeruzalemi sambu Bayuda buyaka Yandi ye kangamaka na biteki. Ata Nzo-Nzambi ya kitoko, basoda ya Babilonia bebisaka yo. Bayuda kumaka bampika na nsi ya Babilonia. Ezekiele ti Daniele vandaka na kati ya bantu yina kwendaka kuna.
- † Nzambi me songa na ntwala na minoko ya baprofete na Yandi Yeremia ti Yezaya nde bo ta vanda kuna na Babilone bamvula 70, ebuna yo salamaka. Ntangu Daniele vandaka kuna, Kimfumu ya Persia kwisaka kubedisa Babilonia. Kimfumu ya Babilonia kumaka Kimfumu ya Persia.
- † Yezaya tubaka nde Mfumu Siriusi ta pesa bo nzila kuvutuka. Ntangu yina, Siriusi me butuka ntete ve. Kansi yo salamaka kaka, sambu Nzambi tubaka yo.

III. KULONGA LESO YAI

➔ Kuyantika :

Keti muntu me lomba nge kusila yandi kusala mambu, kansi nge monaka mpasi, sambu kieleka, nge zabaka ve kana nge lenda lungisa mambu yina ?

Kusala yonso ya beto me sila, yo kele mpasi sambu na beto bantu. Beto zaba ve kana beto ta vanda na ngolo kusala mpila beto me sila.

Kansi na Nzambi, kusila kele ve mpasi. Yandi kele na ngolo yonso ti zaba yonso ya ta salama na bilumbu ke kwisa. Yandi kele masonga. Kana Nzambi sila mambu, yo fweti salama.

🏠 Malongi ya nene ya leso yai (developpement) na banti ya malongi 3 :

1.1 Mfumu Siriasa ya Persia ndimaka nde Bayuda vutuka na Yeruzalemi, ebuna ndambu na bo kwendaka, bonso Nzambi me sila.

📖 Tangila bana : Esdrasi 1 :1-4

*1-2 Mfumu Nzambi salaka na mpila nde Siriusi, mfumu ya Kimfumu ya Persia, sonika :
« Mfumu Nzambi ya zulu me songa mono kutungila Yandi nzo na bwala Yeruzalemi.*

3-4 Beno yonso bantu na Yandi, vutuka na Yeruzalemi. Tunga diaka nzo ya Mfumu Nzambi. Bampangi ya bantu ke vutuka, bo sadisa beno...

2 :64 Ntalu ya bantu yonso yina katukaka na kimpika vandaka kuluta 42,000...

1 :7 Mfumu Siriusi vutudilaka bo babolo ti makopa ya ntotila Nabukodonozore bakaka na Nzo-Nzambi na Yeruzalemi...

? Yula bana

🏠 Bana sala bageste to mwa-senete

🗨 Bana yimba ti kina

1.2 Bu Bayuda kumaka, ntete bo tungaka mesa-kimenga sambu na kupesa Nzambi makabu.

📖 Tangila bana : Esdrasi 3 : 1-2

1 Ntangu ngonda ya nsambwadi zolaka kulunga, bantu ya Israele me tunga babwala na bo imene. Ntangu yai, bo yonso kwisaka kukutana na Yeruzalemi,

2-2 ebuna Yozue, ti banganga-Nzambi ya nkaka, ti Zorobabele, ti bampangi na yandi, bo tungaka diaka mesa-kimenga ya Nzambi, mpidina bo lenda yoka diaka makabu mutindu Nzambi songaka Moize. Ebuna bo yantikaka diaka kuyoka konso kilumbu makabu ya suka ti

ya nkokila.

? Yula bana

🏠 Bana sala bageste to mwa-senete

👤 Bana yimba ti kina

1.3 Na nima, bo tungaka diaka fondasio ya Nzo-Nzambi.

📖 Tangila bana : Esdrasi 3 :7-13
7-8 Bantu pesaka mbongo sambu na kufuta bamaso ti basharpantie... Bo yantikaka kisalu kutunga diaka Nzo-Nzambi. Bantu yonso yantikaka kusala kisika mosi...

10 Ntangu bo yantikaka kutula fondasio ya Nzo-Nzambi, banganga-Nzambi vandaka pana, bampungi na bo na maboko. Bantu ya dikanda ya Levi vandaka ti basembale na bo. Bo vandaka kukumisa Mfumu Nzambi...

11-13 Bo vandaka kuyimbila Mfumu Nzambi bankunga ya lukumu na ngolo yonso, sambu bo me yantika kutula fondasio ya Nzo-Nzambi. Milolo vandaka mingi mpenza...

? Yula bana

🏠 Bana sala bageste to mwa-senete

👤 Bana yimba ti kina

>|< Kumanisa Malongi :

Nzambi tulaka na munoko ya Yeremia ti Yezaya nde Bayuda ta sala bamvula 70 na kimpika, ti na nima, bo ta vutuka sambu ntotila zina ya Siriusi ta pesa bo nzila. Ntangu yina, bo me kwenda na kimpika ntete ve. Siriusi me butuka ntete ve. Kansi Nzambi yina ke twadisa mambu yonso, Yandi tubaka nde yo ta salama. Yo yina, bu ntangu lungaka, yonso salamaka kaka mpila Yandi tubaka.

Nzambi kele kwikama. Yonso ya Yandi tuba, Yandi mpi ta sala. Beto lenda tula Yandi ntima.

Bo mpi vandaka na parti ya kusala. Nzambi kangulaka bo nzila, kansi bo mosi vutukaka. Bo mosi tungaka mesa ya kimenga. Bo mosi tulaka fondasio sambu na Nzo-Nzambi. Nzambi kele na parti na Yandi ti beto kele na parti na beto.

👋 Devoir sambu na bakristo :

Keti nge mona mpasi kutula Nzambi ntima na mambu mosi ? Songa Yandi mambu yina. Tula Yandi ntima. Ebuna, sala yina ya nge lenda sala, parti na nge.

👤 Bana yimba :

« Nani Ke Kwikama ? »

♥ Verse ya Kulonguka :

Bana tuba verse mbala 2 fraze na fraze na nima ya nge, moniteur. Na nima, mbala 2 diaka, bo tuba parti ya ntete na ndinga mosi ya pima, bonso kinsweki, ti parti ya nsuka na ndinga mosi ya ngolo. Na mbala 2 ya nsuka, bana-bankento tuba parti ya ntete na ndinga ya zulu ti bana-babakala tuba part ya zole na ndinga ya nsi.

👤 Bana yimba :

Nani kele Ngolo (Nani ke Kwikama?)

✝ Invitation sambu na bo ya me yamba Yesu ntete ve :

Mambu mosi Nzambi me sila kele yai : Yandi me sila kuyamba ti kugulusa konso nani ta balula ntima ti tula ntima na Mwana na Yandi Yesu Kristo. Yoane 6 :37b “Konso muntu yina ta kwisa na Mono, Mono ta buya Yandi ve.”

Yesu Kristo fwaka sambu na beto, bantu ya mbi. Kana nge me yilama kubika nzila ya mbi ti kukota nzila ya Yesu bubuyai, kaka binga Yandi. Songa Yandi ntima na nge. Songa Yandi nde nge ke tula Yandi ntima. Yandi fweti sala yina ya Yandi me sila. Na kiese, Yandi ta yamba nge na kimfumu na Yandi. Yandi ta pesa nge ntima ya mpa ti ngolo ya kimpeve kulanda Yandi.

Konso ntangu, kana muntu ke na kestio, kana muntu zola muntu ya nkaka kusamba ti yandi sambu na kuyamba Yesu, beto bamoniteur kele awa na nima ya ecodim sambu na kusadisa.

NSUKA YA LESO 1

📖 Kana nge me manisa leso ti ntangu ke lunga, konso mposho nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.



Leso 1. Ntangu Bayuda vutukaka na Yeruzalemi, bo tungaka ntete mesa- kimenga sambu na kupesa makabu na Nzambi. Na nima, bo tungaka diaka fondasio ya Nzo-Nzambi.

**Mambu ya kinsweki kele
na Mfumu Nzambi,
kansi mambu ya Yandi me
songa beto,
yina kele na beto ti na bana
na beto tii kuna...**

Kulonga 29 :29



Leso 2. Bambeni nwanisaka Bayuda sambu bo bika kutunga Nzo-Nzambi.

Leso ke monika na Esdrasi 4.

I. PREPARASIO SAMBU NA MONITEUR-

🕒 Kikuma ya Leso :

Bana ta kuwa ve bantu ya nkaka yina benda bo kubika kisalu ya Nzambi.

♥ Verse ya Kulunguka :

Ebuna bantu yina vandaka kuzinga dezia na ntoto, bo sosaka mpila kupesa bumolo ti boma na bantu ya Yuda sambu bo kutunga Nzo-Nzambi ve.
Esdrasi 4 :4

🔊 Bankunga ya kwenda nzila mosi ti leso :

Kuwa Bansongidila
Mo' Ta Nwana Sambu na Yesu

II. REVISIO

📖 Kuyindula diaka baleso me luta :

Bayuda ya nkaka me vutuka na Yeruzalemi, ebuna bo me yantika nki kisalu ya mbote ?
(Kutunga diaka nzo ya Nzambi)

Bo me manisa nki bitini zole na yo ? (Mesa-kimenga ti fondasio ya nzo)

III. KULONGA LESO YAI

➡ Kuyantika :

Na nima ya fondasio, bantu ke tungaka nki parti ya nzo ? (Bibaka ti ludi) Bayuda me manisa fondasio ya Nzo-Nzambi. Bo me yilama kutunga bibaka ti ludi na yo. Kansi bantu ya vandaka kuzinga penepene, bo zolaka ve. Bo bakaka Bayuda na kimbeni. Bo yantikaka kunwanisa bo, sambu bo sala kisalu ya Nzo-Nzambi nswalu ve.

🏠 Malongi ya nene ya leso yai (developpement) na banti ya malongi 4 :

2.1 Bambeni tubaka ntete bonso bo vandaka banduku ya zolaka kusadisa bo, kansi kieleka bo sosaka kutula kisalu na nima.

📖 Tangila bana : Esdrasi 4 :1-3

1 Bambeni ya bantu ya Yuda waka nde bantu yina katukaka na kimpika, bo vandaka kutunga diaka nzo ya Mfumu Nzambi...

2 Bo kwisaka na ntwadisi ya Bayuda, Zorobabele, ti na bambuta na bo. Bo tubaka nde, « Mbote beto mpi sadisa kutunga Nzo-Nzambi. Beto ke samba Nzambi mosi ya beno ke samba... »

3 Kansi Zorobabele ti bambuta ya nkaka ya Israele tubilaka bo nde : « Mfunu kele ve beno kwisa kusadisa beto kutunga Mfumu Nzambi nzo. Beto ta tunga yo beto mosi... »

? Yula bana

🏠 Bana sala bageste to mwa-senete

🔊 Bana yimba ti kina

2.2 Bu lukanu yina ya bambeni simbaka ve, bo yantikaka kunwanisa bo pwelele.

📖 Tangila bana : Esdrasi 4 :4-5 (verse ya kulunguka na kati)

4 Ebuna bantu yina vandaka kuzinga dezia na ntoto sosaka mpila kupesa bumolo ti boma na bantu ya Yuda sambu bo tunga Nzo-Nzambi ve.

5 Bo futaka mpi avoka na bantu ya leta sambu na kubebisa ngindu ya bantu ya Israele. Bo bikisaka mambu yai ve. Bo landaka yo...

? Yula bana

🏠 Bana sala bageste to mwa-senete

🔊 Bana yimba ti kina

2.3 Bambeni fundaka bo na bamfumu ya nene.

📖 Tangila bana : Esdrasi 4 :6-16

6 8 Bambeni ya bantu ya Israele sonikaka mukanda ya kufunda bantu ya Yuda. Bo sonikilaka mfumu ya mpa ya Persia nde :

11-12 « Mfumu, beto bantu na nge zola kuzabisa nge nde Bayuda ke tunga diaka bwala yina ya mbi ti ya mubulu. Bubika fioti, bo ta manisa yo.

13-16 Mfumu, zaba nde bantu ta futa diaka ata mpaku ve. Bwala yai vandaka bwala mosi ya mubulu. Bantu ya bwala yai vandaka mpasi na kuyala bo. Kisina yo yina bo fwaka bwala. Kana bo tunga diaka bwala yai, kimfumu na nge ta kuka diaka ve kuyala provense yai... »

? **Yula bana**

 **Bana sala bageste to mwa-senete**

 **Bana yimba ti kina**

2.4 Mawa ! Na nzila ya leta, bambeni kangaka bo nzila kusala ndambu ntangu.

 **Tangila bana : Esdrasi 4 :17-23**

17-22 Mvutu ya mfumu pesaka, yo yai :
 “Mbote na beno. Mukanda ya beno, bo me tangila mono yo. Mono songaka bantu na kusosa mambu yina na mikanda, ebuna bo me mona nde katuka ntama, bwala Yeruzalemi ke sala kaka mubulu na bamfumu. Yo yina, mono ke songa nde beno zabisa bantu yina, bo bika kutunga bwala yina, tii kuna mono ta pesa bo nzila...”

? **Yula bana**

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Bambeni nwanisaka Bayuda sambu bo bika kutunga Nzo-Nzambi. Bo nungaka ntangu bo fundaka Bayuda na mfumu ya mpa. Yandi pesaka bo ordre kubika kisalu.

Beto fweti bakisa nde bambeni ta konda ve kunwanisa beto mpi na yonso beto zola sala sambu

na Nzambi. Beto bika kisalu ve, ata bo nwanisa beto ngolo.

 **Devoir sambu na bakristo :**

Keti banduku to fami to bantu ya nkaka me seka nge sambu nge zola landa Yesu ? Kubika nzila ya Yesu ve. Lomba Yandi kupesa nge ngolo ya mpa sambu na kusadila Yandi.

♥ **Verse ya Kulonguka :**

Bana tuba verse mbala 2 fraze na fraze na nima na nge. Mbala 2 diaka bo tuba yo ti bageste. Mbala 2 ya nsuka, mwana mosi tuba ndinga ya ntete, ti bana ya nkaka landa yandi na ndonga, ndinga mosi-mosi.

 **Bankunga ya kwenda nzila mosi ti leso :**

Kuwa Bansongidila
 Mo' Ta Nwana Sambu na Yesu

✚ **Invitation sambu na bo ya me yamba Yesu ntete ve :**

Kana bantu ke nwanisa nge ve, kana bo ke seka nge ve, mbala ya nkaka yo kele sambu nge kele na nzila ya Yesu ya kieleka ve. Keti nge zaba nde Yandi me changer luzingu ti ntima na nge ? Keti nge zaba nde nge me butuka diaka, ya kimpeve ?

Kana nge zola solula mambu yai, to kana nge zola beto kusamba ti nge, bambuka nde beto kele awa na nima ya ecodim konso mposo sambu na kusolula ti nge.

NSUKA YA LESO 2

 Kana nge me manisa leso ti ntangu ke lunga, konso mposo nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.



Leso 2

Bambeni
sosaka
bampila
kukanga
kisalu ya
kutunga
Nzo-
Nzambi.

Bo
nungaka
ntangu
fioti na
nzila ya
leta.

***Ebuna bantu yina vandaka
kuzinga dezia na ntoto,
bo sosaka mpila kupesa bumolo
ti boma na bantu ya Yuda
sambu bo kutunga Nzo-Nzambi
ve.***

Esdrasi 4 :4

Leso 3. Profete Agai pesaka bantu kikesa. Yo yina, bo landaka diaka kutunga Nzo-Nzambi.

Leso ke monika na Esdrasi 5 :1,2, ti ndambu mukanda ya Agai.

I. PREPARASIO SAMBU NA MONITEUR-

🕒 **Kikuma ya Leso :** Bana ta tula Nzambi ntete na mambu yonso, ebuna bo ta tula ntima nde Nzambi ta sadisa bo na yonso bo ke na yo mfunu.

♥ **Verse ya Kulonguka :**

Kansi beno landa kaka kusosa Kimfumu ya Nzambi ti mambu ya Yandi ke zolaka, ebuna Yandi ta yika beno bima yonso ya beno ke na yo mfunu.

Matayo 6 :33

👤 **Nkunga ya kwenda nzila mosi ti leso :**
Sosa ntete

II. REVISIO

📌 **Kuyindula diaka baleso me luta :**

Bayuda yina vutukaka na Yeruzalemi, bo yantikaka mbote kutunga Nzo-Nzambi. Nki salamaka ya pesaka bo ngindu kubika kisalu yina ? (Mpila bambeni nwanisaka bo ti fundaka bo na bamfumu sambu leta kanga bo nzila.)

III. KULONGA LESO YAI

➡ **Kuyantika :**

Ntangu Bayuda yindulaka mpila bambeni vandaka kunwanisa bo, bo yantikaka kuyindula nde mbala ya nkaka, ntangu me lunga ntete ve kutunga diaka nzo-Nzambi. Bo kwendaka kutunga banzo na bo mosi, ti kutunga yo kitoko mingi. Nki mutindu Nzambi monaka mambu yina ?

🏠 **Malongi ya nene ya leso yai (developpement) na banti ya malongi 4 :**

3.1 Bayuda monaka dekuragema na mpila bambeni nwanisaka bo. Bo bikisaka kisalu ya Nzo-Nzambi. Kansi Nzambi pesaka bo baprofete zole—Agai ti Zakaria—sambu na kubenda bo kulanda kisalu yina diaka.

📖 **Tangila bana :** Esdrasi 5 :1-2

1 Kansi baprofete zole yai, Agai ti Zakaria, bo yantikaka kutuba na zina ya Nzambi...

2 Ntangu ntwadisi na bo Zorobabele waka malongi na baprofete, bantu yantikaka kutunga diaka Nzo-Nzambi, ebuna baprofete yai zole sadisaka bo.

? **Yula bana**

🏠 **Bana sala bageste to mwa-senete**

👤 **Bana yimba ti kina**

3.2 Agai songaka bo nde bo vandaka kutula Nzambi na nima, kutula kiese na bo na ntuala. Agai 1 :2-4

📖 **Tangila bana baverse yai :**

Agai 1 :2-3 Mfumu Nzambi tubaka na munoko ya profete Agai nde : “Bantu yai ke tuba nde ntangu ya kutunga diaka Nzo-Nzambi me lunga ntete ve.

4 Sambu na nki beno bantu na Mono, beno ke lala kaka na banzo ya kitoko, kansi nzo na Mono keke kaka ya kufwa ?”

? **Yula bana**

🏠 **Bana sala bageste to mwa-senete**

👤 **Bana yimba ti kina**

3.3 Agai songaka bo nde Nzambi me tula bo na nima, sambu bo me tula Yandi na nima.

📖 **Tangila bana :** Agai 1 :5-7

5 Beno yindula fioti mambu yai me bwila beno.

6 Beno kunaka bima mingi na bilanga, kansi beno me katula kaka ndambu.

Beno ke na madia, kansi yo ke lunga beno ve....

Beno ke na bilele ya kulwata, kansi yo me kuka ve na kukatula beno madidi.

Muntu yina ke sala, yandi ke baka ve mbongo ya kufwana sambu na kuzinga mbote.

7 Mono ke yula beno diaka nde, keti beno me zaba ve sambu na nki mambu yai me bwila beno?

? **Yula bana**

 **Bana sala bageste to mwa-senete**

 **Bana yimba ti kina**

3.4 Bantu ya Yuda waka malongi ya Agai. Bo yantikaka kutunga diaka Nzo-Nzambi.

 **Tangila bana : Agai 1 :12-14**

12 Bantwadisi ya bantu ya Yuda landaka mambu ya Mfumu Nzambi na bo songaka bo kusala. Bo lemfukaka na profete Agai mutindu Mfumu Nzambi tindaka yandi.

13 Ntangu yai, Agai songaka bo mambu ya Mfumu Nzambi tubaka, nde : « Mono ta vanda na beno. Kele Mono Mfumu Nzambi me tuba. »

14 Mfumu Nzambi pesaka ngindu ya mbote na bantwadisi nde bo sala kisalu ya Nzo-Nzambi. Ebuna bo yantikaka kutunga diaka nzo ya Mfumu Nzambi...

? Yula bana

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Bantu ya Yuda monaka nde ntangu me lunga ntete ve kutunga Nzo-Nzambi sambu na mpila bambeni nwanisaka bo. Bo yantikaka kuyindula banzo na bo mosi. Kansi Nzambi zolaka nde bo tula Yandi ntete. Yo yina, Yandi sakumunaka ve bisalu na bo. Yandi tindaka profete Agai kuvutula bo na nzila. Bo waka yandi. Bo yantikaka kutunga Nzo-Nzambi diaka.

 **Devoir sambu na bakristo :**

Bana bakristo, nki beno ke tula mambu ya ntete na luzingu ya beno ? Kana beno ta tula Nzambi ntete, Yandi me sila kusakumuna bisalu na nge ti kuyika beno yonso ya nge ta vanda na yo mfunu.

 **Verse ya Kulonguka :**

Bana tuba verse mbala 2 fraze na fraze na nima ya nge, moniteur. Na nima, bo yimba yo ti kina na yo mbala 4.

 **Nkunga ya kwenda nzila mosi ti leso :**

Sosa ntete

 **Invitation sambu na bo ya me yamba Yesu ntete ve :**

Kieleka, bantu mingi ke yindula Nzambi mingi ve na luzingu na bo. Kana yai kele nge, yindula mbote. Ketu nge zaba Yandi ? Ketu Yandi me changer ntima na nge ?

Ntangu nge balula ntima ya kieleka, Yandi ta pesa nge ntima ya ke zola kusosa Yandi mpi kusala mambu ya ke pesa Yandi kiese.

NSUKA YA LESO 3

 Kana nge me manisa leso ti ntangu ke lunga, konso mposho nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.

Profete Agai
songaka bo nde bo
tula Nzambi ntete,
bo vutuka na kisalu
ya kutunga Nzo-
Nzambi.



Leso 3

**Kansi beno
landa kaka
kusosa
Kimfumu
ya Nzambi
ti mambu
yina ya
Yandi ke
zolaka,
ebuna
Yandi ta**

**yika beno bima yina yonso ya
beno ke na yo mfunu.**

Matayo 6 :33

Leso 4. Profete Zakaria bendaka bo kuvutuka na Nzambi na ntima na bo. Kisalu na bo vandaka mfunu.

Leso yai me katuka na Bandambu ya mukanda ya Zakaria.

I. PREPARASIO SAMBU NA MONITEUR-

🕒 Kikuma ya Leso :

Bana ta kangama na Nzambi kaka na munoko ve, kansi na ntima na bo yonso.

♥ Verse ya Kulunguka :

...Ntangu yai, Mono Nzambi ke songa beno nde beno kwisa kuvutuka na Mono, ebuna Mono mpi ta vutuka na beno. Zakaria 1 :3

👤 Bankunga ya kwenda nzila mosi ti leso :

Sosa Ntete

Vutuka, Afrika, Vutuka !

II. REVISIO

† Kuyindula diaka baleso me luta :

Baprofete zole yina bendaka bantu kulanda kutunga Nzo-Nzambi nani ?
(Agai ti Zakaria) Bo yonso zole sonikaka malongi na bo, ti yo ke monika na Bible na beto. Beto me mona ndambu ya malongi ya Agai. Bubuyai beto ta yindula malongi ya profete Zakaria.

III. KULONGA LESO YAI

➔ Kuyantika :

Kana tata songa nge kusala kisalu mosi, ti nge sala yo, keti tata ta vanda na kiese ? Hmm. Kana nge sala yo na luse mosi ya makasi, kana nitu yonso, ata mpila nge ke tambula, ke songa nde nge ke na kiese ve kusala yo, keti yai ta pesa yandi kiese, ata nge sala yo ?

Bibuti na beto zola nde beto lemfuka na kiese. Nzambi mpi zola beto kulemfuka na kiese. Zakaria songaka bantu nde Nzambi me pesa bo kisalu kutunga diaka nzo-Nzambi. Mbote bo lemfuka na kiese—na ntima na bo yonso.

🏠 Malongi ya nene ya leso yai (developpement) na banti ya malongi 4:

4.1 Zakaria songaka Bayuda nde yo vandaka Satana yandi mosi ya vandaka kunwanisa bo sambu bo tunga ve Nzo-Nzambi.

📖 Tangila bana : Zakaria 3 :1-2

3 :1 Mfumu Nzambi songaka mono Yozue, mfumu ya banganga-Nzambi, kutelama na ntwala ya wanzio ya Nzambi. Ebuna Satana mpi me telama na diboko ya kibakala na Yandi sambu na kufunda yandi.

2 Wanzio ya Nzambi songaka Satana nde :
“Satana, bika Mfumu Nzambi yina me sola Yeruzalemi, Yandi mosi nganina nge...”

? Yula bana

🏠 Bana sala bageste to mwa-senete

👤 Bana yimba ti kina

4.2 Zakaria songaka bo nde bo ta nunga ve na ngolo ya kimuntu, kansi na ngolo ya Mpeve ya Nzambi.

📖 Tangila bana : Zakaria 4 :6

4 :6 Wanzio songaka mono nde Mfumu Nzambi me songa Zorababele nde : « Kele ve na ngolo ya kimuntu ya nge ta sala, kansi na ngolo ya Mpeve na Mono. Mono Mfumu ya armee ya bawanzio, Mono mosi me tuba. »

? Yula bana

🏠 Bana sala bageste to mwa-senete

👤 Bana yimba ti kina

4.3 Zakaria songaka bo nde Nzambi zolaka bo kulemfuka na ntima na bo yonso.

📖 Tangila bana : Zakaria 7 :4-5

7 :4-5 Ebuna Mfumu Nzambi...tubaka na mono nde : « Yula bantu ti banganga-Nzambi nde :
‘...kubuya yina ya beno ke buyaka kudila, ti kudila yina ya beno ke dilaka...keti ya kieleka yo kele sambu na Mono ?

? Yula bana

🏠 Bana sala bageste to mwa-senete

👤 Bana yimba ti kina

4.4 Kisalu ya bo kutunga diaka Nzo-Nzambi, yo

vandaka mfunu mingi. Mesia ya fweti kwisa, Yandi fweti kota na Nzo yai.

 **Tangila bana : Zakaria 9 :9**

9 :9 ...Beno bantu ya Yeruzalemi, beno tula milolo sambu na kiese ! Tala Mfumu na beno ke kwisila beno. Yandi keke Nkwa-masonga. Mpulusu keke na Yandi. Yandi keke Muntu ya kudikulumusa, me vanda na zulu ya mwana-mpunda.

 **Yula bana**

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Bonso profete Agai, Zakaria mpi bendaka mabanza ya Bayuda sambu bo manisa kutunga Nzo-Nzambi. Yandi zolaka ve kaka nde bo sala yo, kansi nde bo sala yo na kiese, na ntima na bo yonso. Yandi zolaka nde bo balula ntima, bo vutuka na Nzambi na ntima na bo yonso. Mpidina, ata Satana yandi mosi vandaka kunwanisa bo, bo ta manisa kisalu na ngolo ya Nzambi.

Bo bakisaka ve mfunu ya Nzo-Nzambi yina. Bo monaka nde yo vandaka sambu bo mosi kusamba na kati. Bo bakisaka ve nde Mesia Yandi mosi, Yesu Kristo Mfumu na beto, ta tambula na kati na yo.

 **Devoir sambu na bakristo :**

Bana bakristo, na yonso ya beto ke sala, keti beto ke yindula lukumu ya Nzambi ? Keti beto ke landa Yandi na ntima na beto yonso ? Beto meka kusala

yo mposo yai.

 **Verse ya Kulonguka :**

Bana tuba verse mbala 2 fraze na fraze na nima ya nge, moniteur. Na nima, bo yika kidimbu sambu na ndinga 'vutuka,' bo tuba yo mbala 2 diaka. Na nsuka, bo tambula ti tuba yo na ritima, etape mosi na konso syllable. Nge twadisa bo ti bo landa, kutuba yo mbala 2 diaka.

 **Nkunga ya kwenda nzila mosi ti leso :**

Vutuka Afrika, Vutuka !

 **Invitation sambu na bo ya me yamba Yesu ntete ve :**

Mpila ta vanda ve kulanda Nzambi na ntima yonso, kana nge me balula ntete ve ntima, kutula kivuvu na Mwana na Nzambi. Keti nge zaba Yesu Kristo na ntima na nge ? Keti nge ke landa na nzila na Yandi ?

Kana nge zaba ve mbote-mbote, nge lenda binga zina na Yandi bubuyai. Nge lenda kota na nzila na Yandi. Bikala na nima ya ecodim kana nge ke na mfunu ya lusadisu na mambu yina.

NSUKA YA LESO 4

 Kana nge me manisa leso ti ntangu ke lunga, konso mposo nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.

Leso 4

Profete
Zakaria
songaka
Bayuda
nde bo
vutuka na
Nzambi na
ntima na
bo yonso.

Kisalu na
bo
kutunga
Nzo-
Nzambi
vandaka
mfunu.
Mesia
Yandi mosi
ta kota na
Nzo yina.



***...Ntangu yai, Mono ke
songa beno nde beno
kwisa kuvutuka na Mono,
ebuna Mono mpi ta vutuka
na beno.***

Zakaria 1:3

Leso 5. Guvernere fundaka Bayuda na Mfumu Dariusi, kansi yo simbaka ve. Bo manisaka kisalu yina ya kiese.

Leso yai ke monika na Esdrasi 5 :3-17, 6 :1-12.

I. PREPARASIO SAMBU NA MONITEUR-

☉ Kikuma ya Leso :

Bana ta wa ve boma ya bantu, ata bo funda bo, kana bo zaba nde bo ke sala luzolo ya Nzambi na kwikama.

♥ Verse ya Kulonguka :

Kuwa boma ve, sambu Mono kele ti nge. Mono kele Nzambi na nge. Kima mosi ta pesa nge boma ve ! Yezaya 41 :10a

👤 Nkunga ya kwenda nzila mosi ti leso :

Bu Yesu Kele na Mono

II. REVISIO

† Kuyindula diaka baleso me luta :

Nani lenda bambuka baprofete zole ya Nzambi tindaka sambu na kupesa Bayuda nzala kumanisa kutunga Nzo-Nzambi ? (Ee, Agai ti Zakaria)

III. KULONGA LESO YAI

➔ Kuyantika :

Kaka ntangu ya Nzambi tindaka baprofete yai, bambeni ya nkaka telamaka sambu na kuyangisa bantu ya Nzambi ti kukanga kisalu na bo.

🏠 Malongi ya nene ya leso yai (developpement) na banti ya malongi 4 :

5.1 Guvernere Tate* tesaka kupesa Bayuda boma na kutuba na yandi. *nkufi sambu na Tatenai

📖 **Tangila bana :** Esdrasi 5 :3-4

5 :3-4 Ebuna Tete, guvernere ya provense, ti bantu ya nkaka, kwisaka na Yeruzalemi. Bo yulaka nde : « Nani me pesa beno nzila kutunga diaka Nzo-Nzambi ? Banani bazina ya bantu yonso yina ke kutunga nzo yai ? »

? Yula bana

🏠 **Bana sala bageste to mwa-senete**

👤 **Bana yimba ti kina**

5.2 Guvernere kwikilaka ve mvutu ya Bayuda pesaka yandi. Yo yina, yandi sonikaka lettire kufunda bo na mfumu ya nene Dariusi.

📖 **Tangila bana baverse yai :** Esdrasi 5 :5-17

5 Kansi Nzambi vandaka na bambuta ya Bayuda. Yo yina, bantu ya Persia tubaka nde bo ta sala kima ve tii kuna bo sonikila Mfumu ya nene Dariusi mukanda, ti bo kuzwa mvutu na yandi.

« Ntangu yai, Mfumu, kana nge zola, songa bantu bo sosa na mikanda ya kimfumu kana bo lenda mona kisika Mfumu Siriusi pesaka nswa na Bayuda kutunga diaka Nzo-Nzambi na Yeruzalemi. Ebuna zabisa beto nki nge me zenga na mambu yai. »

? Yula bana

🏠 **Bana sala bageste to mwa-senete**

👤 **Bana yimba ti kina**

5.3 Mfumu ya nene Dariusi monaka nde kutuba ya Bayuda vandaka kieleka. Yo yina, yandi zengaka nde Guvernere kuyangisa bo diaka ve, ti yandi mosi sadisa bo na yonso bo ta vanda na yo mfunu.

📖 **Tangila bana :** Esdrasi 6 :1-13

6 :1-2 Yo yina, Mfumu Dariusi songaka bantu kusosa na mikanda ya kimfumu. Bo monaka mukanda mosi ya vandaka kutuba :

3-4 « Mfumu Siriusi tubaka nde Bayuda tunga diaka Nzo-Nzambi na Yeruzalemi. Bisalu yonso, leta muntu ta futa yo.

5 Bima yonso ya wola ti ya arza ya Mfumu Nabu bakaka na Nzo-Nzambi ya Yeruzalemi, bo fweti vutula yo...

6-7 Ntangu yai, Mfumu Dariusi pesaka mvutu nde : « Guvernere Tate, beno katuka penepene na Nzo-Nzambi. Beno pesa Bayuda nzila kutunga diaka Nzo-Nzambi.

8-9 Mono me tula nsiku nde beno sadisa bo kutunga yo. Beno pesa bo bima yonso ya bo ke na yo mfunu...

12 Mono Dariusi muntu me tula nsiku yai.

Bantu fweti landa yo kaka. »

*13 Guvernere Tatenai salaka kaka mutindu
Mfumu ya nene Dariusi tubaka.*

? Yula bana

✎ Bana sala bageste to mwa-senete

🗣️ Bana yimba ti kina

5.4 Bayuda bakaka ngolo na enkuragema ya baprofete Agai ti Zakaria. Bo landaka kutunga tii ntangu bo manisaka ksalu ! Bantu yonso vandaka na kiese ya mingi sambu ksalu ya Nzo-Nzambi manaka.

📖 Tangila bana : Esdrasi 6 :14-16

14a Bambuta ya Bayuda tambusaka ksalu ngolo na kutunga Nzo-Nzambi. Baprofete Agai ti Zakaria pesaka bo kikesa mingi.

14b-15 Bo manisaka Nzo-Nzambi kaka mutindu Nzambi songaka bo tii ksalu ya Nzo-Nzambi manaka.

16 Ebuna bantu yonso ya Israele yina kwisaka kuvutuka na kimpika, bo pesaka nzo yina na maboko ya Nzambi na kiese yonso.

? Yula bana

✎ Bana sala bageste to mwa-senete

🗣️ Bana yimba ti kina

>|< Kumanisa Malongi :

Bayuda vandaka ve na boma, sambu bo zabaka nde bo vandaka kusala mpila Nzambi me songa bo. Bo zabaka nde Mfumu ya nene ya Persia me pesa bo nzila kutunga. Mbeni guvernere Tate fundaka bo, kansi Nzambi salaka na mpila nde bo nungaka. Na nsuka, mbeni ya zolaka kukanga bo nzila kutunga, yandi muntu fweti sadisa bo !

👋 Devoir sambu na bakristo :

Bana bakristo, nki ksalu Nzambi me pesa beno ya kusala ? Kulonguka na nzo-nkanda ? Kuyimba na chorale ? Kusadisa mama kulamba ? Kukomba Nzo-Nzambi ? Kunata bintuntu sambu na kutula yo kitoko ? Konso ksalu ya Nzambi me pesa nge, landa kaka kusala yo tii ksalu yina kumana. Kiese mingi kusadila Nzambi mutindu yina !

♥ Verse ya Kulonguka :

Bana tuba verse mbala 2 fraze na fraze na nima ya nge, moniteur. Bo yika geste sambu na ndinga 'boma' ti tuba yo mbala zole diaka. Na mbala 2 ya nsuka, bo tuba yo na ndinga mosi ya ngolo ti kikesa.

🗣️ Nkunga ya kwenda nzila mosi ti leso :

Bu Yesu Kele na Mono

✝ Invitation sambu na bo ya me yamba Yesu ntete ve :

Nzambi ke nwana ve sambu na konso muntu. Nzambi ke nwana kaka sambu na bantu na Yandi, bantu ya me tula Yandi ntima.

Nki mutindu nge lenda kuma mwana ya Nzambi ? Bible ke tuba nde beto yonso me vila nzila na Yandi, beto me yungana bonso mameme (Yezaya 53 :6). Keti nge me bakisa nde nge me vila nzila ya Nzambi ? Yindula bansiku ya Nzambi pesaka. Ntete kele kuzola Yandi na ntima na nge yonso. Kansi mbala ya nkaka, nge me zinga bilumbu mingi kukonda ata kuyindula Yandi. Nsiku ke tuba nde beto tuba luvunu ve. Luvunu ikwa nge me tuba ? O, Nzambi kele na makambu ti beto sambu beto me landa ve bansiku Yandi me pesa. Ntima na beto kele ntama ti Yandi. Beto me kuma bambeni na Yandi.


Yesu Kristo, Mwana ya Nzambi, kwisaka sambu na kufuta mfuka ya kimbeni yina yonso. Yandi fwaka na sika ya beto, bantu ya masumu, ti Yandi telamaka na lufwa.

Kana nge ndima, menga na Yandi lenda katula masumu na nge, lenda katula kimbeni na nge ti Nzambi, lenda tula kinduku. Yandi lenda changer ntima na nge sambu nge kuvanda na kiese kulanda nzila na Yandi.

Keti nge zaba kieleka nde nge me ndima makabu Yesu zola kupesa nge ? Kana nge ke zaba ve, zenga yo bubuyai. Beto kele awa na nima ya ecodim konso mposo sambu na kusadisa bana ya zola balula ntima na Yesu.

NSUKA YA LESO 5

📖 Kana nge me manisa leso ti ntangu ke lunga, konso mposo nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.



Bayuda
pesaka
bambeni
nzila ve
kupesa bo
boma to
kukanga
kisalu na
bo.

Bo landaka
kutunga
Nzo-Nzambi
tii bo
manisaka
yo.

**Kuwa boma ve, sambu
Mono kele ti nge. Mono
kele Nzambi na nge.**

**Kima mosi ta pesa nge
boma ve !**

Yezaya 41 :10a

Leso 6. Bayuda sambaka na Nzo-Nzambi ya mpa ti salaka fete ya Paki na kiese yonso.

Leso ke monika na Esdrasi 6 :17-22.

I. PREPARASIO SAMBU NA MONITEUR-

☉ Kikuma ya Leso :

Bana ta bambuka mambu ya mbote ya Nzambi me sala na luzingu na bo ti na bambuta na bo, ebuna bo ta tonda Nzambi.

♥ Verse ya Kulonguka :

...Yindula mambu ya nene ti ya kuyituka ya Yandi me sala... 1 Bansangu 16 :12

👤 Bankunga ya kwenda nzila mosi ti leso :

Kieleka Nge Ke Nene
Nkembo, Nkembo

II. REVISIO

† Kuyindula diaka baleso me luta :

Beto me mona nde Bayuda yonso waka kiese mingi sambu Nzambi me sadisa bo kumanisa kisalu ya kutunga diaka nzo-Nzambi.

III. KULONGA LESO YAI

➔ Kuyantika :

Kana Nzambi me sadisa beto ngolo, nki beto fweti sala ? (Ee, beto fweti tonda Yandi ti samba Yandi.) Bayuda mpi tondaka Yandi sambu Yandi me sadisa bo kutunga diaka Nzo-Nzambi, mpi kumanisa kisalu yina.

🏠 Malongi ya nene ya leso yai (developpement) na banti ya malongi 3 :

6.1 Bayuda pesaka Nzambi makabu sambu na kuvutula matondo.

📖 **Tangila bana :** Esdrasi 6 :17

17 Na kupesa Nzo-Nzambi na maboko ya Nzambi, bo nataka bangombe nkama, mameme nkama zole, ti bana-mameme nkama iya sambu na makabu. Bo nataka mpi bankombo kumi na

zole sambu na masumu ya makanda kumi na zole ya Israele.

? Yula bana

🏠 Bana sala bageste to mwa-senete

👤 Bana yimba ti kina

6.2 Bo tulaka banganga-Nzambi na ndonga sambu bo sadila Nzambi mbote.

📖 **Tangila bana :** Esdrasi 6:18

18 Bo tulaka mpi banganga-Nambi ti bantu ya diakanda ya Levi na kisalu ya Nzo-Nzambi kuna, mutindu bo sonikaka na mukanda ya Moize.

? Yula bana

🏠 Bana sala bageste to mwa-senete

👤 Bana yimba ti kina

6.3 Bo salaka fete ya Paki na kiese sambu na kubambuka yonso ya Nzambi me sala sambu na bo.

📖 **Tangila bana :** Esdrasi 6 :19-22

19...Bantu yonso yina katukaka na kimpika, bo salaka Nkinsi ya Paki.

20-21 Banganga-Nzambi yonso ti dikanda ya Levi, bo fwaka bambisi ya Paki. Bantu yonso ya Israele diaka yo...

22 Bo salaka nkinsi na kiese yonso. Bo vandaka na kiese mingi sambu Mfumu Nzambi salaka na mpila nde mfumu ya nene kusala bo mbote, yandi sadisa bo na kisalu ya kutunga diaka nzo na Yandi...

? Yula bana

🏠 Bana sala bageste to mwa-senete

👤 Bana yimba ti kina

>|< Kumanisa Malongi :

Bayuda vandaka na kiese sambu Nzambi me sadisa bo ngolo. Yo yina, bo me manisa kutunga diaka Nzo na Yandi. Mbote beto sala bonso bo. Beto

bambuka mambu ya mbote ya Nzambi me sala na luzingu na beto, ebuna beto tonda Yandi.

Devoir sambu na bakristo :

Mwana mukristo, nki mambu ya mbote Nzambi me sala na luzingu na nge ? Na mposo yai, keti nge ta bambuka yo ? Keti nge ta vutula Yandi matondo ?

Verse ya Kulonguka :

Bana tuba verse mbala 2 fraze na fraze na nima ya nge, moniteur. Bo yika bageste ti tuba yo mbala 2 diaka. Na nsuka, konso muntu songa mpangi na droit verse yina, ti mpangi yina vutula yo na yandi. Bo sala kiteso mosi na mpangi na gauche.

Bankunga ya kwenda nzila mosi ti leso :

Kieleka Nge Ke Nene
Nkembo, Nkembo

Invitation sambu na bo ya me yamba Yesu ntete ve :

Mambu ya kuluta mbote ya Nzambi lenda sala na luzingu ya konso muntu, yo kele kugulusa yandi ti kupesa yandi moyo ya mvula na mvula. Yai salama ntangu muntu bakisa nde yandi kele na makambu ti

Nzambi sambu na masumu na yandi, yandi bakisa nde Yesu fwaka na zulu ya kulunsi sambu na kufuta mfuka ya masumu na yandi. Ebuna, yandi zenga kubika nzila ya masumu, kundima Yesu bonso Mvulusi ti Mfumu.

Keti nge bambuka ntangu nge bakisaka mambu yina ? Keti nge bambuka ntangu nde nge balulaka ntima, nge zengaka kutula ntima na Yesu ti kulanda nzila na Yandi ?

Kana nge me tula ntima na Yandi, yo fweti changer ntima ti luzingu na nge. Nge ta vanda na kiese kusala masumu diaka ve. Nge ta zola mingi kulanda nzila ya mbote ya Yesu.

Kana nge zola bakisa kuluta nki mutindu nge lenda guluka na Yesu Kristo, kwisa solula ti beto na nima ya ecodim.

NSUKA YA LESO 6

 Kana nge me manisa leso ti ntangu ke lunga, konso mposo nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.



Leso 6

Bayuda
vutulaka
matondo
na
Nzambi,
ti bo
salaka
nkinsi ya
Paki na
kiese nde
Nzambi
me
sadisa bo
kumanisa
kutunga
diaka
Nzo-
Nzambi.

**...Yindula mambu
ya nene
ti ya kuyituka
ya Yandi me sala...**

1 Bansangu 16 :12

Leso 7. Mfumu Arta* pesaka ordre nde Bayuda ya nkaka vutukaka na Yeruselemi ti Esdrasi.

*Nkufi sambu na Artaxeresezi

Leso ke monika na Esdrasi 7 ti 8.

I. PREPARASIO SAMBU NA MONITEUR-

© Kikuma ya Leso :

Bana ta kudipesa na ndinga ya Nzambi, kutanga yo, kulunguka yo, kulemfuka na yo, ti kulonga yo na bantu ya nkaka.

♥ Verse ya Kulunguka :

Esdrasi kudipesa kulunguka Bansiku ya Mfumu Nzambi, kulanda yo mbote-mbote, ti kulonga yo yonso na bantu ya Israele. Esdrasi 7 :10

🔊 Bankunga ya kwenda nzila mosi ti leso :

O Bible Kele Kieleka

Tanga Bibila, Lumbu na Lumbu

II. REVISIO

† Kuyindula diaka baleso me luta :

Beto me mona mpila ndambu ya Bayuda vutukaka na Yeruselemi, mpila bo tungaka mesa-kimengi, ti mpila bo manisaka kutunga diaka Nzo-Nzambi ya mvimba na kiese.

III. KULONGA LESO YAI

➔ Kuyantika :

Yai yonso beto me tanga na mukanda ya Esdrasi. Kansi muntu yai Esdrasi, beto me mona yandi ntete ve. Zerobabele vandaka ntwadisi ya bantu ya salaka yai yonso. Kansi ntangu Zerobabele ti Bayuda ya nkaka vandaka kutunga diaka Nzo-Nzambi na Yeruselemi, Bayuda ya nkaka, yina me bikala na nsi ya Persia, bo vandaka kusosa Nzambi mpi. Mosi ya nene na bo vandaka Esdrasi.

🏠 Malongi ya nene ya leso yai (developpement) na banti ya malongi 4 :

7.1 Mfumu Arta ya Persia tindaka Esdrasi kuvutuka na Yeruselemi ti Bayuda ya nkaka. Bantu yonso sadisaka bo kukwenda na makabu na diboko. Mfumu tulaka bo ata mpaku ve.

📖 **Tangila bana : Esdrasi 7 :1-13, 20, 24**

I Na nima ya mambu yai, ntangu Arta vandaka mfumu ya Persia, muntu mosi vandaka, zina ya Esdrasi. Yandi muntu ya dikanda ya nganga-Nzambi ya nene Aroni....

6-7 Esdrasi vandaka muntu ya mayele. Yandi zabaka mbote-mbote Bansiku ya Nzambi. Mfumu Nzambi vandaka na Esdrasi, yo yina Mfumu Arta vandaka kupesa yandi konso kima ya yandi me lomba. Esdrasi katukaka na bwala Babilonia, kukwenda na Yeruselemi nzila mosi ti bantu ya nkaka ya Israele...

11-13 Mfumu Arta pesaka mukanda yai na Esdrasi : Mono ke tinda nge na ntoto ya Yuda ti na bwala Yeruselemi kutala nki mutindu bo ke landa Bansiku ya Nzambi. Nge fweti nata makabu...

20 Ebuna konso kima ya nkaka ya nge ta vanda na yo mfunu, nge lenda sumba yo na mbongo ya kesi ya leta.

24 Banganga-Nzambi ti bantu ya kisalu ya Nzo-Nzambi, bo fweti futa mpaku ve.

? Yula bana

🏠 **Bana sala bageste to mwa-senete**

🔊 **Bana yimba ti kina**

7.2 Esdrasi vandaka kudipesa na Bansiku ya Mfumu Nzambi.

📖 **Tangila bana : (Verse ya kulunguka bubuyai.)**
Esdrasi 7 :10

10 Esdrasi kudipesa kulunguka Bansiku ya Mfumu Nzambi, kulanda yo mbote-mbote, ti kulonga yo yonso na bantu ya Israele.

? Yula bana

🏠 **Bana sala bageste to mwa-senete**

🔊 **Bana yimba ti kina**

7.3 Bo tulaka Nzambi ntima, ebuna Yandi lundaka bo na nzila. Bo kumaka mbote na Yeruselemi kukonda basoda kunata bo.

📖 **Tangila bana : Esdrasi 8 :31**

8 :31 Beto katukaka na Persia sambu na kwenda na Yeruselemi. Nzambi vandaka ti beto. Yandi taninaka beto na bambeni ti na

bamiyibi.

? Yula bana

🏠 Bana sala bageste to mwa-senete

👤 Bana yimba ti kina

7.4 Kisalu ya Esdrasi kutula bantwadisi ya ta landa ndinga ya Nzambi, mpi kulonga bo ndinga ya Nzambi sambu bantu yonso kulanda yo.

📖 Tangila bana : Esdrasi 7 :25

7 :25 Nge Esdrasi, sadila mayele ya Nzambi pesaka nge. Tula bambuta ti bazuzi yina ta yala bantu yonso, bayina ke landa Bansiku ya Nzambi. Longa Bansiku yango na konso muntu yina me zaba yo ve.

? Yula bana

🏠 Bana sala bageste to mwa-senete

👤 Bana yimba ti kina

>|< Kumanisa Malongi :

Nzambi kangulaka Esdrasi nzila kutwadisa Bayuda ya nkaka kuvutuka na Yeruzalemi sambu na mpila yandi vandaka kudipesa na Ndinga ya Nzambi.



Devoir sambu na bakristo :

Bana bakristo, mbote beto mpi kudipesa kuzaba ndinga ya Nzambi, kulemfuka na yo, mpi kulonga yo na bampangi. Nzambi ta sakumuna beto mpi.



Verse ya Kulonguka :

Bana tuba verse mbala 2 fraze na fraze na nima na nge, moniteur. Na nima, kabisa bana na bandonga 3, konso ndonga kutuba fraze mosi. Sala yo mbala 3, ebuna vukisa yo sambu bana yonso tuba.



Bankunga ya kwenda nzila mosi ti leso :

O Bible Kele Kieleka

Tanga Bibila, Lumbu na Lumbu



Invitation sambu na bo ya me yamba Yesu ntete ve :

Na nsuka ya konso leso, beto tuba mambu ya kubalula ntima, kutula vivuvu na Yesu. Sambu na nki beto sala mpidina ? Beto ke sosa nki ? Keti beto zola nge kuguluka konso mposo, ata nge me guluka dezia ?

Ikele ve. Na nsuka ya konso leso, beto ke tuba na konso mwana ya zaba ntete ve nde yandi me balula ntima na Yesu. Beto me mona nde bana mingi kwisa na ecodim, kwisa na bisambu, kansi bo me zenga ntete ve kulanda Yesu Kristo. Bo lenda yimba na chorale. Na nima ya ntangu, bo lenda kuma badiacre, bamoniteur ya ecodim, ata bapasteur. KANSI bo me guluka ve, sambu bo me balula ntima ve na Yesu Kristo. Kana nge kele mwana mutindu yina, beto ke tuba na nge.

Beto mpi ke tuba na bavisiteur ya me kaka yantika kubakisa nsangu ya Yesu. Ata nge kele visiteur, to nge me kwisa na ecodim katuka ntangu nge vandaka bebe, kana nge me balula ntima ntete ve na Yesu, invitation yai kele sambu na nge.

Kana nge zaba nde nge me yamba Yesu dezia, ntangu beto ke binga bantu ya nkaka, nge lenda kaka samba nde konso mwana ta kwisa na Yesu.

Nsangu ya mbote, yo yai : Nzambi kele santu yonso. Yandi zola masumu ve. Yandi salaka beto, yo yina, Yandi lunga kusonga beto nki kele mbote ti nki kele mbi.

Kansi beto me sala mambu mingi ya Yandi ke mona mbi. Masumu lenda kota ve na bwala ya kitoko ya Nzambi. Masumu na beto me tula kimbeni na kati na beto ti Nzambi. Yo me natila beto lufwa ya kimpeve, lufwa mvula na mvula.

Kansi Nzambi zolaka beto, bankwa-mbi. Yandi tindaka Mwana ya kitoko na Yandi, Yesu. Yesu bakaka ndola ya lufwa na sika na beto. Na nima, Tata Nzambi tedimisaka Yesu na lufwa diaka.

Yandi me sila nde kana muntu balula ntima ti tula kivuvu yonso kaka na Yesu, Yandi ta gulusa muntu yina. Yandi ta changer ntima ya muntu yina ti pesa yandi moyo ya mpa.

Ntangu beto binga bavidi kukwisa na Yesu, kana nge zaba ve nde nge me guluka, kubinga yai kele sambu na nge. O, kiese ya nene ntangu ya nge mpi kuyamba Yesu Kristo ! Kana nge zola solula mambu yai to samba ti beto sambu na yo, kaka bikala na nima ya ecodim sambu beto kusadisa nge.

NSUKA YA LESO 7

📖 Kana nge me manisa leso ti ntangu ke lunga, konso mposo nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.

Leso 7

Nzambi
pesaka
Esdrasi
kisalu ya
kutwadisa
bantu ya
nkaka
kuvutuka
na
Yeruzalemi.
Yandi
vandaka
ngolo na
Ndinga ya
Nzambi.



**Esdrasi kudipesaka
kulonguka Bansiku ya
Mfumu Nzambi,
kulanda yo mbote-mbote,
ti kulonga yo yonso na bantu
ya Israele.**

Esdrasi 7 :10

Leso 8. Nehemiah monaka mawa ti sambaka Nzambi sambu na rapport nde Yeruzalemi me bikala kulala ya kufwa.

Leso ke monika na Nehemia 1.

I. PREPARASIO SAMBU NA MONITEUR-

☉ Kikuma ya Leso :

Bana bakristo ta samba nde Kimfumu ya Nzambi kwenda na ntwala.

♥ Verse ya Kulunguka :

(Yesu nde :) Tala mutindu beno fweti samba Nzambi: « Tata na beto kele na zulu, Bika zina na Nge ya santu kuvanda ya lukumu, Kimfumu na Nge kwisa... Matayo 5 :9-10a

👤 Bankunga ya kwenda nzila mosi ti leso :

Lomba na Nzambi
Sosa Ntete

II. REVISIO

† Kuyindula diaka baleso me luta :

Sambu na nki Bayuda salaka bamvula 70 na Babilone-Persia ?
(Sambu bo salaka mbi mingi, ti bo balulaka ntima ve kubika masumu na bo.)

Na nima ya bamvula 70, ndambu ya ntete ya Bayuda vutukaka na Yeruzalem. Ntwadisi na bo Zerobabele. Bo tungaka nki ntete?
(Mesa-kimenga sambu na kupesa Nzambi makabu)

Kima ya zole bo tungaka, nki ? (Nzo-Nzambi)

Nani vutukaka na Yeruzalemi ti ndambu ya bantu ya nkaka ? (Esdrasi)

III. KULONGA LESO YAI

➔ Kuyantika :

Tii ntangu yina, Bayuda ya nkaka me bikala na Kimfumu ya Persia. Mosi na bo vandaka Nehemia. Yandi vandaka kusadila Mfumu Arta, mfumu ya nene ya Persia, kansi ntima na yandi zolaka mingi bampika na yandi Bayuda. Yandi zolaka Nzambi na ntima na yandi.

🌟 Malongi ya nene ya leso yai (developpement)

na banti ya malongi 4 :

8.1 Nehemia waka rapport ya kisalu ya Nzambi na Yeruzalemi. Bambeni vandaka mingi, ti bibaka ya bwala me lala ya kubwa kaka.

📖 **Tangila bana : Nehemia 1 :1-3**

2 ...Bantu ya Yuda kwisaka ti mono Nehemia yulaka bo nsangu ya Bayuda ya vutukaka na Yeruzalemi.

3 Bo songaka mono nde, bo ke zinga kuna na mpasi mingi. Banzenza mpi penepene na bo, bo ke fingaka bo. Bibaka ya Yeruzalemi mpi me bikala kaka ya kubwa...

? **Yula bana**

🏠 **Bana sala bageste to mwa-senete**

👤 **Bana yimba ti kina**

8.2 Nsangu yina pesaka Nehemia kiadi.

📖 **Tangila bana : Nehemia 1 :4**

Ntangu mono waka mambu yai, mono vandaka kudila ndambu bilumbu. Mono kudiaka ve...

? **Yula bana**

🏠 **Bana sala bageste to mwa-senete**

👤 **Bana yimba ti kina**

8.3 Nehemia sambaka Nzambi sambu na kizitu yina.

📖 **Tangila bana : Nehemia 1 :4c-10**

4c-5 Mono vandaka kusamba Nzambi nde :
“Mfumu Nzambi...Nge ke vilaka ve kuwakana ya Nge wakanaka ti bantu yina zola Nge...

6...Wa mutindu mono ke samba Nge mpimpa ti mwini sambu na bantu na Nge Israele...

10 Mfumu Nzambi, bayai kele bantu na nge mpenza, bantu ya Nge mosi gulusaka na ngolo na Nge ya nene.

? **Yula bana**

🏠 **Bana sala bageste to mwa-senete**

👤 **Bana yimba ti kina**

8.4 Nehemia lombaka Nzambi nde Yandi kangula yandi nzila kusadisa.

Tangila bana : Nehemia 1 :11

Ntangu yai, wa bisambu na mono, wa mpi bisambu ya bantu ya nkaka bayina yonso ke zola kuzitisa Nge. Bongisa makambu na mono bubu yai na mpila nde Mfumu Arta kuwila mono mawa. »

Yula bana

Bana sala bageste to mwa-senete

Bana yimba ti kina

>|< Kumanisa Malongi :

Na ntima ya Nehemia yonso, yandi zolaka nde kisalu ya Nzambi kwenda na ntwala. Yo yina, yandi landaka nsangu ya Bayuda ya me vutuka na Yeruzalemi. Yo yina, ntangu yandi waka rapport ya mbi, yandi waka mawa. Yandi yantikaka kusamba. Na bisambu na yandi, yandi sosaka nde Mfumu ya Persia pesa yandi nzila kusadisa. Kieleka, yandi vandaka kusosa ntete Kimfumu ya Nzambi !

Devoir sambu na bakristo :

Mwana mukristo, keti nge ke sosa kupusa Kimfumu ya Nzambi na ntwala ? Ketu nge ke sosa mambote ya dibundu na Yandi ? Ketu nge ke samba sambu na yo ? Ata Yesu Kristo longaka beto kusamba mpidina. Nki nge lenda sala mposho yai sambu Kimfumu ya Nzambi kwenda na ntwala ?
[Bangindu—Tula pasteur na lombilu, kwisa na bisambu na ntangu ya mbote, komba nzo-Nzambi, lombu nduku kukwisa na bisambu ti nge, tuba mbote sambu na dibundu na nge, pesa makabu, etc.]

Verse ya Kulonguka :

Bana tuba verse mbala 2 fraze na fraze na nima na nge. Na nima, bo yika bageste ti tuba yo mbala 2 diaka. Na nsuka, bo tuba zole mbala 2 na positio ya lombilu.

Bankunga ya kwenda nzila mosi ti leso :

Lomba na Nzambi
Sosa Ntete

Invitation sambu na bo ya me yamba Yesu ntete ve :

Kestio ya nene beto zola yula na nsuka. Ketu nge mosi kele na kati ya Kimfumu ya Nzambi ? Yesu tubaka nde : « Mono ke tubila nge mambu ya kieleka : Ata muntu mosi ve lenda mona Kimfumu ya Nzambi, kana yandi me butuka diaka mbala ya zole ve » (Yoane 3 :3). Yesu landaka kutendula nde muntu butuka diaka mbala ya zole ntangu muntu yina ndima Yandi, Yesu. « Konso muntu yina me ndima Mwana yina na ntima na yandi, yandi ke na moyo ya mvula na mvula. Kansi konso muntu ke lemfukilaka Mwana yina ve, yandi ta baka moyo ve, kansi Nzambi ta wilaka yandi makasi » (Yoane 3 :36).

Mbi ya beto me sala, yo me natila beto ndola ya lufwa. Yesu bakaka ndola na sika na beto, ntangu yandi fwaka na zulu ya kulunsi. Yandi losaka menga na Yandi makabu ya Nzambi lenda ndima, kaka sambu na kugulusa beto. Yandi me bikala na lufwa ve. Yandi me telama na moyo na ngolo yonso. Bubuyai, konso muntu ya bika nzila ya masumu kutula ntima na Yandi, yandi ta baka moyo mvu ya mvu. Yandi ta kota na Kimfumu ya Nzambi. Ketu nge zaba nde nge me kota ? Kana ve, beto ta vanda na kiese kusolula ti nge na nima ya ecodim.

NSUKA YA LESO 8

 Kana nge me manisa leso ti ntangu ke lunga, konso mposho nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.

Leso 8

Nehemia
dilaka ti
sambaka
Nzambi
ntangu
yandi waka
nde bibaka
ya
Yeruzalemi
me bikala
ya kubwa.



*(Yesu nde :) Tala mutindu beno
fweti samba Nzambi :*

**« Tata na beto kele na zulu,
Bika Zina na Nge ya santu
kuvanda ya lukumu,
Kimfumu na Nge kwisa...**

Matayo 5 :9-10a

Leso 9. Nehemia lombaka nzila kuvutuka ti mfumu ndimaka. Yo yina, yandi vutukaka na Yeruzalem ti talaka mpila yo me bikala ya kufwa.

Nehemia 2 :1-16

I. PREPARASIO SAMBU NA MONITEUR-

🕒 Kikuma ya Leso :

Kana bana mona kisalu ya kele mfunu, bo ta samba, bo ta yidika lukanu, ebuna bo ta sala yo.

♥ Verse ya Kulonguka :

Konso kisalu ya beno ke sala, sala yo na ntima mosi ya mbote, bonso beno ke sadila kaka bantu ve, kansi Mfumu Yesu mpi. Kolosai 3 :23

👤 Bankunga ya kwenda nzila mosi ti leso :

Bafourmi Kele Ngangu
Mo' Ta Nwana Sambu na Yesu

II. REVISIO

👤 Kuyindula diaka baleso me luta :

Beto me mona nde ndambu ya Bayuda me vutuka na Yeruzalemi na nima bo me sala bamvula ikwa na kimpika na Babilone-Persia ? (Bamvula 70)

Bo me tunga diaka bima zole. Nki bima yina ? (Mesa-kimenga ya kupesa makabu, ti Nzo-Nzambi)

Kima mosi vandaka kubikala ya kufwa. Nki yo ? (Bibaka ya bwala)

III. KULONGA LESO YAI

➡ Kuyantika :

Nehemia me bikala na Persia kusadila mfumu kuna. Nki mutindu yandi me kwisa kuzaba nde bibaka ya Yeruzalemi me bikala ya kufwa ? (Nsangu ya mpangi ya me vutuka kuna.)

Bu Nehemia waka nsangu yina, yandi waka nki mutindu na ntima ? (Mawa)

🏠 Malongi ya nene ya leso yai (developpement) na banti ya malongi 4 :

9.1 Mfumu Arta ya Persia, yandi monaka mawa ya Nehemia ntangu yandi vandaka kupesa yandi malafu ya kunwa. Ebuna yandi yulaka nki mambu.

📖 Tangila bana : Nehemia 2 :1-3

1-2 (Nehemia ke tuba :)...Ntangu Mfumu Arta vandaka ke dia, mono natilaka yandi malafu. Yandi me monaka mono ntete ve na mawa, yo yina yandi yulaka mono nde : «Sambu na nki nge kele mawa-mawa ? »

3 Ebuna mona tubaka nde : « Mfumu, kimfumu na nge kuzinga tii kuna. Nki mutindu mono lenda vanda na mawa ve kana bwala ya bo zikaka bankaka na mono kele ya kufwa, bakielo ya lupangu na yo me piaka tiya ? »

? Yula bana

🏠 Bana sala bageste to mwa-senete

👤 Bana yimba ti kina

9.2 Nehemia lombaka mfumu nzila kukwenda kutunga bibaka ya Yeruzalemi diaka, ti Mfumu Arta ndimaka.

📖 Tangila bana : Nehemia 2 :4-9

4-5 Mfumu yulaka mono nde : « Nki nge zola ? » Mono sambaka Nzambi ya zulu, ebuna mono songaka Mfumu nde : « ...Mfumu, kana nge me zola, pardo, pesa mono nzila, mono kwenda na bwala ya bo zikaka bankaka na mono, mono tunga yo diaka. »

6-9... Yandi ndimaka ! Yandi pesaka mono bima yonso ya mono lombaka yandi, sambu Nzambi vandaka na mono. Yandi pesaka mono basoda yina ke kwendaka na zulu ya bampunda...

? Yula bana

🏠 Bana sala bageste to mwa-senete

👤 Bana yimba ti kina

9.3 Sanabalati ti Tobia bakaka Nehemia na kibeni sambu bo zolaka ve yandi kwisa na Yeruzalemi.

 **Tangila bana : Nehemia 2 :10**

10 Kansi ntangu Sanebalat ti Tobia waka nde muntu mosi me kwisa kusadisa bantu ya Israele, bo vandaka kiese ve ata fioti.

 **Yula bana**

 **Bana sala bageste to mwa-senete**

 **Bana yimba ti kina**

9.4 Nehemia kwisaka na Yeruzalemi ti talaka bibaka yonso ya kubwa sambu na kuyindula lukanu ya kisalu.

 **Tangila bana : Nehemia 2 :11-16**

11-12 Mono kwendaka tii na Yeruzalemi. Mono vandaka kuna bilumbu tatu. Kansi mono zabisaka ata muntu ve mambu ya Nzambi songaka mono kusala... Ebuna na kati ya mpimpa mono telamaka, mono bakaka ndambu ya bantu yina vandaka ti mono...

13 Kaka na mpimpa yo yina, mono basikaka na bwala...ebuna mono kwendaka na ndambu ya sude...mono vandaka kuluta bibaka ya lupangu ya me bwa ti bakielo ya me pia tiya.

14-15 Ebuna mono balukaka na ndambu ya nord, mono vutukaka na bwala...

16 Ata mfumu mosi ve ya bwala zabaka wapi mono kwendaka to nki mono salaka. Mono tubaka mpi kima ve...

 **Yula bana**

 **Bana sala bageste to mwa-senete**

 **Bana yimba ti kina**

>|< Kumanisa Malongi :

 **Devoir sambu na bakristo :**

Nehemia waka nsangu ya kisalu mosi ya vandaka mfunu—kutunga diaka bibaka ya Yeruzalemi. Yandi sambaka Nzambi. Yandi lombaka nzila ya mfumu na yandi ya kisalu. Yandi kwendaka kutala yo ti kuyidika lukanu nki yandi fweti sala. Yandi kingaka ve muntu kusonga yandi kisalu, kansi yandi mosi bakaka lukanu ya kutunga diaka bibaka yina. Mbote beto bakristo, kana beto mona kisalu ya mfunu, beto samba, beto yidika lukanu, beto sala

yo.

 **Verse ya Kulonguka :**

Bana tuba verse mbala 2 fraze na fraze na nima ya nge, moniteur. Na nima, bo yika bageste ti tuba yo mbala 2 diaka. Na nsuka, bo tuba yo mbala 2 na mpila ritimika.

 **Bankunga ya kwenda nzila mosi ti leso :**

Bafourmi Kele Ngangu

Mo' Ta Nwana Sambu na Yesu

 **Invitation sambu na bo ya me yamba Yesu ntete ve :**

Nehemia bakisaka nswalu nki kisalu vandaka mfunu, sambu yandi vandaka muntu ya Nzambi. Ketu nge kele muntu ya Nzambi ?

Beto yonso kele bantu ya Nzambi na mpila nde Nzambi salaka beto yonso na kifwani na Yandi. Kansi beto yonso kele ve bana ya fami ya Nzambi ti Kimfumu na Yandi. Bambuka nde Yesu tubaka na Nicodeme, “Mono ke tubila nge mambu ya kieleka : Ata muntu mosi ve lenda mona Kimfumu ya Nzambi kana yandi me butuka diaka mbala ya zole ve” (Yoane 3:3). Yandi tendulaka yo diaka mutindu yai : “Nzambi me lutaka kuzola bantu yonso. Yo yina, Yandi pesaka bo Mwana mosi yina kele na Yandi (Yesu Kristo), sambu konso muntu yina me ndima Yandi na ntima na yandi, yandi kufwa ve, kansi yandi kuvanda na moyo ya mvula na mvula. »

Beto yonso me sala mambu mingi ya mbi ya me pesa Nzambi kiese ve. Beto me zwa makambu ti Yandi. Kansi “Nzambi tindaka ve Mwana na Yandi awa na nsi-ntoto sambu na kwisa kupesa bantu ndola, kansi sambu na kwisa kugulusa bo” (Yoane 3 :16-17).

Kana nge me tula Yesu ntima, kiese mingi. Kana nge zaba ve, nge lenda balula ntima bubuyai. Bikala na nima ya ecodim kana nge ke sosa lusadisu na mambu yina.

NSUKA YA LESO 9

 Kana nge me manisa leso ti ntangu ke lunga, konso mposho nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.



Leso 9

Nehemia
talaka mpila
bibaka ya
Yeruzalemi
me bikala
kaka ya
kubwa.

**Konso kisalu ya beno ke sala,
sala yo na ntima mosi ya mbote,
bonso beno ke sadila
kaka bantu ve,
kansi Mfumu Yesu mpi.**

Kolosai 3 :23

Leso 10. Nehemia bendaka Bayuda kutunga bibaka ya bwala diaka, ata bambeni vandaka kuseka bo.

Nehemia 2 :17-20

I. PREPARASIO SAMBU NA MONITEUR-

☉ Kikuma ya Leso :

Bana ta pesa bambeni ve nzila kukanga kisalu bo ke sala. Ata bo seka bo, ata bo nwanisa beto, bo ta landa kusadila Nzambi kaka.

♥ Verse ya Kulonguka :

« Nzambi ya zulu ta bongisa mambu na beto. Beto kele bantu na Yandi. Beto tunga bwala... »

Nehemia 2 :20

👤 Bankunga ya kwenda nzila mosi ti leso :

Mono Me Sila Kulanda Yesu
Mo' Ta Nwana Sambu na Yesu

II. REVISIO

📖 Kuyindula diaka baleso me luta :

Nani me kwisa na Yeruzalemi sambu na kutunga diaka bibaka ya bwala ?
(Nehemia)

III. KULONGA LESO YAI

➔ Kuyantika :

Nehemia zabaka mbote nki kisalu Nzambi me pesa yandi. Ntete yandi talaka bibaka yonso na kinsweki ya mpimpa. Yandi bakisaka nene ya kisalu yonso. Nki yandi salaka ntangu yina ?

🏠 Malongi ya nene ya leso yai (developpement) na banti ya malongi 4 :

10.1 Nehemia songaka Bayuda kisalu, ti yandi bendaka bo kusala yo.

📖 **Tangila bana :** Nehemia 2 :17

17 Kansi ntangu yai, mono songaka bo nde :
« Beno me mona mpasi ya beto ke na yo, sambu bwala Yeruzalemi kele ya kubeba, bakielo ya lupangu na yo kele ya kufwa. Beto tungeno

bibaka ya bwala sambu na kukatula nsoni na beto. »

? Yula bana

🏠 **Bana sala bageste to mwa-senete**

👤 **Bana yimba ti kina**

10.2 Nehemia songaka Bayuda mutindu Nzambi me sadisa tii ntangu yina, ebuna bo vutulaka nde, “Beto yantika kisalu !”

📖 **Tangila bana :** Nehemia 2 :18

18 Mono songaka bo mutindu Nzambi vandaka na mono mutindu Yandi me sadisa mono, ti mutindu Mfumu ya nene Arta tubaka na mono. Bo tubaka nde : « Beto yantika kisalu ya kutunga diaka bwala ! » Ebuna bo yilamaka na kuyantika kisalu.

? Yula bana

🏠 **Bana sala bageste to mwa-senete**

👤 **Bana yimba ti kina**

10.3 Bambeni yantikaka kuseka ti kufinga bo na munoko mosi.

📖 **Tangila bana :** Nehemia 2 :19

19 Kansi Sanabalati, Tobia ti Geshemi (bantu ya bansi penepene), ntangu bo waka mambu ya beto vandaka kusala, bo sekaka beto mingi ti fingaka beto nde : « Nki beno yindula kusala ? Ketu beno ke sosa mubulu na mfumu ? »

? Yula bana

🏠 **Bana sala bageste to mwa-senete**

👤 **Bana yimba ti kina**

10.4 Nehemia vutulaka bambeni nde Nzambi ta tala bo bantu na Yandi, kansi bo, bo vandaka na mambu ve na kati na yo, sambu bo vandaka ve bantu na Yandi.

📖 **Tangila bana :** Nehemia 2 :20

20 Mono vutulaka nde : « Nzambi ya zulu ta bongisa mambu na beto. Beto kele bantu na

Yandi. Beto ke tunga bwala. Kansi beno, beno ke na kima ve awa na Yeruzalemi. Beno kele bankwa-nsi ve. Beno ke na kima ya kutuba ve.

? **Yula bana**

 **Bana sala bageste to mwa-senete**

 **Bana yimba ti kina**

>|< **Kumanisa Malongi :**

Nehemia ti bantu ya Israele landaka kisalu ya kutunga bibaka ya bwala ata bambeni vandaka kuseka bo ti kufinga bo. Bo bakisaka nde Nzambi ta sadisa bantu na Yandi.

Devoir sambu na bakristo :

Mwana mukristo, bantu ya zaba Nzambi ve lenda seka nge. Bo lenda finga nge to nwanisa nge mutindu na mutindu. Kuwa bo ve. Kana Nzambi kele kutwadisa nge, kuwa ndinga na Yandi ti landa kusala yina ya Yandi ke zola. Yandi ta nungisa nge.

♥ **Verse ya Kulonguka :**

Bana tuba verse mbala 2 fraze na fraze na nima ya nge, moniteur. Na nima, kabisa bana ti pesa konso ekipe geste mosi bo fweti sala bonso bo ke tunga. Bo tuba verse mbala 2 ntangu bo ke sala bageste yina. Na nsuka, bo nangula maboko na zulu bonso bibaka ke kuma nda, bo tuba verse mbala zole diaka.

Bankunga ya kwenda nzila mosi ti leso :

Mono Me Sila Kulanda Yesu
Mo' Ta Nwana Sambu na Yesu

✝ **Invitation sambu na bo ya me yamba Yesu ntete ve :**

Keti nge kele mwana ya Nzambi ? Bible ke tuba nde na ntuala beto balulaka ntima na Yesu, beto

yonso vandaka bambeni ya Nzambi (Roma 5 :10). Yai kele makambu ya nene—Nzambi kuvanda mbeni na nge, ti nge kuvanda mbeni na Yandi !

Beto me kuma bambeni ya Nzambi sambu beto me fwa bansiku na Yandi. Yandi zola masonga, ti Yandi me tuba nde, « Beno tuba luvunu ve. » Beto me tuba kaka luvunu. O, kimbeni ti Yandi !

Kansi na luzolo ya nene ya Nzambi, Yandi me tinda Mwana na Yandi ya kitoko Yesu Kristo awa na nsi-ntoto. Nzambi me zenga beto ndola ya lufwa sambu na masumu na beto. Kansi Yesu fwaka na sika na beto. Yandi bakaka masumu yonso na beto na zulu ya kulunsi.

Yandi me bikala ve na maziamu. Yandi telamaka na lufwa. Ntangu yai, Nzambi lenda lolula konso muntu ya zola bika masumu ti tula Yandi ntima.

Keti nge me yamba Yandi, to keti nge me bikaka mbeni ya Nzambi ? Kana bubu nge me yilama na ntima kubika nzila ya masumu ti kulanda Yesu Kristo, nge lenda binga zina na Yandi. Yandi ta vanda na kiese kugulusa nge, ti kupesa nge moyo ya mpa.

Kana nge zaba Yandi dezia, kiese sambu nge kele mukristo, mwana ya Nzambi. Mono kwikila nde nge ke samba sambu na banduku ti bampangi yonso, nde bo mpi kuyamba Yandi.

NSUKA YA LESO 10

 Kana nge me manisa leso ti ntangu ke lunga, konso mposho nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.

Leso 10

Bambeni
vandaka
kuseka
Bayuda
na kisalu
ya
kutunga
diaka
bibaka ya
bwala.



**« Nzambi ya zulu ta bongisa
mambu na beto.**

Beto kele bantu na Yandi.

Beto tunga bwala...»

Nehemia 2 :20

Leso 11. Makanda yonso sadisaka kutunga diaka, konso dikanda kitini na bo.

Leso ke monika na Nehemia 3

I. PREPARASIO SAMBU NA MONITEUR-

🎯 Kikuma ya Leso :

Bana ta longuka kusala na kimvuka, sambu na kimvuka bo lenda sala mambu ya kuluta nene.

♥ Verse ya Kulonguka :

Bantu zole lenda nwana bitumba yina lenda bedisa muntu mosi. Nsinga ya bo me sala na bansinga tatu, yo kele mpasi kuzenga yo. Longi 4 :12

👤 Bankunga ya kwenda nzila mosi ti leso :

Kusala mbote na Kimvuka
Nsinga ya Bansinga Tatu

II. REVISIO

👤 Kuyindula diaka baleso me luta :

Beto me mona nde Nehemia me kwisa na Yeruzalemi. Nzo-Nzambi, bo me manisa yo dezia, kansi bibaka ya vandaka kukeba bwala, yo me bikala ya kufwa. Nehemia talaka kisalulu ti yandi sambaka Nzambi. Ebuna yandi yidikaka lukanu. Yandi tubaka na bampangi nde : “Beto tungeno,” ti bo ndimaka kusadisa yandi. Ata bambeni yangisaka bo, bo kwendaka na ntwala.

III. KULONGA LESO YAI

➔ Kuyantika :

Bantu ya Israele me ndima kusala kisalulu ya nene. Nki mutindu bo ta sala yo ?

🏠 Malongi ya nene ya leso yai (developpement) na banti ya malongi 4 :

11.1 Nehemia zengaka kisalulu na bitini. Yandi pesaka kitini mosi na banganga-Nzambi ti konso bwala ti konso dikanda. Bantu ya konso bwala tungaka kitini na bo. Nehemia 3 :1-32

📖 **Liste ya ke songa kitini ya kisalulu ya konso dikanda kele nda, kansi tangila bana bandambu yai bonso mbandu :**

1 Yai kele mutindu bo tungaka diaka lupangu ya Yeruzalemi. Banganga Nzambi tungaka diaka Kielo ya Mameme...

2 Bantu ya bwala Yeriko tungaka ndambu. Zakure tungaka ndambu ya landaka yo.

3 Bana ya Asena tungaka Kielo ya Bambisi ya masa...etc.

? Yula bana

🏠 **Bana sala bageste to mwa-senete**

👤 **Bana yimba ti kina**

11.2 Ntangu bambeni monaka kisalulu yina, bo fingaka bantu ya Israele.

📖 **Tangila bana : Nehemia 3 :33-35**

33 Ntangu Sanebalati waka nde beto Bayuda vandaka kutunga diaka bibaka ya lupangu ya Yeruzalemi, yandi waka makasi. Yandi yantikaka kufinga beto.

34 Yandi nde : « Bayuda yai ya mpamba-mpamba, nki bo ke yindula kusala ? Bo ke yindula kutunga diaka bwala yai ? ...Keti bo lenda tunga diaka na matadi ya kele na nsi ya putulu ya ntoto? Matadi ya tiya me yokaka, ya bo ke baka na bisika ya bibaka kubwaka ?

35 Tobia telamaka penepene na yandi, ebuna yandi tubaka nde : « Kibaka ya nki mutindu bo ke yindula kutunga ? Ata mukengi nkutu lenda bwisa yo ! »

? Yula bana

🏠 **Bana sala bageste to mwa-senete**

👤 **Bana yimba ti kina**

11.3 Nki mvutu Nehemia pesaka bambeni ? Kaka lombilu.

📖 **Tangila bana : Nehemia 3 :36-37**

36 Mono Nehemia sambaka Nzambi nde : “Nzambi, wa mutindu bo ke seka beto...

37 Kuvila ve mbi ya bo ke sala, kufinga beto bantu ke tunga.”

? Yula bana

🏠 **Bana sala bageste to mwa-senete**

Bana yimba ti kina

11.4 Kibaka kumaka ndaa sambu bantu tulaka ngolo na ksalu.

 **Tangila bana :** Nehemia 3 :38

38 Yo yina, beto tungaka kaka bibaka ya Yeruzalemi. Ebuna nswalu yo kumaka mwanda, sambu bantu vandaka kutula ngolo na ksalu.

? Yula bana

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Kisalu ya kutunga bibaka ya bwala lutaka ngolo ya muntu mosi to dikanda mosi. Nzambi pesaka Nehemia mayele kukabisa yo na bitini, ebuna kupesa konso dikanda ndambu na ksalu yina. Bo tungaka na ordre ti na kiese, konso dikanda na sika na bo. Yo yina, bibaka kumaka ndaa. Kisalu ya nene ke lomba nde bantu sala yo na kimvuka.



Devoir sambu na bakristo :

Nge mukristo, keti nge ke na kiese kusala na kimvuka ? Kana bantu manisa ksalu ya kimvuka, bo tuba ve nde “Mono me sala,” kansi bo tuba nde “Beto me sala.” Kiese kele nde, na kimvuka bantu lenda sala ksalu ya nene. Nki bisalu na bwala na nge to na dibundu na nge, to na fami na nge ke lomba nde bantu sala na kivuka ? Ketu nge ta sala kitini na nge na kiese ?

Verse ya Kulunguka :

Bana tuba verse mbala 2 fraze na fraze na nima ya nge, moniteur. Na nima, bana sala bimbuka ya bana tatu-tatu. Bo simba maboko ti tuba yo diaka mbala zole. Bo kabana ti sala bimbuka ya nkaka tatu-tatu kutuba yo mbala zole ya nsuka.

Bankunga ya kwenda nzila mosi ti leso :

Kusala mbote na Kimvuka
Nsinga ya Bansinga Tatu

Invitation sambu na bo ya me yamba Yesu ntete ve :

Kima mosi bo lenda sala ve na kimvuka. Yina kele kubalula ntima, kuyamba Yesu Kristo. Yesu fwaka Yandi mosi sambu na kufuta mfuka ya masumu na nge. Yandi telamaka Yandi mosi na lufwa.

Nge mpi fweti balula ntima nge mosi. Nge fweti zenga kana nge ta bika nzila ya masumu ti landa Yesu to ve.

Lumbu mosi nge mosi ta telama na ntuala ya Nzambi. Nzambi ta yula nge ve kana tata landaka Yesu, to nduku landaka Yesu. Yandi ta zaba kana nge mosi landaka Yandi. Ketu nge me zenga mambu yina ?


NSUKA YA LESO 11



Kana nge me manisa leso ti ntangu ke lunga, konso mposi nge lenda baka kitini ya ntangu kulunga mikanda ya Bible ndambu-ndambu. Tala nsuka ya mukanda yai sambu na bangindu.

Leso 11

Bayuda
manisaka
kisalu ya
kutunga
bibaka ya
bwala,
sambu
bo salaka
na
kimvuka.



**Bantu zole lenda nwana
bitumba yina lenda bedisa
muntu mosi.**

**Nsinga ya bo me sala na
bansinga tatu,
yo kele mpasi kuzenga yo.**

Longi 4 :12

Leso 12. Ata bambeni yangisaka Bayuda, bo salaka atasio konso ntangu.

Leso ke monika na Nehemia 4

I. PREPARASIO SAMBU NA MONITEUR-

☉ Kikuma ya Leso :

Bana ta bakisa nde mbeni ya Nzambi Satana fweti nwanisa bantu ya Nzambi. Yo yina, ata konso mambu kubwa, bo ta vutuka na nima ve, kansi bo ta kanga ntima.

♥ Verse ya Kulonguka :

Beno fweti kudiya. Beno fweti kangula meso, sambu mbeni na beno Satana ke kwenda kuzieta bonso ntambu yina ke dila. Yandi ke sosa muntu ya kudia. 1 Piere 5 :8

👤 Bankunga ya kwenda nzila mosi ti leso :

Kana Satana Kwisu
Mono Kele na Nzo Kitoko
(Verse-Makabu kele kana beto Kanga Ntima)

II. REVISIO

† Kuyindula diaka baleso me luta :

Beto kele kulanda Nehemia ti Bayuda ya me vutuka na Yeruzalemi na nima ya bamvula 70 na nsi ya ntama. Bo vandaka kutunga diaka bibaka ya lupangu ya bwala. Kana bo manisa yo, bambeni ta mona mpasi kukota bwala yina, kusala mbi na bo. Yo yina, bambeni yina vandaka kuyangisa bo. Bana, keti beno bambuka bazina ya bambeni zole ?
(Sanabalati ti Tobia)

III. KULONGA LESO YAI

➔ Kuyantika :

Keti muntu me yangisa nge to seka nge ? Yina ke pesa kiese ve. Kansi bubuyai beto ke mona mpila bantu vandaka kuyangisa mpi kuseka Bayuda ntangu bo zolaka kutunga diaka bibaka ya Yeruzalemi.

🏠 Malongi ya nene ya leso yai (developpement) na banti ya malongi 4 :

12.1 Bambeni monaka kisalu ya Bayuda vandaka kusala, ebuna bo kwisaka kunwanisa bo.

📖 Tangila bana : Nehemia 4 :1-2

1 Sanabalati ti Tobia ti bantu ya bansi ya nkaka penepene, ntangu bo waka nde beto vandaka kutula ngolo kutunga diaka lupangu ya Yeruzalemi ti kukangisa mabulu ya bibaka, bo waka makasi mingi.

2 Ebuna bo yonso wakanaka kukwisa kunwanisa Yeruzalemi ti kutula mavanga.

? Yula bana

🏠 Bana sala bageste to mwa-senete

👤 Bana yimba ti kina

12.2 Bayuda vutulaka kaka lombilu, bankunga, ti kisalu.

📖 Tangila bana : Nehemia 4 :3-4

3 Kansi beto sambaka Nzambi na beto. Beto tulaka bantu sambu na kutalaka bambeni yina mpimpa ti mwini.

4 Beto vandaka kuyimba nde : “Beto me lembe. Nki mutindu beto lenda tunga bubu yai ?”
(Nkunga mbala ya nkaka kupesa bambeni ngindu nde ntama ve bo ta bika kisalu, kansi bo bikisaka yo ve.)

? Yula bana

🏠 Bana sala bageste to mwa-senete

👤 Bana yimba ti kina

12.3 Bambeni kwisaka na kinsweki sambu na kufwa Bayuda, kansi Bayuda ya nkaka songaka lukanu ya mbi na bo.

📖 Tangila bana : Nehemia 4 :5-6

5 Bambeni na beto yindulaka nde beto ta mona bo ve, beto ta zaba ve nde bo ke kwisa sambu na kufwa beto...

6 Kansi Bayuda yina zingaka na kati ya bambeni yina, bo kwisaka konso ntangu kusonga beto bangindu ya mbi ya bambeni sambu na beto.

? **Yula bana**

 **Bana sala bageste to mwa-senete**

 **Bana yimba ti kina**

12.4 Bayuda bakaka bambele ya bitumba, ti bo salaka atasio konso ntangu.

 **Tangila bana : Nehemia 4 :7-16**

7-8 Yo yina, mono pesaka bantu bambele ya bitumba. Mono tubaka na bambuta : “Tina bambeni boma ve. Yindula nene ya Mfumu Nzambi. Nwana sambu na bampangi na beno, bana na beno, bankento na beno...

9 Bambeni monaka nde Nzambi me fwa bangindu na bo. Ebuna beto yonso vutukaka kusala lupangu.

10 Katuka kilumbu yina, ndambu ya bantu salaka kisalu, ti ndambu ya nkaka telamaka kukengila lupangu...

11 Konso muntu yina nataka bima ya kutungila lupangu, yandi simbaka na diboko mosi bima ya kutungila lupangu, diboko ya nkaka bunduki....

? **Yula bana**

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Bayuda ya vandaka kutunga bibaka ya lupangu, bo salaka atasio mingi sambu na bambeni ya zolaka kukanga kisalu na bo. Bo vandaka konso ntangu ya kuyilama kunwana kana mfunu monikaka. Bo kangaka ntima. Bo bikisaka kisalu ve, ata bambeni yangisaka bo ngolo.

Beto bakristo kele na mbeni mpi. Mbeni yai Satana, mbeni ya Nzambi. Yandi zola ve beto sadila Mfumu Yesu. Yandi zola kukanga beto na masumu sambu beto nata nsoni na Mfumu na beto.

Bible ke tuba nde beto bakristo mpi kusala atasio. Beto pesa Satana nzila ve kukanga beto na mutambu na yandi.

 **Devoir sambu na bakristo :**

Mwana mukristo, yindula nki mutindu Satana me kanga nge na ntangu me luta. Baka mayele sambu yandi kanga nge diaka ve mutindu yina. Lomba Nzambi mposi yai nde Yandi pesa nge ngolo kubuya yandi.

♥ **Verse ya Kulonguka :**

Bana tuba verse mbala 2 fraze na fraze na nima ya nge, moniteur. Bo kangula maboko bonso munoko ya ntambu, bo tuba yo mbala zole diaka. Bo tambula bonso ntambu ke sosa madia, bo tuba yo mbala 2 ya nsuka.

 **Bankunga ya kwenda nzila mosi ti leso :**

Kana Satana Kwisa

Mono Kele na Nzo Kitoko (Verse-Makabu kele kana beto Kanga Ntima)

 **Invitation sambu na bo ya me yamba Yesu ntete ve :**

Na ntwala beto balulaka ntima na Yesu, beto yonso vandaka kuzinga na Kimfumu ya Satana, na nsi ya luyalu na yandi (Efeso 2 :1-2). Ntangu muntu balula ntima, Nzambi katula yandi na kimfumu ya Satan ti kitulaka yandi mwana na Yandi.

Kana nge me yamba ntete ve Yesu, sambu na nki nge me bikala na Kimfumu ya Satana?

Nge fweti bikala kuna ve. Kana nge ta ndima mbi ya nge me sala, balula ntima ti tula kivuvu na nge yonso na Yesu, Yandi ta katula nge na kimfumu yina ya mbi. Yandi ta pesa nge ntima ya mpa, ntima ya zola kupesa Yandi kiese. Kana nge me binga Yandi ntete ve sambu nge balula ntima, nki ke kanga nge nzila kubinga Yandi bubuyai ?

NSUKA YA LESO 12

 Kana nge me manisa leso ti ntangu ke lunga, konso mposi nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.

Leso 12

Ata
bambeni
yangisaka
bo,
Bayuda
landaka
kaka
kusala
kisalu ya
Nzambi
me songa
bo.



Beno fweti kudiya.

**Beno fweti kangula meso na
beno, sambu mbeni na beno
Satana ke kwendaka kuzieta
bonso ntambu yina ke dila.**

Yandi ke sosa muntu ya kudia.

1 Piere 5 :8

Leso 13. Bayuda landaka kutunga, tii bo manisaka kisalu, ata bambeni sosaka bampila ya nkaka kukanga yo.

Leso me monika na Nehemia 6

I. PREPARASIO SAMBU NA MONITEUR-

☉ Kikuma ya Leso :

Bana ta tina bambeni ve na boma, kansi bo ta tula bo na maboko ya Nzambi, ebuna bo ta landa kisalu ya Nzambi.

♥ Verse ya Kulonguka :

Nzambi kele kisika ya beto ke tininaka. Kele Yandi ke pesaka beto ngolo. Yandi kele sikamosi ti beto sambu na kusadisa beto na ntangu ya mpasi. Yo yina, beto lenda wa boma ve. Bankunga 46 :1,2a

👤 Nkunga ya kwenda nzila mosi ti leso :

Kwenda na Yesu

II. REVISIO

† Kuyindula diaka baleso me luta :

Nehemia vandaka kutwadisa bantu ya Nzambi kutunga diaka bibaka ya lupangu ya bwala Yeruzalemi. Yo vandaka kisalu Nzambi me songa yandi kusala. Keti yandi salaka yo na ngemba, kukonda bambeni kunwanisa yandi ? (Ikele ve. Bambeni vandaka kuyangisa bo konso ntangu, bantwadisi na bo Sanebalati ti Tobia.)

III. KULONGA LESO YAI

➔ Kuyantika :

Kuyangisa yina, yo sukaka ve. Sanebalati ti Tobia vandaka kaka kupesa Bayuda mpasi.

🏠 Malongi ya nene ya leso yai (developpement) na banti ya malongi 4 :

13.1 Bambeni landaka kaka kusosa mpila kusala Nehemia ti Bayuda mbi, kansi Nzambi pesaka bo mayele na mpila nde bo kangamaka ve na ntambu ya bambeni.

📖 **Tangila bana :** Nehemia 6 :1-4
(Nehemia ke tuba :) 1 Sanebalati, Tobia...ti

bambeni na beto ya nkaka waka nde beto me manisa kutunga diaka lupangu ya Yeruzalemi, kansi beto vandaka me tula bakielo ntete ve.

2 Yo yina, bo tindaka mono ndinga nde mono kwenda kukutana na bo na bwala mosi na nseke. Yina mayele na bo kusala mono mbi.

3 Mono tindilaka bo ndinga nde : “Mono ke sala kisalu mosi ya mfunu. Mono lenda kwisa kuna ve...”

4 Bo tindaka mono ndinga mbala iya, kansi na konso mbala mono pesaka bo mvutu kiteso mosi.

? Yula bana

🏠 Bana sala bageste to mwa-senete

👤 Bana yimba ti kina

13.2 Bambeni kusaka luvunu, kansi Nehemia vutudilaka bo na mayele, na kikesa, ti na bisambu.

📖 **Tangila bana :** Nehemia 6 :5-9

5-6 Ebuna Sanebalati tindaka mono ndinga mbala ya tanu kutuba nde : “Geshemi me songa mono nde beno Bayuda ke zola kusala mubulu. Nge zola kuditula mfumu nge mosi.

7 Ebuna sesepi yai fioti kubika, Mfumu ya nene Arta ta wa mambu yai...

8 Mono vutulaka nde : « Mambu yonso ya nge ke tuba kele kaka luvunu. Nge mosi muntu me yindula yo ! »

9 Bo yonso, bo mekaka kupesa beto boma sambu kisalu kufwa. Kansi mono sambaka Nzambi nde : “Pesa mono ngolo. »

? Yula bana

🏠 Bana sala bageste to mwa-senete

👤 Bana yimba ti kina

13.3 Bambeni tindaka ndinga ya boma, kansi Nehemia tinaka ve. Yandi sambaka Nzambi kaka.

📖 **Tangila bana :** Nehemia 6 :10-14

10 Muntu mosi tubaka na mono nde : « Beto ti fweti bumbana na Nzo-Nzambi. Beto ta kanga bakielo, sambu bo ke zola kwisa kufwa nge na mpimpa. »

11 Mono tubaka nde : « ...mono fweti tina ?...Mono ke kwenda ve. »

12-14 Ntangu mono yindulaka mambu yina, mono monaka nde Nzambi me songa yandi ve, kansi Tobia ti Sanebalati bantu me futa yandi na kupesa mono malongi yina kaka kupesa mona boma. Kansi mono sambaka diaka Nzambi nde : “Nzambi, yindula mambu ya mbi ya Tabia ti Sanebalati me sala...

? **Yula bana**

 **Bana sala bageste to mwa-senete**

 **Bana yimba ti kina**

13.4 Bayuda tinaka bambeni boma ve, kansi bo landaka kusala tii ntangu kisalu me mana.

 **Tangila bana : Nehemia 6 :15-16**

15 Na nima ya bilumbu 52 ya kisalu, lupangu manaka...

16 Ntangu bambeni waka mambu yina, bo zabaka nde bo me bela. Konso muntu zabaka nde beto me sala kisalu yai na ngolo ya Nzambi.

? **Yula bana**

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Ata bambeni yangisaka bo konso ntangu mutindu na mutindu, Bayuda bikisaka ve kisalu ya kutunga diaka bibaka ya lupangu ya bwala. Yo yina, bo mpi manisaka kisalu yina yonso. Ata bambeni yangisaka bo, bo bakisaka nde bo me manisa yo na ngolo ya Nzambi.

Beto mpi, beto landa kusala yina ya Nzambi me pesa beto. Beto kuwa ve boma sambu na bambeni. Ebuna beto mpi ta nunga kusala yina ya Nzambi ke zola.

Devoir sambu na bakristo :

Nani ke seka nge sambu nge ke landa Yesu ? Pesa nzila ve nde yandi kupesa nge boma to dekurazema. Samba Nzambi, ti landa kaka kusala yina ke pesa Nzambi kiese. Na nsuka, Nzambi ta nungisa nge.

Verse ya Kulonguka :

Bana tuba verse mbala 2 fraze na fraze na nima ya nge, moniteur. Bo yika bageste ti tuba yo mbala 2 diaka. Na nsuka, bo telama na kikesa ti tuba yo mbala 2 na ndinga mosi ya ngolo.

Nkunga ya kwenda nzila mosi ti leso :

Kwenda na Yesu

Invitation sambu na bo ya me yamba Yesu ntete ve :


Nzambi ta pesa nge kisalu kaka kana nge kele mwana na Yandi. Na ntuala kuyamba Yesu, beto yonso kele bambeni ya Nzambi. Nzambi kele na makambu ti beto sambu beto me sala mbi mingi. Beto me landa bansiku na Yandi ve.

Nsiku ya ntete kele nde beto zola Yandi na ntima na beto yonso. Kansi bilumbu ikwa nge me zinga ya nge yindulaka Yandi ve ? O, mpila beto me tula Yandi na nima, yo kele masumu ya nene na meso na Yandi ! Beto mpi me sala mbi na bampangi. Beto me nwana ti bo, me tuba luvunu na bo, me konda kuzola bo na mpila ya Nzambi ke zola. Ee, beto kele banka-masumu. Kana beto telama na ntuala ya Nzambi sambu Yandi zuze beto, beto fweti beba kaka.

Kansi Nzambi zolaka beto bantu ya masumu. Yo yina, Yandi tindaka Mwana na Yandi Yesu Kristo sambu na kugulusa beto. Yesu fwaka na sika na beto, ti Yandi telamaka na lufwa. Konso muntu ya kwikila yo ti tula ntima na Yesu, Nzambi ta gulusa yandi. Keti nge ta yamba Yandi bubu sambu nge kuma nduku ya Nzambi ti mwana na Yandi ?

NSUKA YA LESO 13

 Kana nge me manisa leso ti ntangu ke lunga, konso mposho nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.



Leso 13

Bayuda
manisaka
kutunga
lupangu
ya
Yeruzalemi.

**Nzambi kele kisika ya beto ke
tininaka. Kele Yandi ke pesaka
beto ngolo. Yandi kele sikamosi ti
beto sambu na kusadisa beto na
ntangu ya mpasi.**

Yo yina, beto lenda wa boma ve.

Bankunga 46 :1,2a

Leso 14. Bayuda tangaka Ndinga ya Nzambi yonso, ti bo waka mbote.

Leso ke monika na Nehemia 8 :1-8

I. PREPARASIO SAMBU NA MONITEUR-

Kuyidika na Ntwala :

Vanda na Bible na diboko na ndinga ya bana ke zaba.

🎯 Kikuma ya Leso :

Bana ta kuwa ndinga ya Nzambi ti ntendula na yo.
Bo ta wila yo kuluta na luzingu na bo.

♥ Verse ya Kulonguka :

...Yesu nde : « ...Kiese na bantu yina ke waka
Ndinga ya Nzambi ti ke landaka yo !” Luka 11 :28

🔊 Bankunga ya kwenda nzila mosi ti leso :

BI-BI-LA !
Kuwa Bible

II. REVISIO

† Kuyindula diaka baleso me luta :

Beto me mona nde Bayuda salaka bamvula 70 bampika na Babilonia. Yai vandaka ndola sambu bo vilaka Nzambi mingi. Na nsuka ya bamvula yina, Esdrasi vutukaka na Yeruzalemi na ndambu ya Bayuda. Bo tungaka ntete mesa-kimenga sambu na kupesa Nzambi makabu. Na nima, bo tungaka Nzo-Nzambi. Kansi bibaka ya bwala vandaka me bikala kaka ya kubwa. Ntangu Nehemia waka mambu yina, mfumu pesaka yandi nzila, ebuna yandi mpi vutukaka na Yeruzalemi na Bayuda ya nkaka. Bo tungaka diaka lupangu ya bwala ya me bwa. Bambeni yangisaka bo na mabanza kukanga bo nzila, kansi bo landaka tii ntangu lupangu yonso me telama diaka.

III. KULONGA LESO YAI

➔ Kuyantika :

Nge banza nde nki vandaka mambu ya ntete ya bo salaka na nima ya kumanisa lupangu ya bwala ?
Beto ta mona yo bubuyai.

🏠 Malongi ya nene ya leso yai (developpement) na banti ya malongi 4 :

14 :1-2 Bantu yonso kutanaka. Bo lombaka Esdrasi kutangila bo mukanda ya Bansiku ya Nzambi.

📖 Tangila bana : Nehemia 8 :1-2

1-2 ...Bantu yonso kwisaka kukutana kisika mosi na Yeruzalemi... Bo songaka Esdrasi kukwenda sosa Mukanda ya Bansiku. Ebuna Esdrasi kwisaka kunata yo...

? Yula bana

🏠 Bana sala bageste to mwa-senete

🔊 Bana yimba ti kina

14.2 Esdrasi tangaka ti tendulaka ndinga ya Nzambi lumbu mosi ya mvimba, ti bantu waka mbote.

📖 Tangila bana : Nehemia 8 :3-4

3 Yandi tangilaka bo mukanda ya Bansiku katuka suka tii midi. Bo yonso kangulaka makutu na kuwa mbote-mbote.

4 Esdrasi vandaka kutanga ya kutelama na zulu ya mabaya ya bo yidikaka. Bantwadisi vandaka me telama na diboko na yandi ya kibakala ti ya kinkento...

? Yula bana

🏠 Bana sala bageste to mwa-senete

🔊 Bana yimba ti kina

14.3 Bantu zitisaka ndinga ya Nzambi ti ndimaka yo.

📖 Tangila bana : Nehemia 8 :5-6

5 Esdrasi vandaka kutanga ya kutelama na zulu ya mabaya ya bo me yidikaka sambu na kilumbu yina. Bo yonso vandaka kutala yandi. Ntangu yandi kangulaka mukanda, bo yonso telamaka.

6 Esdrasi tubaka nde : “Beno kumisa Mfumu Nzambi, Nzambi ya nene !” Bantu yonso tedimisaka maboko na bo na zulu ti bokaka nde : “Amen ! Amen !” Na nima, bo fukamaka ilungi na ntoto kusamba Mfumu Nzambi.

? Yula bana

🏠 Bana sala bageste to mwa-senete

Bana yimba ti kina

14.4 Bana ya Levi sadisaka kutendula ndinga ya Nzambi mbote-mbote sambu bantu bakisa yo.

 **Tangila bana :** Nehemia 8 :7-8

7 Bo telamaka na bisika na bo, ebuna bantu ya dikanda ya Levi yantikaka kutendudila bo Bansiku...

8 Bo vandaka kubalula Bansiku ya Nzambi na ndinga ya bwala ti kutendula yo mbote-mbote, na mpila nde bantu yonso bakisa yo.

Yula bana

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Kima ya ntete Bayuda salaka na nima bo manisaka kutunga bibaka ya lupangu ya bwala Yeruzalemi, kulomba nde Esdrasi tangila bo ti tendudila bo ndinga ya Nzambi, Mikanda ya Moize. Mbote nde beto bubuyai mpi vanda na nzala na kuwa ti na kubakisa Ndinga ya Nzambi. *[Moniteur, songa Bible na nge.]*

Devoir sambu na bakristo :

Mwana mukristo, keti nge me wa ndinga ya Nzambi na mposho me luta ? Kana Bible kele, nge lenda tanga ndambu na yo, to muntu ya nkaka lenda tangila nge. Mbala ya nkaka, kaka kitini ya Bible ikele. Keti nge kele kutanga yo ? Keti nge kele kuwa ndinga ya Nzambi na radio ? Na kati ya Nzo-Nzambi ? Beto bakristo samba Nzambi nde Yandi pesa beto nzala ya kuluta na kuwa Ndinga ya Nzambi.

Verse ya Kulonguka :

Bana tuba verse mbala 2 fraze na fraze na nima ya nge, moniteur. Na nima, bo tula diboko na dikutu mosi, bo tuba yo, na dikutu ya nkaka, bo tuba yo diaka. Na nsuka, bo tula maboko na makutu yonso zole, bo tuba yo na ndinga ya pima ti na ndinga ya ngolo.

Bankunga ya kwenda nzila mosi ti leso :

BI-BI-LA !

Kuwa Bible

Invitation sambu na bo ya me yamba Yesu ntete ve :

Kana nge zola ve kuwa ndinga ya Nzambi, to kana nge kuwa yo, kansi nge landa yo ve, mbote kudiya keti ya kieleka nge zaba Yesu Kristo. Ketu Nzambi me pesa nge ntima ya mpa ya zola ti sosa mambu na Yandi ?

Kana nge zaba ve nde Yesu me changer ntima ti luzingu na nge, Yandi ke binga nge bubuyai kubalula ntima ti kukwikila Yandi. Yesu kele Mwana ya Nzambi. Yandi lenda changer ntima na nge. Yandi fwaka na zulu ya kulunsi sambu na kupesa nge moyo ya mpa. Yandi telamaka na lufwa. Ketu nge ta tuba « Ee » na Yandi bubuyai ?


NSUKA YA LESO 14

 Kana nge me manisala leso ti ntangu ke lunga, konso mposho nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.

Leso

14

Esdrasi
tangilaka
bo Ndinga
ya Nzambi
ti
tendudilaka
bo yo.



...Yesu nde :

**« ...Kiese na bantu yina
ke waka Ndinga ya
Nzambi
ti ke landaka yo ! »**

Luka 11 :28

Leso 15. Ntangu Bayuda waka Ndinga ya Nzambi, bo bakisaka masumu na bo ti balulaka ntima kulanda nzila ya Nzambi.

Leso ke monika na Nehemia 8 :9, 9 :1--10 :29

🕒 Kikuma ya Leso :

Bana ta kuwa ndinga ya Nzambi mpamba ve, kansi bo ta tula ngolo mpi kulanda yo.

♥ Verse ya Kulonguka :

(Yesu :) « Kana beno ke zola Mono, beno ta landa bansiku na Mono. ” Yoane 14 :15

🗨 Bankunga ya kwenda nzila mosi ti leso :

Beto Me Wa
Kana Beno Ke Zolaka Mono

II. REVISIO

† Kuyindula diaka baleso me luta :

Na nima Nehemia ti Bayuda manisaka kisalu ya kutunga diaka lupangu ya bwala, bo salaka nki ? (Bo lombaka Esdrasi kutangila bo ndinga ya Nzambi.)

Esdrasi tangilaka bo ndinga ya Nzambi, ti yandi salaka nki ya nkaka ? (Yandi balulaka yo na ndinga na bwala ti tendudilaka bo disongidila na yo.)

III. KULONGA LESO YAI

➔ Kuyantika :

Keti beno banza nde ntangu Bayuda waka ndinga ya Nzambi, bo monaka bonso bo me lemfuka na yo mbote ? Kuwa nki Bible ta songa beto.

🏠 Malongi ya nene ya leso yai (developpement) na banti ya malongi 4 :

15.1 Bu bantu waka ndinga ya Nzambi, bo waka mawa sambu bo bakisaka nde bo me landa yo ve.

📖 **Tangila bana :** Nehemia 8 :9

8 :9 *Ntangu bantu waka mambu ya Bansiku vandaka kutuba, yo yantikaka kudila...*

? Yula bana

🏠 **Bana sala bageste to mwa-senete**

🗨 **Bana yimba ti kina**

15.2 Bantu buyaka kudia sambu bo lomba pardo ya masumu na bo.

📖 **Tangila bana :** Nehemia 9 :1-3

9 :1 *Bantu ya Israele kwisaka kisika mosi na kubuya kudia ti kusonga mawa sambu na masumu na bo.*

2 *Bo telamaka, bo yantikaka kundima masumu na bo ti ya bankaka na bo.*

3 *Balere tatu ya mvimba bo tangilaka bo Bansiku ya Mfumu Nzambi, ebuna na balere tatu ya nkaka, bantu vandaka kundima masumu na bo. Bo vandaka kusamba Mfumu Nzambi.*

? Yula bana

🏠 **Bana sala bageste to mwa-senete**

🗨 **Bana yimba ti kina**

15.3 Bo bambukaka mambote ya Nzambi ti mbi ya bambuta na bo.

📖 **Tangila bana :** Nehemia 9 :16-18

[*Bo tangaka mambote ya Nzambi ti bampila Yandi me sadisa bo, ebuna bo tubaka nde :*]

16-17 *Kansi bankaka na beto kumaka lulendo ti ntu-ngolo. Bo buyaka kulemfuka na bansiku na Nge. Bo buyaka kulemfuka. Bo vilaka mambote yonso ya Nge salaka bo.*

18 *Bo salaka kiteke ya kifwanisu ya ngombe. Bo tubaka nde : “Yai kele Nzambi ya basisaka beto na Ezipte !” Bo fingaka Nge mpenza !*

? Yula bana

🏠 **Bana sala bageste to mwa-senete**

🗨 **Bana yimba ti kina**

15.4 Bo wakanaka nde yantika lumbu yina, bo ta landa Bansiku ya Nzambi.

📖 **Tangila bana :** Nehemia 10 :1, 40c

10 :1 *Sambu na mambu yai yonso ya kubwaka, beto bantu ya Israele wakanaka nde beto ta*

landa bansiku ya Nzambi. Kuwakana yango, beto sonikaka yo na mukanda.

*[Bantwadisi tulaka diboko na mukanda yina.
Bo tangaka bansiku ya bo fweti lemfuka, ebuna
bo sukisaka na yai :]
40c « Beto lenda vila ve nzo ya Nzambi na
beto. »*

? Yula bana

🏠 Bana sala bageste to mwa-senete

👤 Bana yimba ti kina

>|< Kumanisa Malongi :

Ntangu Bayuda waka Bansiku ya Nzambi, bo bakisaka nswalu nde bo me sala mbi mingi na meso na Yandi. Bo kwendaka nswalu kundima masumu na bo ti kulomba Nzambi pardo.

♥ Verse ya Kulonguka :

Bana tuba verse mbala 2 fraze na fraze na nima ya nge, moniteur. Na nima, bo yimba yo mbala 4 na nkunga, “Kana Beno Ke Zolaka Mono”.

👤 Bankunga ya kwenda nzila mosi ti leso :

Beto Me Wa

👤 Devoir sambu na bakristo :

Bana bakristo, ntangu nge kuwa ndinga ya Nzambi, keti nge kuwa yo na nzala ya kulemfuka na yo ? Kana nge mona nde nge me lemfuka na yo ve, keti nge kwenda nswalu kundima yo ti kulomba Nzambi pardo ?

✝ Invitation sambu na bo ya me yamba Yesu ntete ve :

Beto yonso me fwa bansiku ya Nzambi. Bible ke tuba nde “Bansiku vandaka bonso longi sambu na kunatila beto na Yesu Kristo” (Galatia 3 :24). Kana beto tala Bansiku ya Nzambi, beto zaba kaka nde beto me fwa yo. Beto bakisa masumu na beto. Beto ta bakisa nde beto kele na mfunu ya Mvulusi.

Keti nge me bakisa nde nge me fwa bansiku ya Nzambi ? Bible ke tuba nde nsuka ya masumu kele lufwa ya kimpeve (Roma 3 :23). Yai kele nsangu mosi ya mpasi.

Kansi nsangu ya kiese kele nde Yesu fwaka na sika ya beto, bantu ya masumu. Ndola ya lufwa,

Nzambi pesaka Yandi, ata Yandi me sala kima ve ya mbi.

Nsangu ya kiese kele nde Yesu me bikala ve na lufwa, kansi Yandi telamaka na lufwa. Yandi kele na moyo bubu yai. Yandi lenda kuwa konso muntu yina ta binga zina na Yandi.

Kana nge me balula ntima na Yandi ntete ve, zaba nde bubuyai, Nzambi zola gulusa nge. Kana nge kwikila nsangu yai, kana nge me yilama kubika nzila ya masumu ti kukota nzila na Yandi, nge lenda binga zina na Yandi. Songa Yandi masumu na nge, ti tula kivuvu na Yandi. Yandi lenda gulusa nge bubuyai.

NSUKA YA LESO 15

📖 Kana nge me manisa leso ti ntangu ke lunga, konso mposho nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.

Leso 15

Ntangu
bantu
waka
Esdrasi
tanga
ndinga
ya
Nzambi,
bo dilaka
na
mawa.
Bo
bakisaka
nde bo
me landa
yo ve.



(Yesu nde :)

« Kana beno ke zola

Mono,

beno ta landa bansiku na

Mono.”

Yoane 14 :15

Leso 16. Bayuda ya nkaka bikalaka na Persia, na kati na bo Estere, yina kumaka Nkento ya Mfumu.

Leso ke monika na Estere kapu 1, 2

I. PREPARASIO SAMBU NA MONITEUR-

🕒 Kikuma ya Leso :

Bana ta bambuka nde beto bakristo kele bantu ya Nzambi na konso sika beto ikele. Yo yina, bo ta sosa kuzinga bonso bana ya Nzambi konso ntangu.

♥ Verse ya Kulonguka :

Mambu ya mono ke songa beno ti ya mono ke bondila beno na zina ya Mfumu Yesu, yo yai : Beno zinga diaka ve bonso bamimpani...Beno lwata bikalulu ya mpa... Efeso 4 :17,24a

👤 Bankunga ya kwenda nzila mosi ti leso :

2 Korinto 5 :17
Kwenda na Yesu

II. REVISIO

📖 Kuyindula diaka baleso me luta :

Beto me landa histoire ya Esdrasi ti Nehemia, mpila bo twadisaka Bayuda yina vandaka na kimpika na Persia, yina vutukaka na Yeruzalemi. Beto me landa mpila bo tungaka ntete mesa-kimenga, ya zole, Nzo-Nzambi, ti ya tatu, bibaka ya lupangu ya bwala. Beto me mona mpila bo waka ndinga ya Nzambi, ti mpila bo balulaka ntima ntangu bo bakisaka nde bo me landa yo ve.

III. KULONGA LESO YAI

➡ Kuyantika :

Kansi Bayuda yonso vutukaka ve na Yeruzalemi. Ya nkaka bikalaka na nsi ya Persia. Mukanda ya Estere landa Nehemia na kati ya Bible. Yo songa histoire ya ndambu ya Bayuda ya bikalaka na nsi ya Persia.

🏠 Malongi ya nene ya leso yai (developpement) na banti ya malongi 4 :

16.1 Mfumu Zeresesi monaka kiese ve na mfumu-nkento na yandi. Yandi katulaka yandi sambu na kusosa mfumu-nkento ya nkaka.

📖 **Tangila bana :** ndambu ya Estere 1, 2 :1-4

1 :1 Mambu yai yonso kubwaka ntangu Zeresesi vandaka ntotila na nsi ya Persia...

3 Yandi salaka fete ya nene sambu na bantu na yandi yonso ya kisalu...

10-11 Na kilumbu ya nsambwadi ya fete...yandi bingaka bantu ya kisalu na yandi. Yandi songaka bo kubinga mfumu-nkento Vashti, sambu na kusonga kitoko na yandi na bantu...

12 Kansi yandi buyaka kukwisa. Mambu yai pesaka ntotila makasi...

Estere 2 :1-4 (somere) Baconseyere ya mfumu songaka yandi kukatula Vasti, kusosa nkento ya nkaka ya kubaka sika na yandi.

? Yula bana

🏠 Bana sala bageste to mwa-senete

👤 Bana yimba ti kina

16.2 Muyuda mosi zina ya Mardoke me bikala na bwala ya mfumu. Yandi vandaka nguasi ya nkento ya kitoko Estere, ya vandaka mwana-nsona.

📖 **Tangila bana :** Estere 2 :5-7

2 :5 Kuna na bwala Suze vandaka Muyuda mosi zina ya Mardoke...

7 Mardoke vandaka na kisoni Estere. Ntangu tata ti mama na yandi kufwaka, Mardoke bakaka yandi. Yandi sansaka yandi bonso mwana na yandi mpenza. Estere vandaka mwana-nkento mosi ya kitoko...

? Yula bana

🏠 Bana sala bageste to mwa-senete

👤 Bana yimba ti kina

16.3 Na kati ya bankento mingi ya Mfumu ta yindula, Estere kuvandaka. Yandi songaka ve nde yandi vandaka Muyuda.

📖 **Tangila bana :** Estere 2 :8, 10

8 Yo yina, bo nataka bana-bankento mingi na bwala suze. Bo nataka mpi Estere.

10 Yandi songaka bantu ve nde yandi vandaka
Muyuda, sambu Mardoke songaka yandi
kutuba yo ve na bantu...

? **Yula bana**

 **Bana sala bageste to mwa-senete**

 **Bana yimba ti kina**

16.4 Mfumu zolaka Estere mingi ti solaka yandi kukuma mfumu-nkento na yandi.

 **Tangila bana :** Estere 2 :13-18

13-14 Konso mwana-nkento fweti kwenda na mfumu na nkokila, ebuna na suka bo nata yandi na nzo ya nkaka ya bankento. Yandi lenda vutuka na mfumu kaka kana yand binga yandi na zina.

15- 17 Bu ntangu ya Estere lungaka kukwenda, Mfumu zolaka Estere mingi kuluta bankento yonso. Yandi lwatisaka Estere mpu ya kimfumu. Yandi tulaka yandi mfumu-nkento na kisika ya Vasti.

? **Yula bana**

 **Bana sala bageste to mwa-senete**

 **Bana yimba ti kina**

>|< **Kumanisa Malongi :**

Mardoke ti Estere tubaka ve na bantu nde bo vandaka Bayuda. Bantu ya nkaka zolaka Bayuda ve. Kansi bo vandaka kwikama kulanda bansiku ya Nzambi, ata na kati ya bantu ya zabaka ve bo vandaka bantu na Yandi. Beto bantu ya Nzambi kele bantu ya Nzambi konso ntangu ti na konso kisika.

 **Devoir sambu na bakristo :**

Na mposho yai, yindula kana nge ke zinga bonso mukristo konso lumbu. Ata nge kwenda na bwala ya nkaka to na ecole ya nkaka, to na ville ya nene sika bantu zaba nge ve, nge kele mukristo. Beto tula ngolo kuzinga bonso bakristo na konso kisika.

♥ **Verse ya Kulunguka :**

Bana tuba verse mbala 2 fraze na fraze na nima ya

nge, moniteur. Na nima, bo sala linya, bo tuba fraze ya ntete ti ya zole kutambula na nima. Bo tuba fraze ya nsuka kutambula na ntwala. Bo sala yo mbala zole. Na nsuka bo tambula sika bo ikele na kutuba yo mbala zole diaka.

 **Bankunga ya kwenda nzila mosi ti leso :**

2 Korinto 5 :17

Kwenda na Yesu

 **Invitation sambu na bo ya me yamba Yesu ntete ve :**

Kansi kuzinga bonso mukristo, ntete nge fweti vanda mukristo. Mukristo kele muntu ya me bakisa nde yandi ke fwana ve na meso ya Nzambi. Yandi ke bakisa nde yandi me sala mbi na ntwala ya Nzambi, bonso kufinga, kuswana, kukusa, kuyiba, etc. Yandi kele muntu ya me mona mawa sambu na masumu yandi me sala.

Mukristo kele muntu ya me zenga kubika nzila ya masumu, kutula ntima na Yesu Kristo, Yesu kupesa yandi ntima ya mpa ya ke zola bansiku na Yandi.

Mukristo kwikila nde ntangu Yesu fwaka na zulu ya kulunsi, Yandi bakaka masumu na yandi yonso, Yandi futaka mfuka na yo—mfuka ya lufwa. Nzambi vandaka na kiese na makabu na Yandi. Yo yina, Yandi tedimisaka Yesu na lufwa.

Na ntwala muntu kuma mukristo, yandi ke tula ntima na mambu mingi ya nkaka--mbala ya nkaka na bisalu ya mbote ya yandi mosi me sala. Mbala ya nkaka na religio to na mbotika. Kansi mukristo kele muntu ya me bakisa nde kaka Yesu Kristo mpamba lenda gulusa yandi, muntu ya nkaka ve.

Keti nge me kuma mukristo ? Ketu nge zaba yo mbote ? Ketu Yesu ta ndima nde nge me kuma mukristo ? Kana keti-keti kele, nge lenda balula ntima na Yandi ata bubu yai.

NSUKA YA LESO 16

 Kana nge me manisa leso ti ntangu ke lunga, konso mposho nge lenda baka kitini ya ntangu kulunga mikanda ya Bible ndambu-ndambu. Tala nsuka ya mukanda yai sambu na bangindu.



Leso 16

Estere
vandaka
na kati
ya
Bayuda
ya
bikalaka
na nsi
ya
Persia.
Mfumu
kuna
solaka
yandi
kukuma
mfumu-
nkento
na
yandi.

**Mambu ya mono ke songa beno
ti ya mono ke bondila beno
na zina ya Mfumu Yesu, yo yai :
Benozinga diaka ve bonso
bamimpani...
Benolwata bikalulu ya mpa...**

Efezo 4 :17,24a

Leso 17. Amani salaka lukanu na kufwa Bayuda yonso na ntoto ya Persia.

Leso ke monika na Estere 3 :1-15, 4 :1-3

I. PREPARASIO SAMBU NA MONITEUR-

☉ Kikuma ya Leso :

Bana ta tina kimbeni, sambu nsuka na yo kele lufwa.

♥ Verse ya Kulonguka :

(Beto ta tuba yo diaka na Leso 21.)

(Yesu nde :) Kansi Mono ke songa beno nde : ‘Zola bambeni na beno. Samba Nzambi sambu na bantu yina ke monisa beno mpasi.’ Matayo 5 :44

👤 Bankunga ya kwenda nzila mosi ti leso :

Beto Vutula Mbi Ve, Ve, Ve
Zola

II. REVISIO

† Kuyindula diaka baleso me luta :

Na mukanda ya Estere beto ke mona Bayuda ya me bikala na nsi ya Persia, ata bampangi na bo me vutuka na Yeruzalemi. Beto me mona Mordoke ti mpangi na yandi Estere. Beto me mona nde Estere kumaka mfumu-nkento ya nsi ya Persia.

III. KULONGA LESO YAI

➔ Kuyantika :

Bubuyai, muntu mosi ya mpa ta kota histoire yai. Muntu yai Amani. Mfumu Zeresesi tulaka yandi na kati ya bakonse yere na yandi. Amani vandaka lulendo mingi. Yandi sosaka nde bantu yonso zitisa yandi.

🏠 Malongi ya nene ya leso yai (developpement) na banti ya malongi 4 :

17.1 Mfumu songaka bantu kufukimina Anani sambu na kuzitisa yandi. Kansi Mardoke monaka nde yandi lenda fukimina kaka Nzambi. Ntangu bantu yulaka mambu yina, bo kwisaka kuzaba nde Mardoke vandaka Muyuda.

📖 **Tangila bana :** Estere 3 :2-4

3 :2 Mfumu tubaka na bantu na yandi yonso ya kisalu nde bo fukama na ntwala ya Amani

sambu na kusonga yandi luzitu. Bo yonso salaka mpidina. Kaka Mardoke buyaka kusala yo.

3 Bantu yulaka yandi nde : “Sambu na nki nge ke buya kulanda nsiku ya mfumu ?”

4 Yandi vutulaka nde : “Mono kele Muyuda. Mono lenda ve kufukama...” Ebuna bo telaka Amani...

? Yula bana

🏠 **Bana sala bageste to mwa-senete**

👤 **Bana yimba ti kina**

17.2 Amani waka makasi sambu Mardoke buyaka kufukimina yandi. Yo yina, yandi sosaka mpila na kufwa yandi ti bayuda yonso na nsi ya Persia.

📖 **Tangila bana :** Estere 3 :5-6

5-6 Amani bakaka makasi. Ntangu yandi waka nde Mardoke vandaka Muyuda, yandi zengaka nde yandi fweti kufwa Mardoke mpamba ve, kansi Bayuda yonso na kimfumu ya Persia.

? Yula bana

🏠 **Bana sala bageste to mwa-senete**

👤 **Bana yimba ti kina**

17.3 Amani songaka lukanu ya mbi na mfumu, ti yandi ndimaka yo. Na lumbu bo me tula, bayuda yonso fweti kufwa.

📖 **Tangila bana :** Estere 3 :8-15

8 Ebuna Amani tubaka na mfumu nde : « Ke na bantu me panzanaka na kimfumu na nge. Bo ke lemfuka ve na bansiku na nge...

9 Mfumu, kana nge zola, mbote nge tula nsiku nde bo fweti fwa bo....

11 Mfumu vutulaka nde... « Sala mutindu nge zola. »

12 Yo yina, Amani bingaka bakalaki ya mfumu. Yandi songaka bo kusonika nsiku, kutinda yo na bantu yonso ya leta...

13 Bantu kwendaka ntinu na konso provense. Nsiku yango vandaka kutuba nde, na kilumbu ya bo me tula, Bayuda yonso--mbuta, leki,

nkento, mwana, bo fweti fwa bo.

? Yula bana

🏠 Bana sala bageste to mwa-senete

👤 Bana yimba ti kina

17.4 Ntangu Mardoke waka nsiku yina, yandi monaka kiadi mingi sambu bantu na yandi yonso Bayuda, bo fweti kufwa.

📖 Tangila bana : Estere 4 :1-3

4 :1 Ntangu Mardoke waka mambu yonso ya kubwaka, yandi pasulaka bilele na yandi sambu na mawa. Yandi kwendaka kudila na ndinga ya ngolo ti ya mawa.

3 Na kati ya baprovence yonso, bisika ya bo waka mambu ya mfumu tubaka, Bayuda vandaka kudila ngolo na mawa...

? Yula bana

🏠 Bana sala bageste to mwa-senete

👤 Bana yimba ti kina

>|< Kumanisa Malongi :

Amani bakaka Mardoke ti Bayuda yonso na kimbeni na ntima na yandi. Nswalu, kimbeni yina bendaka lukanu nki mutindu bo lenda kufwa Bayuda yonso. Nsuka ya histoire bubuyai kaka mawa sambu mfumu me tula nsiku nde na lumbu mosi, Bayuda yonso kufwa. Yina ta vanda nsuka na bo na Persia. Nki bo ta sala ? Nki mutindu Nzambi ta sadisa bo ? Beto ta mona yo na mposo ke kwisa. Bubuyai beto zola kusimba nde kimbeni ke pesa bantu nzala ya kufwa bantu. Yo kele mbi.

♥ Verse ya Kulonguka :

(Beto ta tuba yo diaka na Leso 21.)

Bana tuba verse mbala zole fraze na fraze na nima ya nge, moniteur. Na nima, bo bika bageste ti tuba yo mbala zole diaka. Na nsuka, bo sala cercle, bo yonso simbana na mapeka kusonga luzolo, bo yimba yo ti kina mbala zole diaka.

👤 Bankunga ya kwenda nzila mosi ti leso :

Beto Vutula Mbi Ve, Ve, Ve
Zola

👤 Devoir sambu na bakristo :

Bana bakristo, kimbeni ke fwana ve na beto bakristo. Yesu longaka beto nde, ata bantu ya nkaka kubaka beto na kibeni, beto bakristo zola bo kaka. Keti nge ta tula ngolo mposo yai kutina kimbeni ti kusosa kuzola bantu yonso ?

✝ Invitation sambu na bo ya me yamba Yesu ntete ve :

Kana nge zola mingi kubaka bantu na kimbeni, yo lenda vanda nde nge me yamba Yesu ntete ve. Ntangu nge balula ntima na Yandi, Yandi ta pesa nge ntima ya mpa. Na ntima ya mpa yina, nge ta zola kupesa Yandi kiese. Nge ta mona yo mpasi ve kuzola ata bambeni na nge. Sambu na nki ? Sambu nge ta bakisa mpila Nzambi zolaka nge, ata nge vandaka mbeni na Yandi. Kana nge balula ntima na Yesu, Yandi ta changer luzingu na nge.

Keti ntima ti luzingu na nge me changer ? Yo lenda, na minute nge tula ntima na nge yonso na Yesu Kristo, Mwana ya Nzambi. Yandi Mvulusi mosi kaka ya Nzambi tindaka.

NSUKA YA LESO 17



Amani bakaka Mardoke na kimbeni sambu Mardoke buyaka kufukimina yandi. Yandi songaka mfumu, ti yandi sonikaka nsiku nde Bayuda yonso fweti kufwa. Kimbeni kwendaka nswalu kunata lufwa.

(Yesu nde :) Kansi Mono ke songa beno nde : ‘Zola bambeni na beno.

Samba Nzambi sambu na bantu yina ke monisa beno mpasi.’

Matayo 5 :44

Leso 18. Estere monaka mpila kusadisa bantu na yandi Bayuda.

Leso ke monika na Estere 4 :4-17

I. PREPARASIO SAMBU NA MONITEUR-

☉ Kikuma ya Leso :

Bana ta sosa kuzaba ti kusala yina ya Nzambi me yidika sambu na bo.

♥ Verse ya Kulonguka :

“...mbala ya nkaka si bo tulaka nge mfumu-nkento sambu na ntangu ya mpidiyai.” Estere 4 :14b

👤 Bankunga ya kwenda nzila mosi ti leso :

Landa, Mo’ Ta Landa Nge, Mfumu
Mfumu Zaba Nzila na Mono

II. REVISIO

† Kuyindula diaka baleso me luta :

Beto kele kulanda mukanda ya Estere. Yo songa mambu mosi ya mpasi ya bwilaka Bayuda yina vutukaka ve na Yeruzalemi, kansi bo bikalaka na nsi ya Persia. Mfumu ya Persia salaka nsiku nde na lumbu mosi ya yandi tulaka, Bayuda yonso na kati na bo fweti kufwa. Sambu na nki yandi sonikaka nsiku yina ?

(Conseyere na yandi Amani pesaka yandi ngindu yina. Yandi songaka Mfumu nde Bayuda kaka bantu ya mbi. Amani mengaka Bayuda sambu Muyuda mosi, Mardoke, buyaka kufukimina yandi.)

III. KULONGA LESO YAI

➔ Kuyantika :

Mardoke kwisaka kuzaba nsiku nde Bayuda fweti kufwa. Ebuna yandi kwendaka kudila. Kansi Estere, na kati ya nzo ya mfumu, zabaka yo ntete ve. Bubu yai beto ta mona nki salamaka ntangu Estere kwisaka kuzaba nsiku yina.

🏠 Malongi ya nene ya leso yai (developpement) na banti ya malongi 4 :

18.1 Estere kwisaka kuzaba nsiku Mfumu me tula nde Bayuda yonso fweti kufwa.

📖 **Tangila bana :** Estere 4 :3-8

3-4 ...Bayuda vandaka kudila ngolo...Ntangu

bantu yina vandaka kusadila Estere songaka yandi mpila Mardoke vandaka kudila, Estere kumaka kisaksaka mpenza...

5 Ebuna yandi songaka sielo na yandi kukwenda kutala Mardoke ti kuzaba...sambu na nki yandi ke sala mutindu yina.....

7-8 Mardoke telaka yandi mambu yonso ya kubwaka. Yandi pesaka yandi mpi kopi ya nsiku. Mardoke songaka yandi mpi kukwenda kubondila mfumu kana yandi lenda wila bantu na yandi mawa.

? **Yula bana**

🏠 **Bana sala bageste to mwa-senete**

👤 **Bana yimba ti kina**

18.2 Estere waka boma kukwenda na ntwala ya mfumu. Konso muntu yina kota na mfumu, kana yandi me binga ve muntu yina, mfumu lenda kufwa yandi. Kaka kana mfumu tandula nti na yandi ya kimfumu, bo wila yandi mawa.

📖 **Tangila bana :** Estere 4 :9-11

10-11 Ebuna Estere tubaka mambu yai na sielo : «Nsiku ke tuba nde konso muntu yina ta kota na lupangu ya mfumu, kana bo me binga yandi ve, yandi fweti fwa. Kaka kana mfumu tandula nti na yandi ya kimfumu, mpidina muntu yina lenda fwa ve. Tala, ngonda mosi me luta, mfumu me binga mono ve. »

? **Yula bana**

🏠 **Bana sala bageste to mwa-senete**

👤 **Bana yimba ti kina**

18.3 Mardoke pesaka Estere enkurazema nde mbala ya nkaka yandi me kuma mfumu-nkento kaka kusadisa na ntangu yina.

📖 **Tangila bana :** Estere 4 :12-14

12-13 Ntangu Mardoke bakaka mukanda ya Estere, yandi pesaka Estere atasio nde : “Kuyindula ve nde nge mpamba ta guluka na kati ya Bayuda yonso...”

[verse ya bubuyai--]

14 “Nani kuzaba, mbala ya nkaka si bo tulaka

nge mfumu-nkento sambu na ntangu ya mpidiyai.”

? Yula bana

🏠 Bana sala bageste to mwa-senete

👤 Bana yimba ti kina

18.4 Estere ndimaka kukwenda kubondila Mfumu na nima ya bilumbu 3 ya lombilu.

📖 Tangila bana : Estere 4 :15-17

15-16 Estere vutulaka Mardoke nde : Bilumbu tatu beno kudia ve ti kunwa ve. Mono ti basielo na mono ta sala kiteso mosi. Na nima. mono ta kwenda mfumu, ata nsiku kele. Kana mono fweti fwa sambu mono me sala mpidina, mono ta fwa.”

17 Ebuna Mardoke salaka mambu yonso ya Estere songaka yandi.

? Yula bana

🏠 Bana sala bageste to mwa-senete

👤 Bana yimba ti kina

>|< Kumanisa Malongi :

Mardoke songaka Estere nde yandi vandaka na sika ya yandi lenda sadisa bantu na yandi, Bayuda. Estere vandaka na boma, sambu kukwenda na mfumu vandaka kingonsa ya lufwa. Kansi Mardoke pesaka yandi ngindu nde Nzambi me tula yandi na sika yina kaka sambu na kusadisa bantu na yandi. Yai vandaka kisalu ya nene ya Nzambi me pesa yandi. Ngindu yai pesaka Estere kikesa kukwenda kusolula ti mfumu. Bo tulaka yo na lombilu bilumbu 3, ebuna Estere zengaka nde yandi ta kwenda kusolula ti Mfumu, kubondila yandi kuwila bantu na yandi Bayuda mawa.

👋 Devoir sambu na bakristo :

Bana bakristo, zaba nde Nzambi kele na kisalu sambu na nge kusala. Bisalu yandi me pesa beto kele mutindu na mutindu. Yo lenda vanda kuvanda missionnaire, kukwenda kusonga nsangu ya Yesu na nsi to na kulture ya nkaka. Yo lenda vanda kukuma docteur, kugulusa moyo ya bantu ya ke bela. Yo

lenda vanda kukuma mama na fami, kutwadisa ti kulonga bana nsangu ya Yesu. Yo lenda vanda kuvanda agrinome, kusosa bampila nde ntoto lenda pesa madia ya kuluta mbote. Yo lenda vanda kusala misiki ya kitoko sambu na kupesa Nzambi lukumu. Yo lenda vanda kuvanda mekanisiene ya kele kuyidika bakamio ya nene. Yo lenda vanda bima mingi. Mbote nge samba, sambu Yandi songa nge nki kisalu ya mfumu Yandi zola nge kusala.

♥ Verse ya Kulonguka :

Bandinga ya verse ya beto kele bandinga ya Mardoke sonikaka na Estere sambu na kupesa yandi enkurazema kukwenda na mfumu kugulusa bantu na yandi Bayuda. Bana tuba yo mbala zole fraze na fraze na nima ya nge. Na nima, tula ton ti ritima ti bo yimba ti kina yo mbala iya.

👤 Bankunga ya kwenda nzila mosi ti leso :

Landa, Mo' Ta Landa Nge, Mfumu
Mfumu Zaba Nzila na Mono

✝ Invitation sambu na bo ya me yamba Yesu ntete ve :

Nzambi kele kutwadisa bana na Yandi. Yandi kele na kisalu sambu na bana na Yandi. Na nsuka ya konso leso, beto ke yula nge, 'Keti nge zaba nge kele mwana na Yandi ?'

Bible ke songa nde beto lenda zaba yo. Keti nge ke bambuka ntangu ya nge kumaka mwana ya Nzambi ? Keti luzingu na nge shanzaka na nima ?

Kana nge ke wa Mpeve ya Nzambi ke bula na ntima na nge, kangula ntima sambu Yesu kota. Balula ntima. Songa Yandi mpila ya masumu nge me sala ke pesa nge mawa. Lomba Yandi kufwila nge nkenda. Tula kivuvu na Yandi kaka.

Yandi ta vanda na kiese kuyamba nge na kimfumu na Yandi, nge kuma mukristo ya kieleka.

NSUKA YA LESO 18

📖 Kana nge me manisa leso ti ntangu ke lunga, konso mposho nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.



Estere ndimaka kumeka kumona mfumu, ata kingonsa vandaka mingi. Yai vandaka kisalu Nzambi me pesa yandi kusala.

**“...mbala ya nkaka si, bo
tulaka nge mfumu-nkento
sambu na ntangu ya
mpidiyai.”**

Estere 4 :14b

Leso 19. Estere salaka fete ya ntete, ti Amani mengaka Mordoke kuluta.

Leso ke monika na Estere 5

I. PREPARASIO SAMBU NA MONITEUR-

🕒 Kikuma ya Leso :

Bana ta bakisa nde kimbeni ti lulendo kele bana mapasa ya mbi. Beto buya yonso zole.

♥ Verse ya Kulunguka :

*Ntete ke kwisa lulendo, na nima, kubwa ya muntu.
Bingana 16 :18*

🔊 Bankunga ya kwenda nzila mosi ti leso :

Beto Vutula Mbi Ve, Ve, Ve
Mo' Ta Kwisa na Nzambi na Lulendo Ve

II. REVISIO

👤 Kuyindula diaka baleso me luta :

Kuna na Israele, Ezra me twadisa bantu kumanisa Nzo-Nzambi ti kuyantika kusamba na kimvuka diaka. Nehemia mpi me twadisa bo kutunga diaka bibaka ya lupangu ya bwala.

Kansi na nsi ya Persia, Bayuda ya nkaka me bikala. Na kati vandaka Mardoke ya vandaka kutambula na kati ya bambuta ya bwala, ti Estere, yina me kuma nkento-mfumu. Kansi bantu zabaka ntete ve nde bo vandaka Bayuda. Mardoke, ngwasi ya Estere, yandi me bwa na probleme ti consevere ya mfumu zina ya Amani. Nani bambuka sambu na nki Amani bakaka Mardoke na kimbeni ? (Sambu Mardoke buyaka kufukimina yandi. Bayuda vandaka kufukimina kaka Nzambi.)

Sambu na kimbeni yina, Amani salaka nki ? (Yandi songaka mfumu nde Bayuda yonso bantu ya mbi. Yandi pesaka mfumu ngindu kusonika nsiku nde bo yonso kufwa.)

III. KULONGA LESO YAI

➡ Kuyantika :

Ntangu yina, Estere vandaka na probleme mosi ya mpasi. Yandi Muyuda, ti mfumu me sonika nsiku nde Bayuda yonso kufwa na lumbu mosi. Estere

vandaka na boma kukwenda kusolula ti mfumu. Na nsiku na bo, kana muntu kota, kana mfumu tandula ve nti ya kimfumu na yandi, yandi fweti kufwa.

Kansi Estere me yilama na ntima. Yandi fweti mona mfumu kaka. Kana yandi kufwa, yandi kufwa. Kansi yandi vandaka kutula ntima nde Nzambi me kumisa yandi mfumu-nkento sambu na kusadisa na ntangu yina. Yandi sambaka ngolo bilumbu tatu na ntwala kukota na mfumu.

🏠 Malongi ya nene ya leso yai (developpement) na banti ya malongi 4 :

19.1 Na nima ya bisambu, Estere lwataka lele ya kitoko ya kimfumu ti kwendaka kutala mfumu.

📖 **Tangila bana :** Estere 5 :1

5 :1 Ntangu Estere me lungisa bilumbu tatu kukonda kudia, yandi lwataka bilele na yandi ya kimfumu, yandi kwendaka...

? Yula bana

🏠 Bana sala bageste to mwa-senete

🔊 Bana yimba ti kina

19.2 Mfumu tandulaka yandi nti ya kimfumu sambu yandi kufwa ve. Yandi yulaka Estere nki yandi vandaka kusosa.

📖 **Tangila bana :** Estere 5 :2-3

2 Ntangu mfumu monaka mfumu-nkento Estere kutelama na nganda, yandi tandulaka nti na yandi ya kimfumu. Ebuna Estere kwisaka, yandi simbaka nsongi na yo.

3 Ntotila yulaka yandi nde : « Mfumu-nkento Estere, nki mambu ? Songa mono nki nge zola. Nge ta zwa yo... »

? Yula bana

🏠 Bana sala bageste to mwa-senete

🔊 Bana yimba ti kina

19.3 Estere lombaka mfumu ti Amani kukwisa na fete yandi me sala sambu na bo. Ntangu bo kwisaka, mfumu yulaka Estere diaka nki yandi

sosaka. Estere lombaka bo kukwisa na fete ya zole mbasi sambu yandi songa mambu yina.

 **Tangila bana :** Estere 5 :4-8

4 Estere tubaka nde : "Mfumu, kana nge zola, mono zola nde nge ti Amani, beno kwisa bubu. Mono ke sala fete sambu na beno. »

5 Ntangu yai, mfumu songaka bantu na kwenda kusosa Amani, yandi kwisa nswalu sambu bo kwenda na fete ya Estere.

6 Ntangu bo vandaka kunwa vinu, mfumu yulaka Estere nde : « Songa mono nki nge zola. Nge ta zwa yo... »

7-8 Estere tubaka nde : « Mfumu, kana nge zola, mono ke zola nde nge ti Amani, beno kwisa diaka mbasi na fete ya mono ke yidika sambu na beno. Na ntangu yo yina, mono ta songa nge nki mono zola. »

 **Yula bana**

 **Bana sala bageste to mwa-senete**

 **Bana yimba ti kina**

19.4 Na nima ya fete, Amani monaka lulendo bonso yandi vandaka muntu ya mfunu mingi. Yandi makasi ya kuluta sambu Mardoke buyaka kaka kufukumina yandi.

 **Tangila bana :** Estere 5 :9-11

9 Ntangu Amani katukaka na fete, ntima na yandi, fulukaka na kiese. Kansi ntangu yandi monaka Mardoke, yandi wilaka yandi makasi mingi.

10-11 Yandi kwendaka na nzo. Yandi bingaka banduku ti songaka bo lukumu yonso ya mfumu pesaka yandi, ti mutindu yandi me luta bantu yonso ya kisalu ya mfumu.

 **Yula bana**

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Estere kwendaka kumona mfumu. Kiese mingi ! Yandi fwaka ve. Yandi bingaka Mfumu ti Amani

kukwisa na fete—mosi na lumbu yina ti mosi mbasi. Yai yonso pesaka Amani lulendo ya kuluta, sambu yandi yindulaka nde na kati ya bantu yonso, bo me mona yandi kuluta nene. Kansi Mardoke kaka buyaka kufukumina yandi. Yo yina, yandi yantikaka kumenga Mardoke kuluta.

Lulendo me sala kisalu mosi ya mpasi na kati ya Amani. Yo me twadisa yandi kumenga Mardoke mingi-mingi.

 **Devoir sambu na bakristo :**

Bana bakristo, lulendo ti kimbeni kele bonso bana mapasa ya mbi. Yonso zole kele mbi. Yonso zole ke bebisa luzingu. Kana nge ke mona ndambu ya lulendo na ntima na nge, ndima yo. Lomba Yesu kusadisa nge sambu yo yela ve, yo buta ve mambu ya mbi.

 **Verse ya Kulonguka :**

Bana tuba verse mbala zole fraze na fraze na nima ya nge moniteur. Na nima, bo yika bageste ti tuba yo mbala zole diaka. Na nima, bana bankento ti babakala tuba yo mbala zole na competisio.

 **Bankunga ya kwenda nzila mosi ti leso :**

Beto Vutula Mbi Ve, Ve, Ve
Mo' Ta Kwisa na Nzambi na Lulendo Ve

 **Invitation sambu na bo ya me yamba Yesu ntete ve :**

Lulendo ya nene kele kuyindula nde nge ke na mfunu ve ya Yesu Kristo. Nge ke na mfunu na Yandi. Beto yonso ke na mfunu na Yandi sambu beto me fwa bansiku ya Nzambi.

Kana nge me yamba Yandi ntete ve bonso Mvulusi na nge, ntangu ya mbote yo yai. Binga Yandi na ntima ya lukwikilu. Yandi lenda lolula mbi yonso nge me sala. Yandi lenda pesa nge ntima ya zola landa bansiku na Yandi. Yandi lenda pesa nge moyo ya mpa.

NSUKA YA LESO 19

 Kana nge me manisa leso ti ntangu ke lunga, konso mposho nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.

Leso 19



Estere
lombaka
mfumu
ti Amani
kukwisa
mbala
zole na
fete
yandi
me sala
sambu
na bo.

**Ntete ke kwisa lulendo,
na nima, kubwa ya
muntu.**

Bingana 16 :18

Leso 20. Mfumu pesaka Mordoke luzitu, kansi Amani monaka nsoni.

Leso ke monika na Estere 6

I. PREPARASIO SAMBU NA MONITEUR-

☉ Kikuma ya Leso :

Bana ta tina lulendo.

♥ Verse ya Kulunguka : Beto baka diaka—

Lulendo ke bwisaka muntu. Yo ke natila kubwa ya muntu. Bingana 16 :18

👤 Bankunga ya kwenda nzila mosi ti leso :

Kudikulumusa na Meso ya Nzambi
Mo' Ta Kwisa na Nzambi na Lulendo Ve

II. REVISIO

† Kuyindula diaka baleso me luta :

Estere me solula ti mfumu, kansi yandi me songa yandi ntete ve nki yandi ke sosa. Yandi vandaka kusosa nki ?

(Kulomba mfumu kuwila bantu ya yandi Bayuda mawa sambu bo kufwa ve.)

Mono banza mfumu vandaka kudiyula, “Nki Estere kele kuzola ?” Nki Amani vandaka kuyindula ? Fete ya Estere me yika yandi lulendo kaka. Yandi vandaka kumenga Mardoke ya kuluta mingi.

III. KULONGA LESO YAI

➔ Kuyantika :

Estere me binga mfumu ti Amani kukwisa na fete ya zole. Kansi na ntwala ya fete yina, mambu ya nkaka salama. Na bilumbu na ntwala, Mardoke me kwisa kuzaba nde bantu ya nkaka vandaka na lukanu nde bo kufwa mfumu. Yandi songaka yo, yo yina, mfumu fwaka ve. Bo sonikaka yo na mukanda. Na nima, mfumu vilaka mambu yina.

🏠 Malongi ya nene ya leso yai (developpement) na banti ya malongi 4 :

20.1 Mpimpa na nima ya fete ya Estere, mfumu monaka mpasi ya kulala. Yandi lombaka nde bo tangila yandi mikanda ya kimfumu. Bo tangilaka yandi mpila Mardoke gulusaka moyo na yandi. Mfumu bakisaka nde bo me sala kima

ve sambu na Mardoke na nima yandi me gulusa moyo na yandi.

📖 Tangila bana : Estere 6 :1-3

6 :1 Na mpimpa yango, mfumu monaka mpila ya kulala ve. Yandi lombaka bo kutangila yandi mukanda ya kimfumu.

2 Yo vandaka kutuba nde : Bantu zole sosaka mpila ya kufwa mfumu. Mardoke monaka bo, ebuna yandi kwendaka kufunda bo.

3 Mfumu yulaka nde : « Nki ya mbote beto salaka Mardoke sambu na mambu yai ? » Bantu na yandi tubaka nde: “Ata kima mosi ve.

? Yula bana

🏠 Bana sala **bageste to mwa-senete**

👤 Bana **yimba ti kina**

20.2 Kaka na ntangu yina, Amani kwisaka kulomba mfumu nde yandi kufwa Mardoke.

📖 Tangila bana : Estere 6 :4-5

4 Mfumu yulaka diaka nde : “Nani yina kuna na lupangu ?” (Kisi ve Amani muntu vandaka ke kota sambu na kulomba mfumu yandi kufwa Mardoke na zulu ya nti ya yandi me yidika.)

? Yula bana

🏠 Bana sala **bageste to mwa-senete**

👤 Bana **yimba ti kina**

20.3 Nswalu mfumu lombaka Amani kupesa yandi conseye nki mutindu kuzitisa muntu ya yandi zola kumisa. Na lulendo na yandi, Amani yindulaka nde mfumu zolaka kumisa yandi.

📖 Tangila bana : Estere 6 :6-9

6 Amani kotaka, ebuna mfumu songaka yandi nde : « Ke na muntu mosi mono ke zola mingi kukumisa yandi. Nki mono fweti sala yandi ? »

Amani yindulaka nde : « Nani diaka ya mfumu ta zola kumisa ? Si. kaka mono ! »

7-9 Yo yina. yandi vutudilaka mfumu nde : «Mfumu, kana nge zola kumisa muntu, baka bilele ya kimfumu ya nge mosi ke lwataka, pesa muntu yina.

Baka mpi mpunda na nge,

*ebuna binga muntu na nge mosi ya nene.
Yandi lutisa yandi na kati ya bwala na kisika ya bantu ke kutakanaka. Yandi tuba na ndinga ya ngolo nde, «Beno tala mutindu mfumu ke sala muntu yina ya yandi ke zola kukumisa ! »*

? Yula bana

🏠 Bana sala bageste to mwa-senete

👤 Bana yimba ti kina

20.4 Kansi ntotila zolaka kumisa Amani ve, kansi Mardoke. Yandi songaka Amani kukwenda kumisa yandi ! Nsoni mingi ! Amani kwendaka kumisa muntu ya yandi mengaka.

📖 Tangila bana : Estere 6 :10, 12

*10 Mfumu tubaka na Amani nde :
«Nswalu ! Sala mambu yai sambu na kukumisa--- Mardoke ! Sala mambu yonso ya nge me tuba.... »*

12 Ebuna Amani vutukaka nswalu na nzo, ilungi ya kufika sambu na nsoni.

? Yula bana

🏠 Bana sala bageste to mwa-senete

👤 Bana yimba ti kina

>|< Kumanisa Malongi :

Ha ha ! Na lulendo, Amani yindulaka nde mfumu zolaka kukumisa yandi. Yo yina, yandi pesaka mvutu ya zolaka kupesa yandi luzitu mingi. Kansi yo vandaka yandi ve, kansi Mardoke ya mfumu zolaka kukumisa.

Yandi fweti pesa luzitu yai yonso na Mardoke, muntu ya yandi mengaka, muntu ya yandi zolaka kufwa. Nsoni na yandi. Lulendo ke sadisa muntu ve. Yo ke bendaka nsoni. Beto tina lulendo.

👋 Devoir sambu na bakristo :

Bana bakristo, na mposho yai, keba nde lulendo kusimba ntima na nge ve. Nwana ngolo na yo. Kudikulumusa na meso ya Nzambi. Yandi kunangula nge, kansi nge mosi kudinangula ve.

♥ Verse ya Kulonguka : Beto baka diaka—

Bana tuba verse yonso mbala mosi fraze na fraze na nima ya nge, moniteur. Na nima, bo tuba yo mbala mosi bonso na lulendo, mbala mosi bonso na kudikulumusa. Bo sukisa kutuba yo na mpila ritimika mbala tatu, kubula maboko to makulu.

👤 Bankunga ya kwenda nzila mosi ti leso :

Kudikulumusa na Meso ya Nzambi
Mo' Ta Kwisa na Nzambi na Lulendo Ve

✝ Invitation sambu na bo ya me yamba Yesu ntete ve :

Lulendo kele masumu. Beto yonso me sala masumu. Beto me landa ve bansiku ya Nzambi pesaka beto. Beto me zola Yandi ve na ntima na beto yonso. Masumu ya beto me sala me natila beto ndola ya lufwa.

Kana nge bakisa nde nge me sala masumu ti nge me zwa makambu ti Nzambi sambu na yo, fika yo ve na lulendo. Nzambi zaba yo dezia.

Kwisa na Mwana ya Nzambi, Yesu Kristo. Yandi pesaka moyo na Yandi na zulu ya kulunsi sambu na kugulusa konso muntu yina ta kwisa na Yandi.

Keti nge ta kwisa bubu yai ?

NSUKA YA LESO 20

📖 Kana nge me manisa leso ti ntangu ke lunga, konso mposho nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.

Leso 20



Na lulendo Amani yindulaka nde mfumu zolaka kuzitisa yandi. Yandi songaka mfumu mpila kusala mambu ya nene-nene. Nsoni mingi bu mfumu songaka yandi kukwenda kusala yo na Mardoke !

**Ntete ke kwisa lulendo,
na nima, kubwa ya
muntu.**

Bingana 16 :18

Leso 21. Estere salaka fete ya zole ti Mfumu fwaka Amani.

Leso ke monika na Estere 7

I. PREPARASIO SAMBU NA MONITEUR-

🕒 Kikuma ya Leso :

Bana ta yindula mbi ve sambu na muntu ya nkaka. Mbaimbai mbi yina ta simba nge bo mosi.

♥ Verse ya Kulunguka :

Kansi Mono (Yesu) ke tubila beno nde : ‘Zola bambeni na beno. Samba Nzambi sambu na bantu yina ke monisa beno mpasi.’ Matayo 5 :44

🔊 Bankunga ya kwenda nzila mosi ti leso :

Beto vutula mbi ve, ve, ve
Zola

II. REVISIO

👤 Kuyindula diaka baleso me luta :

Amani vandaka lulendo mingi, yo yina, yo pesaka yandi mpasi nde Mardoke ta fukimina yandi ve. Mardoke ndimaka ve kufukimina yandi na mabanza ya mbi, kansi sambu yandi vandaka Muyuda. Yandi sambaka Mfumu Nzambi kaka.

Amani vandaka na lukanu nde yandi funda Mardoke sambu mfumu kufwa yandi. Na nima yandi me kwenda na fete ya ntete ya Mfumu-nkento Estere, lulendo salaka yandi diaka kuluta. Na mpimpa yina, yandi kwendaka na ntotila sambu na kufunda Mardoke.

Kansi na ntwala yandi lenda sala yo, ntotila yulaka yandi nki mutindu yandi lenda pesa muntu luzitu. Na lulendo ya Amani, yandi yindulaka nde yandi muntu ntotila zolaka kuzitisa. Yandi songaka ntotila kusala mambu ya lulendo mingi. Haha ! Nsoni na yandi ! Ntotila songaka yandi kukwenda nswalu, kusala yo na Mardoke !

III. KULONGA LESO YAI

➡ Kuyantika :

Kaka na nima mambu yai salamaka, sielo ya mfumu kwisaka kubinga Amani na fete ya zole ya Estere.

🏠 Malongi ya nene ya leso yai (developpement) na banti ya malongi 4 :

21.1 Na fete ya zole ya Estere sikamosi ti Mfumu ti Amani, Estere lombaka mfumu nde yandi wila yandi ti bantu na yandi mawa, bo kufwa ve.

📖 Tangila bana : Estere 7 :1-4

7 :1-2 Ebuna mfumu ti Amani kwendaka kudia na nzo ya Estere mbala ya zole. Mfumu yulaka Estere nde, « Ntangu yai, nki nge zola ?... »

3 Estere nde : « Mfumu, kana nge zola, mono zola kubikala na moyo, bantu na mono mpi kubikala na moyo.

4 Bo me teka beto sambu na kufwa beto, na kusukisa beto yonso...”

? Yula bana

🏠 Bana sala bageste to mwa-senete

🔊 Bana yimba ti kina

21.2 Estere songaka mfumu nde Amani muntu zolaka kufwa yandi ti bantu na yandi Bayuda.

📖 Tangila bana : Estere 7 :5-6

7 :5 Mfumu...yulaka Estere nde : « Nani zola kusala mutindu yina ? Muntu yango wapi ? »

6 Estere nde : « Mbeni na beto, muntu yina ke pesa beto mpasi, kele muntu yai ya mbi Amani ! »

? Yula bana

🏠 Bana sala bageste to mwa-senete

🔊 Bana yimba ti kina

21.3 Mfumu basikaka na makasi. Ebuna na boma, Amani kudilosaka na kiti ya Estere kulomba yandi mawa.

📖 Tangila bana : Estere 7 :7-8a

7 Mfumu telamaka na makasi. Yandi basikaka. Amani monaka nde imene, mfumu fweti zengila yandi ndola. Yo yina, yandi yantikaka kubondila Estere nde bo fwa yandi ve.

8 Ntangu mfumu vutukaka kukota na nzo, Amani me bwa na zulu ya kiti ya Estere kulomba yandi pardo.

? Yula bana**🏠 Bana sala bageste to mwa-senete****👤 Bana yimba ti kina****21.4 Sielo mosi songaka mfumu mpila Anani me tunga nti sambu na kufwa Mardoke. Ebuna mfumu fwaka Anani na nti yina.****📖 Tangila bana : Estere 7 :8b-10**

*8b Mfumu tubaka na ndinga ya ngolo nde,
« Ketu muntu yai ke sakana na mfumu-nkento
kaka awa na meso na mono ? »*

*9 Sielo mosi tubaka nde : « Mfumu, Amani me
na nti ya nda na nzo na yandi ya yandi me
tumika sambu na kufwa Mardoke na nsinga,
Mardoke yina gulusaka moyo na nge. »*

*Mfumu nde : « Beno tula Amani nsinga na
nkingu ! Yandi kufwa na zulu ya nti yango ! »*

*10 Yo yina, bo fwaka Amani na zulu ya nti ya
yandi tumikaka sambu na Mardoke...*

? Yula bana**🏠 Bana sala bageste to mwa-senete****👤 Bana yimba ti kina****>|< Kumanisa Malongi :**

Amani sosaka kufwa Mardoke ti Bayuda yonso. Kansi Bayuda vandaka bantu ya Nzambi me yidika sambu na kubuta Mesia Yesu Kristo. Bantu lenda ve manisa bo. Nzambi balulaka yo na mpila nde nti ti nsinga ya Amani tumikaka sambu na kufwa Mardoke, mfumu sadilaka yo sambu na kufwa Amani yandi mosi ! O, kingonsa ya nene kusala lukanu ya mbi sambu na muntu ya nkaka ! Nge zaba ve kana lukanu yina ta baluka kusimba nge mosi ! Kuluta mbote kuzola bambeni na beto, mutindu Yesu longaka beto !

👋 Devoir sambu na bakristo :

Mwana mukristo, tala mbote na ntimba na nge. Kana nge mona mabanza ya mbi sambu na muntu ya nkaka, kwenda nswalu na Yesu sambu na kuyidika

mambu yina. Nani nge ke zola ve ? Yindula nki mambu ya mbote nge lenda sala sambu na muntu yina mposo yai.

♥ Verse ya Kulonguka :

Bana tuba verse mbala zole fraze na fraze na nima ya nge, moniteur. Na nima bo yika bageste ti tuba yo mbala zole diaka. Na mbala zole ya nsuka, nge yantika verse ti bana manisa yo.

👤 Bankunga ya kwenda nzila mosi ti leso :

Beto vutula mbi ve, ve, ve
Zola

✝ Invitation sambu na bo ya me yamba Yesu ntete ve :

Beto yonso na luyantiku vandaka bambeni ya Nzambi. Bonso Amani, beto me sala mambu mingi ya me pesa Yandi kiese ve. Kansi beto fweti bikala bambeni ya Nzambi ve. Nzambi lenda kitula beto banduku na Yandi, bana ya luzolo na Yandi, kana beto balula ntimba na Yesu.

Yesu me sala kaka mbote sambu na beto. Yandi me bika nzo na Yandi ya kitoko na zulu, sika Yandi vandaka kuzinga mvu ya mvu ti Tata na Yandi, ti Mpeve ya Longo. Yandi kulumukaka, Yandi kwisaka awa na nsi-ntoto bonso bebe. Yandi zingaka luzingu mosi ya kitoko, kukonda masumu. Yandi ndimaka nde bambeni tula Yandi na zulu ya kulunsi, menga na Yandi panzana, Yandi kufwa. Yonso sambu na kufuta mfuka ya masumu na beto. Yandi kufwaka, kansi Yandi telamaka na moyo ! Yonso sambu nge mona mpila kukuma nduku ti mwana ya Nzambi.

Kana nge me yamba Yandi ntete ve, nki ta kanga nge nzila kuyamba Yandi sesepi yai ?

NSUKA YA LESO 21

📖 Kana nge me manisa leso ti ntangu ke lunga, konso mposo nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.



Leso
21

Mfumu waka makasi mingi bu yandi monaka mpila Amani me kudilosa na Estere. Yandi fwaka Amani na nsinga ya Amani me sala sambu na Mardoke.

(Yesu nde :) Kansi Mono ke songa beno nde : ‘Zola bambeni na beno.

Samba Nzambi sambu na bantu yina ke monisa beno mpasi.’

Matayo 5 :44

Leso 22. Mfumu pesaka Bayuda nswa kunwanisa bo ya ta meka kufwa bo. Yo yina, bo fwaka ve.

Leso kele na Estere 8-10

I. PREPARASIO SAMBU NA MONITEUR-

🕒 Kikuma ya Leso :

Bana ta bakisa nde Nzambi ke lunda bantu na Yandi. Yo yina, bo ta vanda na boma ya bambeni ve.

♥ Verse ya Kulonguka :

... *“Mfumu Nzambi kele nsadisi na mono. Yo yina mono ta wa boma ve. Nki mambu ya mbi muntu lenda sala mono ?” Baebreo 13 :6*

👤 Bankunga ya kwenda nzila mosi ti leso :

Kwenda na Yesu
Mfumu Zaba Nzila na Mono

II. REVISIO

👤 Kuyindula diaka baleso me luta :

Beto me landa lukanu ya mbi ya Amani. Yandi sosaka kufwa Mardoke ti bantu yonso ya dikanda na yandi, Bayuda. Ntangu yai, mfumu me fwa Amani na nti ya nsinga ya yandi yidikaka sambu na Mardoke.

Kansi probleme mosi me bikala—nsiku ya mfumu me sala. Na kikalulu na bo bantu ya Persia, kana mfumu me sala nsiku, yo fweti salama kaka. Yandi me sonika nde na lumbu mosi, bantu fweti kufwa Bayuda yonso na ntoto na Persia. Ata mfumu yandi mosi lenda balula ve nsiku yina. Kansi, kana bo landa nsiku yina, Mardoke ta fwa, Estere ta fwa, ti bampangi na bo Bayuda yonso na kimfumu ya mvimba ta fwa.

III. KULONGA LESO YAI

➡ Kuyantika :

Yai kele probleme ya ngolo. Nki bo fweti sala ?

🏠 Malongi ya nene ya leso yai (developpement) na banti ya malongi 4 :

22.1 Estere bondilaka mfumu kubalula nsiku ya tubaka nde bo kufwa Bayuda.

📖 Tangila bana : Estere 8 :3-6

3 Ntangu yai Estere kwisaka diaka kusolula na mfumu. Yandi kudilosaka na makulu na yandi ti yantikaka kudidila yandi. Yandi lombaka mfumu kubuya ngindu ya mbi ya Amani kaninaka Bayuda.

4-5...Estere nde : “Mfumu, kana nge zola, tula nsiku na mpila nde mambu ya Amani tubaka, yo kusalama ve na kufwa Bayuda yonso na ntoto yai.

6 Nki mutindu mono lenda kanga ntima kumona bampasi ta bwila bantu na mono, ti kumona mutindu bampangi na mono kibeni ta fwa ?”

? Yula bana

🏠 Bana sala bageste to mwa-senete

👤 Bana yimba ti kina

22.2 Mfumu vandaka ve na mpila kubalula nsiku, kansi yandi pesaka Estere kiyeka kusonga Bayuda nki bo lenda sala.

📖 Tangila bana : Estere 8 :7-8

7-8 Mfumu nde : « Nsiku ya bo sala na zina ya mfumu ti ya bo tula kashe ya kimfumu, ata mono lenda katula yo ve. Kansi nge lenda sonika na Bayuda konso kima ya nge zola, na zina na mono ti kutula mpi kashe ya kimfumu. »

? Yula bana

🏠 Bana sala bageste to mwa-senete

👤 Bana yimba ti kina

22.3 Mardoke sadisaka Estere kusonika mukanda na zina ya mfumu. Yo pesaka Bayuda nswa ya kunwana ti kufwa konso muntu yina ta meka kusala bo mbi. Nsangu yina panzanaka nswalu. Yo pesaka kiese mingi.

📖 Tangila bana : Estere 8 :9-17

9...Mardoke bingaka bakalaka ya mfumu. Yandi songaka bo kusonika mikanda na Bayuda, ti na baguvernere, ti na bantu yonso ya leta...

10 Mardoke sonikaka mikanda yina na zina ya mfumu ti tulaka yo kashe ya kimfumu...

11 Mikanda yango vandaka kutuba nde, mfumu me pesa Bayuda nzila na kuvukana sambu na kunwana na bantu yonso ke zola kunwanisa bo, ti kufwa bo.

13-14 Bo songaka nsiku yango na bantu yonso. Nsiku yai mwanganaka mpi na bantu yonso...

16 Na Bayuda yo pesaka kiese mingi...



Yula bana



Bana sala bageste to mwa-senete



Bana yimba ti kina

22.4 Na lumbu ya bantu yindulaka kufwa Bayuda, bo nwanaka na bantu yina mekaka kufwa bo. Bo tulaka lumbu yina fete sambu na kubambuka mpila Nzambi gulusaka bantu na Yandi.



Tangila bana : Estere 9 :1-2, 19-21

1-2 Kilumbu kumaka. Bayuda vukanaka sambu bo nwanisa konso muntu yina ta zola kusala bo mbi. Yo yina, bantu yonso vandaka kutina bo boma. Ata muntu mosi ve telamaka na ntwala na bo.

19 Yo yina, Bayuda...kumisaka kilumbu yina kilumbu ya kiese ti ya fete...

20-21 Mardoke sonikaka mambu yai yonso na mukanda. Yai vandaka bilumbu ya Bayuda zwaka ngemba. Kilumbu ya kudila kumaka kilumbu ya fete.



Yula bana



Bana sala bageste to mwa-senete



Bana yimba ti kina

>|< Kumanisa Malongi :

Amani yindulaka kumanisa bantu ya Nzambi, Bayuda, dikanda ya Nzambi me sola kubutula Mesia, Ngulusi ya ta futa mfuka ya masumu ya beto yonso. Yandi monaka bonso yandi me nunga. Kansi yandi vilaka kima mosi : Nzambi ke lunda bantu na Yandi. Bayuda fwaka ve, ti lukanu ya Nzambi salamaka kaka na mpila ya Yandi silaka.



Devoir sambu na bakristo :

Nzambi ke lunda beto yonso, bantu na Yandi yina me balula ntima na Yesu Kristo. Beto fweti kuwa

boma ve. Kima ya mbi lenda simba beto ve, kana yo kele lukanu ya Nzambi ve.

Bana bakristo, na mposo yai, kwenda kuzinga na ngemba ti na kikesa.



Verse ya kulonguka :

Bana tuba verse mbala zole fraze na fraze na nima ya nge, moniteur. Na nima, bana marche na cercle na kikesa mingi, kutuba verse mbala zole diaka. Na nsuka, bo tuba yo mbala zole na ndinga ya ngolo, maboko na zulu.



Invitation sambu na bo ya me yamba Yesu ntete ve :

Nge mosi, keti nge kele tula ntima na Nzambi bonso Amani ti Estere, to keti nge me bikala muntu ya mbi bonso Amani ? Beto yonso me butuka bantu ya mbi, bantu ya masumu, bambeni ya Nzambi. Katuka kileki na beto, beto kele na ntima ya benda beto kusala yina ya Nzambi ke zola ve.

Nki mbi nge me sala ? Ketu nge me yindula mbi sambu na muntu ya nkaka bonso Amani salaka ? Ketu nge me finga, swana, yiba ? Ketu nge me seka bantu ya nkaka ? Ketu nge me konda kuyindula nki Nzambi ke zola?

Bima yai yonso kele masumu na ntwala ya Nzambi. Nzambi kele ya longo. Yandi lenda ve ndima masumu kukota na zulu. Yandi fweti zuze bantu ya masumu. Yandi me zenga dezia nde ndola ya masumu kele lufwa mvu ya mvu. Yai kele makambu, mpasi ya nene.

Kansi, kana nge ta balula ntima ti bika nzila ya masumu, kana nge ta yamba Yesu na ntima na nge yonso, Yandi ta gulusa nge. Yandi lenda gulusa nge sambu Mwana na Yandi Yesu Kristo dezia me futa mfuka ya masumu na nge na zulu ya kulunsi.

Keti nge me yamba Yandi dezia ? Kiese ! Kana yo kele kieleka, luzingu na nge ta songa nde nge zaba Yandi. Ketu nge me yamba Yandi ntete ve ? Yandi me sila kuyamba nge bubuyai na fami na Yandi kana nge ta kwisa na Yandi na nzila ya Yesu Kristo.

NSUKA YA LESO 22



Kana nge me manisa leso ti ntangu ke lunga, konso mposo nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.



Mfumu pesaka Estere nswa na kusionika mukanda ya mpa sambu na kusadisa Bayuda. Mardoke sadisaka yandi kusionika yo. Yo pesaka Bayuda nswa na kunwanisa konso muntu ta meka kusala bo mbi.



Leso 22

...“Mfumu
Nzambi kele
Nsadisi na
mono.

Yo yina,
mono ta wa boma ve.

Nki mambu ya mbi
muntu lenda sala
mono ?”

Baebreo 13 :6

Leso 23. Malashi, profete ya nsuka, songaka Bayuda nde Nzambi kele nene. Yandi lunga nde bo sadila Yandi na kieleka.

Leso ke monika na Malashi 1

I. PREPARASIO SAMBU NA MONITEUR-

☉ Kikuma ya Leso :

Bana ta bakisa nde Nzambi kele Mfumu ya nene. Yandi lunga nde beto sadila Yandi na kieleka yonso. Mpidina nene na Yandi ta zabana na ntoto ya mvimba.

♥ Verse ya Kulonguka :

*Mfumu Nzambi, Nzambi Mpungu, ke tuba nde :
« Mwana ke zitisa tata na yandi. Mono kele Tata na beno. Sambu na nki beno ke zitisa Mono ve ? Mono kele Mfumu na beno. Sambu na nki beno ke kumisaka Mono ve ?...Malashi 1 :6a*

🔊 Bankunga ya kwenda nzila mosi ti leso :

Nkembo, Nkembo, Pesa Nzambi Nkembo
Zitisa Zina ya Yesu

II. REVISIO

† Kuyindula diaka baleso me luta :

Estere kele mukanda ya nsuka Nzambi me pesa ya ke songa histoire ya Israele na ntwala kukwisa ya Mesia. Kansi na ntangu ya mambu yai vandaka kusalama, Malashi vandaka kutuba ndinga ya Nzambi na Bayuda na Yeruzalemi. Malashi vandaka nsuka ya baprofete. Na nima na yandi, Nzambi tubaka ve na kati ya bantu. Silence ya bamvula 400 salamaka na ntwala Mesia kwisaka. Beto baka ndambu ntangu kuyindula malongi yai ya nsuka ya Malashi pesaka Bayuda.

III. KULONGA LESO YAI

➔ Kuyantika :

Nzambi me wila Bayuda mawa. Ata Yandi me pesa bambeni na bo mpila ya kumisa bo bampika sambu na masumu na bo, na nima ya bamvula 70, Yandi me vutula mingi na bo na nsi na bo Israele. Yo lomba nde bo vanda na ntima ya lutondo, bo sadila Yandi na ntima na bo yonso. Kansi beto kele banwa-masumu ! Nswalu, bantu yantikaka kusala diaka mambu ya pesaka Nzambi kiese ve.

Na Kuwakana ya Ntama, Nzambi tulaka banganga-Nzambi kutwadisa bisambu ya Bantu ya Israele. Nzambi pesaka Malashi message sambu na bo. Kansi na Kuwakana ya Mpa, beto longuka nde konso mukristo me kuma nganga-Nzambi. Yo kele message sambu na beto yonso bakristo mpi.

🏠 Malongi ya nene ya leso yai (developpement) na banti ya malongi 4 :

23.1 Nzambi songaka Malashi nde banganga-Nzambi vandaka kuzitisa Yandi ve.

📖 Tangila bana :

(Yai verse ya kulonguka bubuyai.) Malashi 1 :6

1 :6a Mfumu Nzambi, Nzambi Mpungu, ke tuba nde :

« Mwana ke zitisa tata na yandi. Mono kele Tata na beno. Sambu na nki beno ke zitisa Mono ve ? Mono kele Mfumu na beno. Sambu na nki beno ke kumisa Mono ve ?

? Yula bana

🏠 Bana sala bageste to mwa-senete

🔊 Bana yimba ti kina

23.2 Nzambi tubaka nde bo vandaka kufinga Yandi na mpila bo pesa bamakabu ya mpamba-mpamba, ti bo vandaka kusaula mesa-kimenga na Yandi.

📖 Tangila bana : Malashi 1 :6b-10

6b Beno ke finga Mono, ebuna na nima beno ke tuba nde : “Nki mutindu beto me finga Nge ?”

7 Beno ke finga Mono ntangu beno ke tula madia ya mpamba-mpamba na zulu ya mesa-kimenga sambu na kupesa Mono makabu. Beno ke finga Mono ntangu beno ke saula mesa-kimenga na Mono.

8 Beno ke nata bambisi ya kifu to ya maladi sambu na kupesa Mono makabu. Keti beno ke yindula yai kele mbote ? Beno kwenda kupesa mbisi ya mutindu yina na guvernere na beno ! Keti yandi ta mona beno kiese ?

10 Mono ke na beno kiese ve ata fioti!”

? Yula bana

🏠 Bana sala bageste to mwa-senete

 Bana yimba ti kina
23.3 Nzambi tubaka nde bo vandaka kufinga Yandi, sambu bo vandaka kutuba nde kusamba Yandi vandaka kulembisa bo.
 **Tangila bana :** Malashi 1 :13

13 Beno ke tuba nde : 'A beto me lemba na mambu yai !' Mpidina beno ke fingaka Mono...

? Yula bana

 **Bana sala bageste to mwa-senete**

 **Bana yimba ti kina**

23.4 Nzambi kele nene. Yandi lunga nde beto zitisa Yandi. Mpidina zina na Yandi ta zabana na ntoto ya mvimba.
 **Tangila bana :** Malashi 1 :14

14 Mono kele Mfumu ya nene. Zina na Mono fweti pesa bantu ya nsi-ntoto yonso boma. Mono Mfumu Nzambi, Nzambi-Mpungu, me tuba.

? Yula bana

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Nzambi songaka Malashi nde Yandi vandaka na kiese ve na banganga-Nzambi ya Israele. Bo bakaka Yandi ve bonso Mfumu ya nene ya lunga kubaka nzitusu. Ntima na bo vandaka na kiese ve kusamba Nzambi. Bo monaka bisambu bonso kima ya mpamba ya vandaka kulembisa bo. O, mawa !

Nzambi lunga baka bisambu na beto. Yandi salaka beto. Konso lumbu Yandi pesa beto moyo, mupepe na Yandi, mwini na Yandi, masa na Yandi, ntoto na Yandi. Yandi me bika beto ve na masumu na beto. Ata na ntangu ya Malashi, na ntwala Yesu Mesia kwisaka, dezia Nzambi vandaka na lukanu nki mutindu ti nki ntangu Yandi ta kwisa.

O, Nzambi kele nene ! Mbote beto pesa Yandi

lukumu. Mbote beto vanda na ntima ya zola sambila Yandi.

 Devoir sambu na bakristo :

Nge mwana mukristo, na mposo ke kwisa, yindula mpila nge ke samba Nzambi. Tula ngolo kusamba Yandi na ntima na nge yonso. Yina ta pesa Nzambi kiese.

 Verse ya Kulonguka :

Bana tuba verse mbala zole fraze na fraze na nima ya nge, moniteur. Nzambi ke songa bo mambu yai na mawa. Yo yina, bo tuba yo mbala zole diaka na ndinga ya mawa mingi. Na nsuka, bo balula ti tuba yo mbala zole diaka.

 Bankunga ya kwenda nzila mosi ti leso :

Nkembo, Nkembo, Pesa Nzambi Nkembo
Zitisa Zina ya Yesu

 Invitation sambu na bo ya me yamba Yesu ntete ve :

Kana nge mona bonso nge zola samba Nzambi ve, mbala ya nkaka nge zaba Yandi ve. Nge me bikala na masumu na nge. Nge me kuma mwana ya Nzambi ntete ve.

Zaba nde nge me sala masumu mingi ti yo kele kunatila nge lufwa mvu ya mvu. Kansi Nzambi zola beto bantu ya mbi mingi. Yandi tindaka Mwana na Yandi ya kitoko Yesu Kristo, Yandi kwisa kubaka ndola ya masumu na beto. Yesu fwaka sambu na beto, ti Yandi telamaka na lufwa.

Bubuyai, konso muntu yina ta mona mawa sambu na masumu na yandi, yina ta zola kubika yo, yandi kaka tula ntima na Yesu. Kana nge me tula ntima na Yesu ntete ve, keti nge ta binga zina na Yandi bubuyai sambu Yandi gulusa nge ?

NSUKA YA LESO 23

 Kana nge me manisa leso ti ntangu ke lunga, konso mposo nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.

Leso 23



Malashi vandaka profete ya nsuka ya Kuwakana ya Ntama. Yandi bingaka Bayuda kuvutuka na Nzambi na kieleka yonso.

Leso 23

**Mfumu Nzambi, Nzambi Mpungu,
ke tuba nde :**

**« Mwana ke zitisa tata na
yandi.**

Mono kele Tata na beno.

**Sambu na nki beno ke
zitisa Mono ve ?**

**Mono kele Mfumu na
beno. Sambu na nki beno
ke kumisa Mono ve ?...**

Malashi 1 :6a

Leso 24. Malashi songaka bo nde bo vanda kwikama na makwela.

Leso ke monika na Malashi 2 :13-16

I. PREPARASIO SAMBU NA MONITEUR-

☉ Kikuma ya Leso :

Bana ta yilama ata na kileki kuzaba nde ntangu bo kwela, bo fweti vanda kwikama na muntu ya bo me kwela.

♥ Verse ya Kulonguka :

Mfumu Nzambi ke tuba nde : “Mono ke zola ve ata fioti nde bakala kubikisa nkento na yandi. Yo yina beno fweti keba nde beno bebisa ve mambu ya nge silaka na nkento na nge. » Malashi 2 :16

👤 Bankunga ya kwenda nzila mosi ti leso :

Nsinga ya Bansinga Tatu (Verse-Beto Kwela Kaka Mukristo)

Nzambi Salaka Beto, Babakala ti bankento

II. REVISIO

† Kuyindula diaka baleso me luta :

Nani profete ya nsuka na Kuwakana ya Ntama ? (Malashi)

Nki malongi Malashi pesaka Bayuda ? (Bo vutuka na Nzambi na ntima na bo yonso.)

Na nima ya Malashi, bamvula ikwa ya Nzambi tubaka ve ? (Bamvula 400)

Na nsuka ya bamvula 400, nki salamaka ? (Yesu Mesia kwisaka)

III. KULONGA LESO YAI

➔ Kuyantika :

Nzambi songaka profete Malashi mambu Yandi zolaka bantu na Yandi kuyidika na luzingu na bo. Mambu ya nkaka bo fweti yidika tadilaka makabu bo vandaka kupesa, ti ntima na bo ntangu bo vandaka kusamba Nzambi. Malashi mpi tubaka sambu na kima mosi ya mfunu—bafami na beto ya makwela.

🌟 Malongi ya nene ya leso yai (developpement) na banti ya malongi 3 :

24.1 Bayuda vandaka kudila, kuyula sambu na nki Nzambi me wa bisambu na bo ve.

📖 Tangila bana : Malashi 2 :13-14a

2 :13-14a Mambu ya nkaka ya beno ke sala, yo yai : Beno ke dila-dila, beno ke fulusa mesa-kimenga ya Nzambi na masanga na beno, sambu Yandi ke ndima diaka ve makabu ya beno ke natila Yandi. Ebuna beno ke yula nde : “Sambu na nki mpidina ?”

? Yula bana

🏠 Bana sala bageste to mwa-senete

👤 Bana yimba ti kina

24.2 Malashi nde : Nzambi me ndima ve bisambu na bo sambu bo vandaka kwikama ve na makwela na bo.

📖 Tangila bana : Malashi 2 :14b-15

14b Yo kele kaka sambu Yandi zaba nde beno me bebisa mambu ya beno silaka bankento na beno ntangu beno vandaka baleki. Yandi vandaka nkento na nge, kansi nge me bebisa mambu ya nge silaka yandi, ata nge tubaka yo na meso ya Nzambi. »

15 Keti nge ti yandi, Nzambi vukisaka beno zole ve kukuma muntu mosi ? Sambu na nki Yandi salaka mpidina? Beno keba nde muntu mosi ve bebisa mambu ya yandi tubaka na nkento na yandi na jenese na bo.

? Yula bana

🏠 Bana sala bageste to mwa-senete

👤 Bana yimba ti kina

24.3 Malashi nde : Nzambi ke na kiese ve nde bantu ya me kwela bikisa nkento to bakala na bo. Mbote bo vanda kwikama.

📖 Tangila bana : Malashi 2 :16 (Yai kele verse ya kulonguka bubuyai mpi.)

16 Mfumu Nzambi ke tuba nde : “Mono ke zola ve ata fioti nde bakala kubikisa nkento na yandi. Yo yina beno fweti keba nde beno bebisa ve mambu ya nge silaka na nkento na nge. »

? Yula bana

🏠 Bana sala bageste to mwa-senete

Bana yimba ti kina

>|< Kumanisa Malongi :

Bayuda vandaka kudila, kuyula sambu na nki Nzambi zolaka ve kuwa bo. Yandi songaka Malashi sambu na nki Yandi ndimaka ve bisambu na bo. Reso mosi vandaka sambu bo vandaka ve kwikama na muntu ya bo me kwela.

Nzambi zola beto kuzitisa bansilulu ya beto me sila na makwela. Yandi zola ve bantu kukatula muntu ya bo me kwela. Nzambi kele kwikama. Yo yina Yandi zola bantu na Yandi kuvanda mpi kwikama.

Devoir sambu na bakristo :

Bana bakristo, ntangu sambu na beno kukwela me lunga ntete ve. Kansi ata ntangu yai na kileka na beno, mbote kusimba ngolo mabanza nde ntangu nge kwela, nge ta vanda kwikama. Bakala, nge ta katula nkento na nge ve. Nkento, nge ta bika bakala na nge ve. Nge ta bambuka konso lumbu mpila nge me sila na ntwala ya Nzambi. Yina ta tunga fami ya kiese, ti Nzambu ta wa bisambu na beno.

Verse ya Kulonguka :

Bana tuba verse fraze na fraze mbala zole na nima ya nge, moniteur. Bo ta tula maboko zole na zulu ya ntima, ti tuba yo mbala zole diaka. Bo ta nangula maboko na cercle bonso bo ke simba muntu ya luzolo, bo ta tuba yo mbala zole na nsuka.

Bankunga ya kwenda nzila mosi ti leso :

Nsinga ya Bansinga Tatu (Verse-Beto Kwela Kaka Mukristo)
Nzambi Salaka Beto, Babakala ti bankento

Invitation sambu na bo ya me yamba Yesu ntete ve :

Beno me kwela ntete ve, ebuna beno me sala ntete ve masumu ya Bayuda salaka na mambu yai ya makwela. Kansi, bana ya nkaka me sakana na nitu ya mwana ya nkaka bonso bakala ti nkento ya makwela. Yina kele mbote ve. Yo kele masumu.

Kansi ata kana nge me sala yo ve, zaba mbote nde nge me sala masumu ya nge. Yindula nki mambu nge me sala ya me pesa Nzambi kiese ve. Ketu nge me yiba ? Me menga muntu ? Me finga ? Me swana ? Ketu nge me tuba zina ya Nzambi na mpila mosi ya lunga ve ? Ketu nge me konda kuzola Yandi na ntima na nge yonso ? Nzambi zola beto kulanda nzila na Yandi, kansi Bible ke tuba nde « Beto yonso bonso mameme me yungana, konso muntu na nzila na yandi...” (Yezaya 53 :6). Nsuka to mfuka ya masumu kele nki ? Lufwa. Lufwa ya kimpeve, lufwa mvu ya mvu.

Kansi Bible tuba mpi nde Nzambi me tula na zulu ya ntu na Yandi Yesu Mesia, mbi na beto yonso. Yesu fwaka sambu na kufuta mfuka na mbi na beto. Yandi mpi telamaka na lufwa.

Konso muntu ya ndima Yandi ti pindula mabanza na yandi na Yesu, Nzambi ta kitula yandi mwana na Yandi. Ketu nge kele na nzila ya Yesu bubu yai ?

NSUKA YA LESO 24

 Kana nge me manisa leso ti ntangu ke lunga, konso mposho nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.

Leso 24

Malashi nde : Nzambi zola beto kuvanda kwikama na makwela na beto.



Leso 24

Mfumu Nzambi...ke tuba nde :

**« Mono ke zola ve ata
fioti nde bakala
kubikisa nkento na
yandi.**

**Yo yina beno fweti keba
nde beno bebisa ve
mambu ya nge silaka na
nkento na nge. »**

Malashi 2 :16

Leso 25. Malashi songaka bo nde Nzambi ke sakumuna bayina ke zitisa Yandi na makabu.

Leso ke monika na Malashi 3 :6-12

I. PREPARASIO SAMBU NA MONITEUR-

Kuyidika na ntwala :

Sambu na kusonga ngindu ‘mosi na kumi’, nata bima kumi ya kele kiteso mosi. Yo lenda vanda matadi, malala, banguba, mbongo, to konso kima. Nge ta sadila yo na 25.2.

☉ Kikuma ya Leso :

Bana ta pesa makabu na kiese sambu yai kele mpila bo lenda tonda Nzambi sambu na mambu yonso ya mbote Yandi me sadila bo.

♥ Verse ya Kulonguka :

Beno nata mosi ya kumi ya bima yonso na Nzo-Nzambi mutindu nsiku ke tuba. Beno meka Mono Mfumu Nzambi na mambu yai, ebuna Mono ta nokisila beno lusakumunu mingi-mingi. Malashi 3 :10

👤 Bankunga ya kwenda nzila mosi ti leso :

Beno Pesa Makabu
Nge Mene Lunga

II. REVISIO

† Kuyindula diaka baleso me luta :

Nzambi me tinda profete ya nsuka na bantu ya Israele—profete Malashi. Malashi kele kutuba bandinga ya nsuka na Bayuda yina me vutuka na Yeruzalemi. Na nima na yandi, Nzambi ta tuba diaka ve na munoko ya baprofete tii ntangu Yoane Baptiste ta songa bantu nde kukwisa ya Mesia Yesu kele penepene. Bamvula 400 !

III. KULONGA LESO YAI

➔ Kuyantika :

Nki ya nkaka Malashi tubaka na Bayuda ? Nki mambu ya mfunu mingi Nzambi zolaka bo kuzaba ?

🌟 Malongi ya nene ya leso yai (developpement) na banti ya malongi 4 :

25.1 Malashi bingaka bantu kuvutuka na Nzambi sambu Yandi mpi vutuka na bo.

📖 Tangila bana : Malashi 3 :6-7a

3 :6 « Mono kele Mfumu Nzambi. Mono ke bikalaka kaka Mfumu Nzambi....

7a Mutindu vandaka ntete bankaka na beno, beno mpi me buyaka kulanda bansiku na Mono. Beno ke sadilaka yo mpi ve. Beno kwisa vutuka na Mono, ebuna Mono mpi ta vutuka na beno...”

? Yula bana

🏠 Bana sala bageste to mwa-senete

👤 Bana yimba ti kina

25.2 Mpila mosi ya lenda songa nde ntima na bo me vutuka na Nzambi kele mpila bo nata makabu. Bo nata na kieleka, kansi na luvunu ve.

[Moniteur, songa bima kumi nge me yidika. Tanga bima yina mosi-mosi ti bana. Baka kima mosi, ti songa bo nde Nzambi me tuba nde, kima mosi na kati ya konso kumi, yo kele makabu na Yandi. Kumi na mosi, beto ke binga yo ‘dime’. Beto mpi lenda yika makabu na zulu na yo, kansi beto yantika na kima mosi na konso kumi, makabu ya Nzambi.]

📖 Tangila bana : Malashi 3 :7b-8

7b-8 « Beno ke yula nde : ‘Nki beto fweti sala sambu na kuvutuka na Nge ?’

Ebuna Mono mpi ke yula nde : ‘Keti kele mbote muntu kukusa Nzambi ? Kele ve, kansi beno ke kusa Mono.’

Beno nde : ‘Nki mutindu ?’

Mono nde : ‘Beno ke kusa Mono ntangu beno ke natila Mono makabu ya bima ya bilanga ya beno me kabisa na ndambu kumi, kupesa Mono ndambu mosi, ti ntangu beno ke pesaka Mono mpi makabu ya nkaka.’

25.3 Bo nata makabu yonso ya Nzambi me lomba.

📖 Tangila bana : (Yai kele luyantiku ya verse na beto ya kulonguka.) Malashi 3 :10a

10a Beno nata mosi ya kumi ya bima yonso na Nzo-Nzambi mutindu nsiku ke tuba...

? Yula bana

🏠 Bana sala bageste to mwa-senete

👤 Bana yimba ti kina

25.4 Nzambi lombaka bo kumeka Yandi na mambu ya kupesa makabu. Yandi silaka kusakumuna bo kana bo lemfuka.

 **Tangila bana :** Malashi 3 :10b-12

10b Beno meka Mono Mfumu Nzambi na mambu yai, ebuna Mono ta nokisila beno lusakumunu mingi-ming.

11 Mono ta sala na mpila nde baniamu kufwa ve bima ya beno ya bilanga. Bilanga na beno ta kufuluka mingi. Mono Mfumu-Nzambi, Nzambi-Mpungu me tuba.

12 Ebuna bantu ya nsi-ntoto yonso ta ndima nde Mono me sakumuna beno, sambu ntoto na beno ta vanda ntoto ya mbote na kuzinga. Mono Mfumu Nzambi Mpungu me tuba. »

 **Yula bana**

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Malashi bendaka Bayuda kuvutuka na Nzambi na ntima na bo yonso. Kansi kima ya kele na ntima fweti monika na mpila bantu ke sala. Kima mosi ya lenda songa nde bo me vutuka na Nzambi ta vanda nde bo bika kukusa na mambu ya makabu. Bo yantika kupesa makabu na mpila Nzambi me tuba. Yo yina, bo yantikaka na kupesa mosi ya kumi ya bima yonso Nzambi ta pesa bo.

Nki mutindu bantu bubu yai lenda kusa na mpila bo ke pesa makabu ?

[Moniteur, Tangila bana bambandu yai, ebuna bo tuba 'Makabu ya Kukusa' to 'Makabu ya Kieleka.]

- Muntu sala bonso yandi ke pesa makabu, kansi kima kele ve na diboko.
- Muntu me zwa francs makumi zole kansi yandi pesa kaka franc mosi.
- Muntu kele na kaka francs kumi, ebuna yandi pesa mosi na kiese.
- Mwana pesa mbongo ya ntama ya mpamba, ya bantu ke sadila diaka ve.
- Mwana pesa orange, kansi yo kele ya kupola.
- Muntu yiba mbongo kupesa bonso makabu.

 **Devoir sambu na bakristo :**

Bana bakristo, Nzambi me sala beto mambote mingi. Yandi lunga kubaka makabu na beto. Na mposho yai, sosa mwa-kisalu nge lenda sala ya lenda pesa nge ndambu sambu na makabu.

♥ Verse ya Kulonguka :

Bana tuba verse fraze na fraze mbala zole na nima ya nge, moniteur. Na nima, yandi yika bageste sambu na nombre kumi ti nombre mosi, bo tuba yo mbala zole diaka. Na nsuka, bo marche ti kina bonso bo ke pesa makabu, bo tuba yo mbala zole diaka.

🕯 Bankunga ya kwenda nzila mosi ti leso :

Beno pesa makabu
Nge Mene Lunga

✚ Invitation sambu na bo ya me yamba Yesu ntete ve :

Kupesa makabu na kiese ke songa luzolo na beto na ntuala ya Nzambi. Kansi yo lenda gulusa beto ve. Yo lenda katula masumu na beto ve. Na ntoto ya mvimba, mbongo ke lunga ve kusumba mpululu na beto. Yina lombaka ntalu ya nene. Yesu fwaka sambu na kufuta mfuka na masumu na beto.

Bible ke tuba nde Nzambi futaka menga ya ntalu ya Mwana na Yandi, Yesu (1 Piere 1 :18-19). Yandi mpi tedimisaka Yesu na lufwa (1 Piere 1 :20).


Tula ntima ve nde nge ta guluka sambu nge ke pesa makabu, to nge kele muntu ya mbote. Yina ta lunga ve na ntuala ya Nzambi. Tula ntima kaka na Yesu Kristo, yina pesaka makabu ya menga na Yandi sambu na kugulusa nge.

Kana nge me tula Yandi ntima dezia, na minute yina, nge kumaka mukristo. Kana nge me tula Yandi ntima ntete ve, kaka na minute ya nge sala yo, nge ta kuma mukristo.

NSUKA YA LESO 25

 Kana nge me manisa leso ti ntangu ke lunga, konso mposho nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.

Leso 25



Beno nata mosi ya kumi

ya bima yonso

na Nzo-Nzambi

mutindu nsiku ke tuba.

Beno meka Mono Mfumu

Nzambi na mambu yai,

ebuna Mono ta nokisila

beno balusakumunu

mingi-mingi...

Malashi 3 :10

Leso 26. Bantu ya kwikama ankurazana bo na bo na mambu ya kimpeve.

Leso ke monika na Malashi 3 :16-17

I. PREPARASIO SAMBU NA MONITEUR-

© Kikuma ya Leso :

Bana ta pesa ankurazema na bakristo ya nkaka sambu beto yonso bakristo landa Nzambi na ntima na beto yonso.

♥ Verse ya Kulonguka :

Bantu yina vandaka kuzitisa Mfumu Nzambi, bo kutubana bo na bo mbala mingi. Ebuna Mfumu Nzambi waka bo, ti Yandi sonikaka yo na mukanda na Yandi. Malashi 3 :16a

👤 Bankunga ya kwenda nzila mosi ti leso :

Beto Bakristo Sadisana
Beto Zolana

II. REVISIO

† Kuyindula diaka baleso me luta :

Beto me kuma na nsuka ya Kuwakana ya Ntama. Nzambi me songa mambu mingi sambu na kukwisa ya Mesia. Yandi ta butuka na fami ya Bayuda. Na nima ya Malashi, bo kotaka bamvula 400 ya kuinga kukwisa na Yandi kukonga Nzambi kutuba diaka. Na bamvula yina, bo ta vanda na mfunu ya ankurazema mingi.

III. KULONGA LESO YAI

➔ Kuyantika :

Beto yonso keke na mfunu ya ankurazema. Bubu yai bana ta mona mpila bantu ya Nzambi zwaka ankurazema na ntangu ya kuinga Mesia.

🌟 Malongi ya nene ya leso yai (developpement) na banti ya malongi 3 :

26.1 Bantu ya Nzambi tubaka bo na bo sambu na kupesana ankurazema.

📖 **Tangila bana :** Malashi 3 :16a

16a Bantu yina ke zitisaka Mfumu Nzambi, bo vandaka kutuba bo na bo, ebuna Mfumu

Nzambi vandaka kuwa bo.

? Yula bana

🏠 **Bana sala bageste to mwa-senete**

👤 **Bana yimba ti kina**

26.2 Bo sonikaka liste ya bantu ya nkaka ya zolaka Nzambi.

📖 **Tangila bana :** Malashi 3 :16b

16b Na meso na Yandi, bo sonikaka bazina ya bantu yina ke zitisaka Yandi ti kumisaka zina na Yandi, sambu na kubambuka bo.

? Yula bana

🏠 **Bana sala bageste to mwa-senete**

👤 **Bana yimba ti kina**

26.3 Nzambi ndimaka bantu yina zitisaka Yandi ti wilaka bo mawa.

📖 **Tangila bana :** Malashi 3 :17

3 :17 Mfumu Nzambike tuba nde : « Bantu yai, na kilumbu ya Mono ta sala mambu ya Mono kanaka, bo ta vanda bantu na Mono mpenza. Mono ta wila bo mawa mutindu tata ke wilaka mawa mwana yina ke sadilaka yandi.

? Yula bana

🏠 **Bana sala bageste to mwa-senete**

👤 **Bana yimba ti kina**

>|< Kumanisa Malongi :

Bayuda vandaka kukota ntangu ya kuinga kukwisa ya Mesia. Bo vandaka na mfunu ya ankurazema. Na bilumbu yina, Nzambi tindaka diaka ve profete sambu na kupesa bo enkurazema. Kansi ata kukonda profete, bantu yina zolaka Nzambi, bo tubaka bandinga ya enkurazema bo na bo.

Bo sonikaka liste ya bazina ya bantu ya nkaka ya zolaka Nzambi. Mpidina bo zabaka nde bo me bikala ve bo mosi. Bo yindulaka bantu ya nkaka ya zolaka mpi Nzambi bonso bo.

Nki beno banza ? Mono banza bo mpi sambilaka bo na bo Nzambi. Bo zabaka nde ntangu ta kwisa nde Nzambi ta lungisa nsilulu na Yandi kutindila bo Mesia, Mvulusi.

 Devoir sambu na bakristo :

Bana bakristo, nki mutindu nge tuba na bakristo ya nkaka ? Ketu kutuba na nge pesa bo ankurazema to dekurazema ? Ketu nge me sonika liste ya bakristo ya nkaka ya nge ke tula na bisambu sambu Nzambi kusadisa bo ? Na mposho yai ke kwisa, tula ngolo kusala yonso sambu na ku ankuraze bampangi na nge ya ke landa Yesu Kristo.

 Verse ya Kulonguka :

Bana tuba verse fraze na fraze mbala zole na nima ya nge, moniteur. Na nima, bo tuba yo bo na bo mbala zole. Na nsuka, bo sala cercle, bo balula, mbala zole ya nsuka, bo songa bwala ya mvimba na ndinga ya ngolo.

 Bankunga ya kwenda nzila mosi ti leso :

Beto Bakristo Sadisana
Beto Zolana

 Invitation sambu na bo ya me yamba Yesu ntete ve :

Na nsuka ya mikanda ya Kuwakana ya Ntama, bantu vandaka kukiya kukwisa ya Yesu Mesia. Bubuyai, beto zaba nde dezia Yandi me kwisa.

Nzambi me lungisa bansilulu yonso na Yandi. Ntangu yai, mpulusu ke bikala na diboko na nge. Ketu nge me ndima Yesu, yina kwisaka sambu na nge ? Ketu nge me yamba Yandi na maboko yonso zole ?

Kana nge zaba ve mbote-mbote, zaba nde Yesu ke kinga nge. Kana nge me lemba ya nzila ya masumu, kana nge zola bika yo ti kota nzila ya moyo, kwisa na Yesu bubuyai. Lomba Yandi kugulusa nge. Yesu ke buyaka ve bo ya kwisa na lukwikilu na Yandi.

Bambuka nde bubu yai to konso mposho, kana nge ke na mfunu ya kuyamba Yesu, kaka bikala na nima ya ecodim. Beto kele awa sambu na kusadisa nge.

NSUKA YA LESO 26

 Kana nge me manisa leso ti ntangu ke lunga, konso mposho nge lenda baka kitini ya ntangu kulonga mikanda ya Bible ndambu-ndambu. Tala nsuka ya mukanda yai sambu na bangindu.

**Leso 26**

Na nima ya
profete ya
nsuka, bantu
kingaka mingi
kukwisa ya
Mesia.
Ntangu yina,
bantu ya
Nzambi
vandaka
kutuba bo na
bo bandinga
ya
ankurazema.

**Bantu yina vandaka
kuzitisa Mfumu Nzambi,
bo tubanaka bo na bo
mbala mingi.**

**Ebuna Mfumu Nzambi
waka bo, ti Yandi sonikaka
yo na mukanda na Yandi.**

Malashi 3 :16a

Leso 27. REVISIO ya Kuwakana ya Ntama I

Kuyidika na ntwala :

Sambu na bansaka, sonika mikanda ya Bible
Kuyantika tii na 1 Bantotila na bisono ya nene na
zulu ya bitini ya bapaier. Yidika bitini ya papier
diaka ya ke tuba mambu yai : malongi ya nene,
muntu ya nene, mukanda na nima na yo.

Nata Bible ya Kituba. Longuka bankunga ya
Mikanda ya Bible.

Kikuma ya Leso ya Revisio :

Beto bambuka diaka mikanda ya Kuwakana ya
Ntama ti malongi ya nene beto ke mona na konso
mukanda.

Mikanda ya Kulonguka :

(Moniteur, sadila bakarte ya ntangu na nsuka ya
mukanda yai.)

Na sika ya verse, bana ta tuba bazina ya mikanda ya
Kuwakana na ordre biblique. Na kati ya Bible, beto
ke kabisa mikanda na bimbuka tatu kulanda nki
mutindu mukanda ikele :

Mikanda ya Histoire (Ya Moize ti ya Bayuda na
ntoto na bo, Israele)

Mikanda ya Poesi

Mikanda ya Baprofete

[Moniteur, bana repeter bimbuka yai mbala tatu.]

Na kati bimbuka yina tatu, beto mpi kabisa mutindu
yai :

Mikanda ya Histoire :

Mikanda ya Moize

Mikanda ya Histoire ya bantu ya Israele na
ntoto na bo, Israele

[Moniteur, bana repeter bimbuka yai mbala tatu.]

Mikanda ya Poesi :

Mikanda ya Baprofete :

Baprofete ya sonikaka mingi

Baprofete ya sonikaka ndambu

[Moniteur, bana repeter bimbuka yai mbala tatu.]

Beto tala bimbuka yai mosi-mosi. Beto bambuka
konso mukanda mosi-mosi. Beto bambuka malongi
ya nene yo ke pesaka, ti bantu ya nene na mukanda

yina. Bubuyai beto ta landa kaka ndambu, ebuna
na mposo ke kwisa, beto ta manisa.

Mikanda ya Histoire :

Mikanda ya Moize

[Moniteur, ntete bana tuba kaka bazina ya mikanda,
mbala tatu. Na nima, yika malongi ya nene-nene ya ke
monika na konso mukanda.]

Kuyantika

Luyantiku ya bima yonso (Adam ti
Eva)

Masa ya fulusaka ntoto (Noa)

Kupanzana na Babele

Luyantiku ya Israele (Abrahami, Isaki ti
Yakobi)

Israele kota na Ezipte (Yozefi)

Kubasika

Kimpika na Ezipte

Kubasika na Ezipte (Moize)

Bansiku Kumi (Moize)

Nzo ya Nzambi ya Ntenta (Aroni)

Levi

Bansiku ya bisambu

Bansiku ya makabu (Aroni ti dikanda
ya Levi)

Kutanga

Kutambula na Nseke (Moize)

Kulonga

Kubambuka bansiku ti mambote ya
Nzambi na ntwala kukota nsi ya
Nzambi silaka bo (Moize)

Mikanda ya Histoire na nima ya Moize

Yozue

Kukota na nsi Nzambi silaka bo
(Yozue)

Bazuze

Bantu yonso salaka na mpila na bo mo
Bazuze twadisaka (Gedeon, Samsoni)

Ruti

Fami mosi ya kinzambi na ntangu ya
Bazuze (Ruti)

1 Samuele

Kimfumu mosi (Mfumu Saule, Davidi)

2 Samuele

Kimfumu mosi (Luyalu ya Davidi)

1 Bantotila (to Bamfumu)

Kimfumu mosi (Luyalu ya Salomo,
Tempelo ya Lukumu)

(Profete Elia)

Kukabana ya Kimfumu

[Moniteur, na Bible ya Kituba, songa bana liste ya mikanda ya Bible na luyantiku ya Bible. Songa bo nde liste yina ke pesa nombre ya page sika konso mukanda kele kuyantika.]

Yimba nkunga 'Mikanda ya Moize' ti 'Mikanda ya Histoire'

Bansaka sambu na mikanda yai

➤ **Tula mikanda na ndonga**

Baka bitini ya papier, konso kitini ti mukanda mosi ya Bible ya kusonika na bisono ya nene. Pesa bana mosi-mosi, na ndonga Biblique. Konso ntangu nge pesa kitini ya papier, bana yonso repeter yo. Na nima, binga bana mosi-mosi kukwisa na ntwala ya bana ya nkaka. Bo repeter konso mukanda diaka ntangu nge binga bo. Na nima, balula-balula bo. Bo sosa kukwenda na ndonga diaka. Kana bo me nunga, bana tanga mikanda yina diaka.

- Sadila bitini ya papier yina diaka, ti kimvuka ya bapapier ya ke tuba 'malongi ya nene', etc. Balula bapapier ya mikanda. Balula mpi kimvuka ya zole ya bapapier. Kabisa bana na ekipes zole ti konso ekipe sola zina na bo sambu na competition. Bana zole ya ekipe ya ntete ta baka papier mosi ya ke tuba mukanda, ti papier mosi ya ke yula kestio sambu na yo. Bo tanga yo. Kana bo lenda pesa mvutu, bo baka 100 points. Ekipe ya zola landa kusala kiteso mosi. Konso ekipe baka tour na bo tii ekipe mosi lungisa bapoint 1,000. Ekipe ya ntete kubaka bapoint 1,000 kele champion.

Variation : Pesa konso ekipe moto (bo mosi dessiner moto na tableau to na papier). Konso mbala bo pesa mvutu ya mbote, bo

pusa na ntwala 2 cm. Destination kele Kisangani (to cité ya nkaka ya nene). Ekipe ya ntete kukuma na destination kele champion.

Kubinga bavidi kukwisa na Yesu :

Ata na mukanda ya ntete, Kuyantika, Nzambi me sila nde Mesia Mvulusi ta kwisa. Beto zaba nde Yandi ta butuka kaka na nkento kukonda bakala kuzaba yandi. Beto zaba nde Satana ta nwanisa Yandi, kansi Mesia ta nunga. Beto zaba nde Yandi ta butuka na dikanda ya Abrahama. Na nima, beto kwisa kuzaba nde Yandi ta butuka mpi na dikanda ya mfumu ya kuluta nene, Mfumu Davidi. Na profete Mishe, beto bakisa nde Yandi ta butuka na bwala Betelehemu. Ntangu yonso ya Kuwakana ya Ntama, bantu vandaka kukungira Yandi.

Mesia yina kele Yesu Kristo. Kana nge me yamba Yandi ntete ve, keti nge ta yamba Yandi bubu sambu nge kuguluka ?

NSUKA YA LESO 27

Leso 28. REVISIO ya Kuwakana ya Ntama II

Kikuma ya Leso ya Revisio :

Beto bambuka diaka mikanda ya Kuwakana ya Ntama ti malongi ya nene beto ke mona na konso mukanda.

Revisio :

Bana meka kutuba bimbuka ya nene ya mikanda ya Kuwakana ya Ntama ti mikanda na ndonga, yantika na 1 Bantotila tii Estere.

Mikanda ya Bible :

(Moniteur, sadila bakarte ya ntangu na nsuka ya mukanda yai.)

Beto landa diaka kiteso mosi bonso beto salaka na mposo me luta kumanisa mikanda ya Kuwakana ya Ntama :

Mikanda ya Histoire ya Bayuda na Ntoto na Bo, Israele

Beto me longuka dezia :

Yozue
Bazuzi
Ruti
1 Samuele
2 Samuele
1 Bantotila (to Bamfumu)

Beto landa diaka kulonguka mikanda ya histoire yai :

[Moniteur, ntete bana tuba kaka mikanda yina, mbala tatu. Na nima, vutuka kubambuka malongi ti bantu ya nene na kati ya mikanda yina.]

2 Bantotila

Kukabana ya Kimfumu
Kimfumu ya Israele na nord, Yuda na sud
(Yeroboami) [Israele]
(Profete Elia)
(Profete Elisa)
(Akabi ti Yezebeli) [Israele]
(Yozafati) [Yuda]
(Yoashi) [Yuda]
(Ozias) [Yuda]
Kubwa ya Israele 722 Av. JC
Kimpika na Asiria

(Ezekiasi) [Yuda]
(Yozias) [Yuda]
(Yoyakimi) [Yuda]

(Sedasi) [Yuda]

Kubwa ya Yuda 586 Av. JC
Kimpika na Babilone

1 Bansangu

Malongi kwenda nzila mosi ti mikanda ya 1 ti 2 Bantotila, kansi bo sonikaka ya nima, sambu na kubambuka yo.

2 Bansangu

Esdrasi

Kuvutuka ya Bayuda na Yeruzalemi
Kutunga mesa-kimenga
(Esdrasi)

Nehemia

Bayuda ya nkaka vutuka na Yeruzalemi
Kutunga diaka Nzo-Nzambi
(Nehemia)

Estere

Bayuda ya me bikala na kimpika na Persia
Estere kumaka mfumu-nkento
Estere gulusaka bantu na yandi
(Estere)
(Mardoki)
(Amani)

Bansaka :

Sala bansaka bonso nge salaka na mposo me luta.

Mikanda ya poesi ti profesii :

Yai ke manisa mikanda ya histoire ya Kuwakana ya Ntama. Mikanda ya ke bikala kele poesi ti profesii ya bantu sonikaka na ntangu ya histoire yai vandaka kusalama. Na baleso na beto, beto me mwanga mikanda yina na kati-kati ya ntangu ya yo salamaka.

Mikanda ya poesi :

Yobi

Na ntangu ya mukanda ya Kuyantika
Na ntangu ya Abrahami
Kestio--Sambu na nki bantu ya mbote mona mpasi ?

(Yobi)

Bankunga

Na ntangu ya Davidi
 Davidi sonikaka kuluta mingi
 Bankunga ya bo yimbaka
 (Davidi)

Bingana

Salomo sonikaka to vukisaka
 Bingana ya mayele
 (Salomo)

Longi

Salomo sonikaka yo
 Na nsuka ya moyo na yandi
 Kukonda Nzambi, bima yonso mpamba

Kitoko

Salomo sonikaka yo
 Luzolo bakala-nkento

Mikanda ya profeti :Baprofete ya sonikaka mingi:**Yezaya**

Na ntangu ya bamfumu
 Sonikaka mingi sambu na Mesia

Yeremia

Na ntangu ya nsuka ya bamfumu

Mawa

Yeremie sonikaka
 Kudila kubwa ya Yeruzalemi

Ezekiele

Na ntangu ya kimpika na Babilone
 Mikwa ya kufwa kutelama diaka
 Bavisio mingi

Daniele

Na ntangu ya kimpika na Babilone
 Nzambi pesaka cado ya kutendula bandosi
 Ntangu ya Mesia ta kwisa
 Kimfumu ya Persia nungaka Kimfumu ya
 Babilone

Mikanda ya baprofete ya sonikaka ndambu :

Bo yonso na ntangu ya bantotila (bamfumu) ti
 kimpika na Babilone-Persia. Bo sonikaka sambu na
 Israele-Yuda ti bansi ya nkaka. Mingi na bo mpi
 songaka mpila ya Mesia ta kwisa.

Beto ta kaka longuka bazina na bo.

Ozea**Joele****Amosi****Abdias****Yonasi****Mishe****Nahumi****Habakuki****Sofonia****Agai****Zakaria****Malashi****Kumanisa :**

Na Kuwakana ya Ntama, beto me mona mpila
 Nzambi salaka ntoto, bima yonso ti bantu mbote.
 Beto me mona mpila bibuti na beto ya ntete
 pesaka Nzambi mukongo ti buyaka kulemfuka na
 Yandi. Beto me mona mpila bana na bo yonso me
 landa kusala masumu mutindu na mutindu, diaka ti
 diaka. Beto me mona bampila ya nkaka Nzambi
 pesaka bo ndola.

Beto me mona mpila Nzambi silaka kutindila beto
 Mesia, Mvulusi ya ta futa mfuka ya masumu na
 beto. Beto me mona mpila Yandi solaka dikanda
 mosi, Israele, kubutika beto Mvulusi mpi kupesa
 beto Ndinga na Yandi. Yo yantikaka na Abrahama.
 Beto me landa histoire ya bantu yina. Beto me
 mona mpila bo kubwaka diaka ti diaka. Bonso beto
 yonso.

Awa beto me manisa Kuwakana ya Ntama. Bantu
 kele kuinga kukwisa ya Mesia. O, beto kele na
 privilaz ya nene sambu beto zinga na ntangu na
 nima Yesu me kwisa dezia ! Beto ke kinga Yandi
 diaka ve. Yo lombi beto kaka kuyamba Yandi,
 kukwikila Yandi, kutambula na nzila na Yandi. Ketu
 nge me kota na nzila na Yandi ? Kana ve, ketu nge
 ta kota bubu ?

NSUKA YA LESO 32 TI NSUKA YA KUWAKANA YA
 NTAMA

Bangindu sambu na kulonga mikanda ya Bible

Atasio, Moniteur !

Beto ke longa bana mikanda ya Bible ndambu-ndambu, na nima ya konso leso kana ntangu ke lunga. Awa beto ke pesa bangindu nki bitini ya fioti beno lenda longa. Na mukanda yai, beto ke manisa Kuwakana ya Ntama. Yo yina, na nsuka, beto zola bana kutuba mikanda yonso ya Kuwakana ya Ntama na bimvuka na bo.

Kurevise mikanda ya Moize :

Bana tuba mikanda 5 ya Moize na mpila ritimika: Kuyantika Kubasika Levi Kutanga Kulonga. Na mikanda yai beto mona kuyantika na bima yonso. Beto mona kukota ya masumu, ya bebisaka ntoto ya kitoko ya Nzambi salaka. Beto mona mpi kuyantika ya dikanda ya Nzambi ta sadila kupesa beto Ndinga na Yandi, mpi kupesa beto Mesia—dikanda ya Israele (Bayuda). Bible ti Mesia kele sambu na kaka bo ve, kansi sambu na bantu yonso.

Kuyimba mikanda ya Moize :

Bana yimba mikanda ya Moize na nkunga yai :

Mikanda ya Moize, Moize, Moize,

Mikanda ya Moize—Bansiku-Nzambi !

Kuyantika, Kubasika, e Levi, Kutanga

Ye nsuka ke Kulonga, Mikanda ya Moize

Kurevise mikanda ya histoire :

Bana tuba mikanda 12 ya histoire na ritima:

Yozue Bazuzi Ruti BaSamuele Bantotila

Bansangu Esdrasi Nehemia Estere.

Mikanda yai landa diaka histoire ya Bayuda, yantika na kukota na ntoto ya Nzambi silaka bo, ti kuzinga na bo na ntoto yina, masumu na bo, zuzema na bo (kimpika 70 na nsi ya ntama), kuvutuka na bo na ntoto na bo, ti mpila Nzambi lundaka ata bo ya bikalaka na nsi ya nkaka. Mikanda ya Moize ti ya Histoire kele bonso Banti ya nene ya Kuwakana ya Ntama.

Kuyimba mikanda ya Histoire :

Bana yimba mikanda ya histoire na nkunga yai :

Mikanda ya histoire, histoire, histoire,

Mikanda ya histoire—Histoire ya Bayuda !

Yozue, Bazuzi, ye Ruti, ti BaSamuele,

Ye Bantotila, Bansangu, ye Esdrasi

Kutuba mikanda ya poesie:

Bana tuba mikanda 5 ya poesie na ritima :

Yobi, Bankunga, Bingana, Longi, Kitoko.

Bana yimba mikanda ya poesie:

Bana yimba mikanda 5 ya poesie na nkunga yai :

Mikanda ya poesie, poesie, poesie

Mikanda ya poesie, bankunga ya Nzambi

Yobi ya kangaka ntima, Bankunga ya Davidi,

Bingana ya mayele, 'Buna Longi ye Kitoko.

Yai yonso mikanda tanu, mikanda ya poesie.

Bantu ya Nzambi sonikaka mikanda yai na bantangu ya nkaka. Yobi kele mukanda mosi ya ntama. Beto banza nde muntu sonikaka yo na ntangu bonso ya Abrahama (Ntangu ya mukanda ya Kuyantika). Mfumu ya nene Davidi sonikaka mingi ya Bankunga ti vukisaka bankunga ya bantu ya nkaka. Mwana na yandi, Mfumu ya nene Salomo sonikaka mukanda ya Bingana ti vukisaka bingana ya bantu ya nkaka mpi. Yandi sonikaka mpi Longi ti Kitoko.

Kutuba mikanda ya bapofete ya sonikaka mingi :

Bapofete sonikaka na ntangu ya bamfumu ti na nima na yo—na ntangu ya bamvula 70 ya kimpika ti na ntangu Bayuda ya nkaka vutukaka na Yeruzalemi. Bapofete ya sonikaka mingi kele iya, ti bo me sonika mikanda 5. (Profete Yeremia sonikaka mikanda 2—Yeremia ti Mawa.) Bana lenda tuba bo na ritima :

Yezaya Yeremia Mawa Ezekiele Daniele

Kuyimba mikanda ya baprofete ya sonikaka mingi :

Bana lenda yimba baprofete ya sonikaka mingi na nkunga yai :

Mikanda ya baprofete ya tubaka mingi

Mikanda ya baprofete ya tubaka mingi

Yezaya, Yeremia, ye Mikanda makumi tatu na uvwa, na uvwa,

Ya ke songa mpila Nzambi

Ta tinda Mvulusi.

Mvulusi ya bantu yonso,

Mvulusi na beto !

Mikanda ya ke tuba : Mesia ta kwisa !

mukanda ya mawa

Ezekiele ti Daniele, kwikama na Nzambi.

Kutuba mikanda ya baprofete ya sonikaka mikanda ya nkufi :

Bana tuba baprofete ya sonikaka fioti—baprofete 12 yonso na bandambu ya tatu. Bo tuba na ritima.

Osée Yoele Amosi

Abdiasí Yonasi Mishé

Nahumi Habukaki Sofonia

Agai Zakaria Malashi.

Baprofete yai tubaka ti sonikaka na ntangu ya bamfumu ti na ntangu ya kuvutuka na Yeruzalemi. Bo pesaka ndinga ya Nzambi na Bayuda ti na bantu ya bansi ya nkaka mpi.

Kuyimba baprofete ya sonikaka mikanda ya nkufi :

Bana yimba baprofete 12 ya sonikaka mingi ve na nkunga yai :

Mikanda ya baprofete ya tubaka kaka fioti

Mikanda ya baprofete ya tubaka fioti.

Osée, Yoele, Amosi, Abdiasí,

Yonasi, Mishé Nahumi, Habukaki, Sofonia,

Agai, Zakaria, ye Malashi.

Nsuka ya Kuwakana ya Ntama :

Kuwakana ya Ntama kele parti na luyantiku ya Bible. Yo kele parti ya bantu ya Nzambi sonikaka na ntwala kukwisa ya Yesu. Bo sonikaka mabanza

na bo mosi ve, kansi yina ya Mpeve ya Nzambi pesaka bo.

Mikanda yonso ya Kuwakana ya Ntama kele makumi tatu na uvwa (39). Yo ke songa mambu iya ya nene:

- 1) Luyantiku ya bima yonso
- 2) Kukota ya masumu kubebisa yonso
- 3) Histoire ya Israele, dikanda ya Nzambi solaka kupesa beto Bible ti Mesia
- 4) Nsilulu nde Mesia-Mvulusi ta kwisa.

Kuyimba malongi ya Kuwakana ya Ntama :

Bana lenda yimba malongi ya Kuwakana ya Ntama na mukanda yai :

Mikanda makumi tatu na uvwa, na uvwa,

Ya ke songa mpila Nzambi

Ta tinda Mvulusi.

Mvulusi ya bantu yonso,

Mvulusi na beto !

Mikanda ya ke tuba : Mesia ta kwisa !

Nki na nima ya Kuwakana ya Ntama ?

Na nima ya profete Malashi, Nzambi tindaka profete diaka ve. Yandi tubaka kima ya mpa ve sambu na bamvula 400. Bantu vandaka kaka kukinga kukwisa ya Mesia-Mvulusi.

Kukwisa ya Yesu kele luyantiku ya Kuwakana ya Mpa.

Bacarte ya Ntangu—

Mukanda ya Kuyantika**Kapụ 1-2****Kapụ 2****Kapụ 3****Kapụ 4****Kapụ****6-9****Kapụ****11****Luyantiku****Adami
Ti Eva****Nzemono****Makwela****Masa ya
Nene****Nzo ya Nda
Rebelio
Na Babele****Kiteso****ya****4,000****2,400****2,200****Bamvula na ntvala ya Yesu**

Mukanda ya Kuyantika

Kapu

12

Abrahami

Kapu

21>

Izaki

Kapu


27>

Yakobi

Kapu

37-50

Yozefi



2,000



Mukanda

ya

Yobi

2,000

1900

1750

1700

Bamvula na ntwala ya Yesu

Mikanda ya Kubasika ti Levi

Kapu

1-4

Kimpika ti Moize



Kapu

14-15

Nzadi ya Mbwaki



Kapu

18-24

**32-34
Bansiku**



Kapu

21-31, 35-40

Nzo ya Bisambu ya Ntenta



1,570

1,490

1,490

Levi

Kapu

1-27



Bamvula na ntwala ya Yesu

Mikanda ya Kutanga ti Kulonga

Kapu

1-4

Kutanga
Bafami



Kapu

13-14

Buya
Kukota !



Kapu

16

Kora
Twadisa
Rebelio



Kapu

20

Makasi ya
Moize



Kapu

22-24

Balami
lenda
singa
Israele ve




Kapu

32-34

Kukabisa
Ntoto



1,490



Kapu 1-30

1,450

Bamvula na ntwala ya Yesu

Kubambuka, to
Kulonga Diaka

Lufwa ya
Moize

Kapu 31-34



Mukanda ya Yozue

Kapu

1

**Yozue
yinga
Moize**



Kapu

2,6

**Rahabi ti
Yeriko**



Kapu 9

**Gabaoni
kusa bo**



Kapu

13-19

**Bo pesa
konso
tribu ntoto**



**Nsuka ya
moyo ya
Yozue**

Kapu

3-4

**Sabuka
Yordani**



Kapu

7-8

**Akani
na Ai**



Kapu

10

**Lumbu
ya nda**



Kapu

23-24

1,450



1,440



Bamvula na ntwala ya Yesu

Mikanda ya Bazuzi ti Rutí

Kapu

4-5

Debora
ti Baraki



Kapu

6-7

Gedeoni



1,440

Dula Nzambi
Yendi pesa bo zuzi
Yila Nzambi
Sambila bhekeki

Mpesa-
Mboni kumokula bo

Bazuzi

Kapu 8
Abimeleki
simba luyalu



Kapu

11-12

Buzoba
ya Yette



Kapu
13-16
Samsoni



Kapu

17-21

Masumu
ya Mika



Ruti 1-4

1,120

Ruti sola
nzila ya
Nzambi



Bamvula na ntwala ya Yesu

K25A

Mikanda ya 1 Samuele ti Bankunga. . . .

Kapụ 1-3

Ana ti Mwana ya Samuele



Kapụ 8-9

Saule ntotila ya ntete ya Israele



Kapụ 16

Samuele tulaka Davidi



Kapụ 17

Davidi nungaka Goliati



Kapụ 21-24

Davidi wilaka Saule mawa



Kapụ 31

Saule fwaka na mvita



Kapụ 5

Kiteki Dagoni Kubwaka



Kapụ 15

Nzambi buyaka Saule



Saule ti Davidi

Kapụ 19

Kinduku ya Davidi ti Yonatani



Kapụ 28

Saule sosaka ndoki. Ndola-Lufwa



Bamvula 1040-1010 na ntwala ya Yesu

K 25B

Mukanda ya 2 Samuele (ndambu ya 1 Bansangu).....
Mukanda ya Bankunga.....

Kapu 2
Davidi Ntotila
ya Yuda



Kapu 6
1 Bansangu 13,15
Davidi Vutula
Sanduku

Kapu 9

Davidi &
Mefiboseti



Kapu 15-18
Rebelio ya Absalomi

Mfumu Davidi

Kapu 5
Davidi Ntotila
ya Israele
yonso



Kapu 7
1 Bansangu 17,22
Davidi Zola
Tunga Tempelo



Kapu 11-12
Masumu ya Davidi
ti Batsheba

Kapu 23-23
1 Bansangu 21
Bandinga ya Nsuka
ti makabu ya Davidi



Mvula 1,000 na ntwala ya Yesu

Mikanda ya 1 & 2 Bantotila, 2 Bansangu, Yonasi, Ozea ti Amosi ...



Yeroboami



Ba profete Elia ti Elisa



Mfumu Akabi ti Yezebeli



Yonasi



Ozea



Amosi

Kimfumu ya Kinifumu ya Israelele (Nord)

Bamfumu yonso kaka mbi

Kukabala Kimfumu ya Yuda (Sud)

Bamfumu ndambu mbote, ndambu mbi



Mfumu Yozafati



Mfumu Yoashi



Mfumu Oziasi

Bamvula 930 ti na 722 na ntwa ya Yesu

Mikanda ya 2 Bantotila, 2 Bansangu

ti baprofete Yezaya, Yermia, Nahumi, Sofonia, Habakuki, Mishe, Mawa . . .


Israele me kwenda na kimpika. Kimfumu kele diaka va.



Bitumbu ya nsuka ya Kimfumu ya Yuda



Profete Ezekiele



Ezekiele 4

Nzambi songaka
Ezekiele nsudi ya
masumu ti zuzema
ya Nzambi.

Ezekiele 28

Nzambi songaka Ezekiele
kisina ya lulendo ya
bamfumu tu zuzema yo ta
benda.



Ezekiele 37

Nzambi songaka Ezekiele nde kele Nzambi
ya pesa moyo na bantu ya kufwa.



586

Av. J.C

Bamvula 70 na Babylon—


Daniele 1

Daniele ti banduku na yandi
buyaka madia ya mfumu.



Daniele 2

Daniele sosaka
ngangu ya Nzambi
kaka.



Daniele 3

Banduku ya Daniele buyaka
kusamba kiteki. Bo losaka
bo na ful ya tiya mingi.



Mfum u Nabo bwaka na
lulendo. Ndola na yandi
kuzinga bonso mbisi bamvula 7.



Profete Daniele

Profete Daniele



Daniele 5

Mfumu Baltazare salaka

lulendo, ti Nzambi manisaka kimfumu na yandi. Kimfumu ya Persia kumaka kuyala na Babilonia.

Daniele 10

Nzambi pesaka Daniele vision ya bimfumu ke kwisa.



Daniele 10-12

Nzambi songaka Daniele nde mambu yonso ya ta kwisa keke na maboko na Yandi.

539 Av. J-C

Daniele 6

Daniele landaka kusamba


Nzambi. Yo yina, bo losaka yandi na dibulu ya bantambu.



Profete Daniele

516

Av. J-C



Daniele 11

Wanzio Gabriele songaka Daniele nki ntangu Mesia ta kwisa.

Esdrasi 1,2

Na nima ya bamvula 70, Bayuda yantikaka kuvutuka na Yeru-zalemi, mutindu Nzambi silaka.



Nehemia 1, 2

Nehemia lombaka nzila kuvutuka na Yeru-zalemi kutunga lupangu na yo diaka.



Estere 1-4

Na kati ya Bayuda ya bikalaka na Persia, Estere sadisaka bantu na yandi.



Kuvutuka Kutunga Diaka

Esdrasi 6

Bo manisaka kisalu ya kutunga diaka Nzo-Nzambi.



Nehemia 6

Bambeni yangisaka bo, kansi bo landaka ti bo manisaka kisalu ya lupangu ya bwala.



Malashi profete ya nsuka



400 Av. J-C

NSUKA YA KUWAKANA YA NTAMA

Bankunga beto sadila na mukanda yai :

Moniteur, NB : Bankunga ya kele na kidimbu ◀ na ntwala ya titre, nge lenda kuwa yo na YouTube, kanal Ecodim Congo @ecodimcongo1985, to na website na beto, www.ecodimafrique.com.

2 Korinto 5 :17 *=bula maboko
Kana muntu kele na kimvuka ti Kristo
(3X)

Ikele na kimvuka ti Kristo,

Yandi mene kuma muntu mosi Yaa-mpa !
(3X)

Me kuma muntu mosi ya mpa !

Mambu na yandi ya ntama ** me mana !
(3X)
Mambu ya Ntama mene mana !

Mambu ya mpa me kwisa kuyinga na yandi !
(3X)
Me kwisa kuyinga na yandi !

Tala na Korinto ya zole, kapu ta-a-nu
(3X)
Nzila kumi na-a nsambwadi !

Beno Pesa Makabu

Beno baleki, beno pesa makabu
Na nzo ya Nzambi nkembo ikele ! (2X)
Beno, babakala, beno pesa makabu
Na nzo ya Nzambi nkembo ikele ! (2X)

Beno, bankento, beno pesa makabu
Na nzo ya Nzambi nkembo ikele ! (2X)

Beno, bambuta, beno pesa makabu
Na nzo ya Nzambi nkembo ikele ! (2X)
Beno, bantu yonso, beno pesa makabu
Na nzo ya Nzambi nkembo ikele ! (2X)
(Aleluya !)

Mvutu:

Nkembo! Alelu y-a-a!
Na nzo ya Nzambi nkembo ikele! (2x)

◀ Beto Bakristo Sadisana

Beto bakristo sadisana
Beto bakristo sadisana
Beto bakristo sadisana
Yo kele mbote.

Beto bakristo enkurazana (3X)
Yo kele mbote.

◀ Beto Me Wa

Beto me wa Ndinga-Nzambi,
Bika yo kota mbote.
Beto me wa Ndinga-Nzambi,
Bika yo kota mbote.
Bika beto bakisa,
Bika beto lemfuka.

Beto me wa Ndinga-Nzambi,
Bika yo kota mbote.

◀ Beto Vutula Mbi Ve, Ve, Ve
Beto vutula mbi—ve, ve, ve } (4x)
Beto pesa yo na Nzambi.

Kuzuze ke kisalu ya Nzambi (4x)
Kansi beto bantu ve.

Beto zola bambeni na beto } (4x)
Beto pesa bo na Nzambi. }

Beto Zolana

Na dikanda ya Nzambi,
mambu me luta nene—zola !
Zola me luta nene ! (2x)
(Beto zolana)

Bana ya Nzambi, beto zolana !
Zola me luta nene ! (Beto zolana)
Bana ya Nzambi, beto zolana !
Zola me luta nene !

◀ BI-BI-LA !

Bii-bi-la !
Mukanda ya Nzambi!

Mono kwikila yonso na
Bii-ii-bi-la !

Bii-bi-la !
Mukanda Kitoko
Mo' zola mingi kuwa yo
Bii-bi-la !

Bii-bi-la !
Beto ta tanga yo !
Lomba, ebuna lemfuka na
Bii-ii-bi-la !

Bu Yesu Kele na Mono

Bu Yesu kele na mono
Ngemba kele ! Ngemba kele !
Ngemba kele !
Bu Yesu kele na mono
Ngemba kele, na ntima na mono!

Ngemba ! Ngemba ! Ngemba ! Ngemba !
Bu Yesu kele na mono,
Ngemba kele
Na ntima na mono !

Kana Beno Ke Zolaka Mono

Kana beno ke zolaka Mono (3x)
Beno ta lemfuka.

Kana Satana Kwisa

Kana Satana kwisa, }
Mono buya ! 3x
Mono ta landa kaka Yesu !

Kana Yesu ke binga, }
Mono ndima ! 3x
Mono ta landa kaka Yandi !

Kieleka Nge Ke Nene

Kieleka Nge ke nene ! (2x)
Banzio fukumina
Zulu ti ntoto mpi
Kieleka, Nge ke nene !

Kusala Mbote na Kimvuka

Nge sadisa mono
Mono, mpi, sadisa nge
Kusala mbote na kimvuka
Ke sadisa beto yonso !

◀ Kuwa Bansongidila ya Mbote

Kuwa bansongidila
Ya mbote. 3X
Bansongidila ya kinzambi.

Kuwa bansongidila }
Ya mpamba-mpamba ve. } 3X
Ya bantu kele kusonga nge.

(Yimba verse ya ntete diaka ti suka na yo.)
Na Yesu !

Kuwa Bible

Kuwa Bible
Tanga Bible
'Buna Nge
Ta mona
Nzila mbote mingi
Nzila mbote mingi
Ye ngangu
Ye ngangu

Kwenda na Yesu

Kwenda na Yesu
Konso lumbu
Kwenda na Yandi
Kwenda na Yesu
Kwenda na Yesu kaka !

Landa, Mo' Ta Landa Nge, Mfumu

Landa, mo' ta landa Nge, Mfumu
Landa lumbu na lumbu
Mbasi na mono, nge zaba yonso
Nge ta twadisa mono.

◀ Mfumu Zaba Nzila na Mono

Mfumu zaba nzila na mono
Mono fweti landa kaka
Mfumu zaba nz'ila na mono
Mono fweti landa kaka

Ngolo bubu Yandi ta pesa
Ye yonso ya mfunu mbasi
Mfumu zaba nzila na mono
Mono fweti landa kaka !

◀ Mo' Ta Kwisa na Nzambi na Lulendo Ve

Mo' ta kwisa na Nzambi na lulendo ve

Mo' ta kwisa na lulendo ve
 Mo' ta kudikumumusa na ntwala n'Yandi
 Mo' ta kwisa na lulendo ve.

Mvutu :

Sambu Yandi kele Nzambi
 Mo' ke Nzambi ve.
 Kele Yandi me salaka mono !

Mo' Ta Nwana Sambu na Yesu

Ata mono kwenda na bitumba ve
 Bula baminduki ve
 Nwana na bitumba ve

Ata mono kwenda ve na avion,
 Mo' ta nwana sambu na Yesu (Yes, sir!)

Mo' ta nwana sambu na Yesu (Yes, sir!) (2x)
 Ata mono kwenda na bitumba ve
 Mo' ta nwana sambu na Yesu. (Yes, sir !)

◀ Mono kele na Nzo Kitoko (Makabu kele kana beto kanga ntima)

Mono kele na nzo kitoko
 Kuna n'zulu !
 Mono kele na nzo kitoko
 Kuna n'zulu !
 Mono kele na nzo kitoko
 Kuna n'zulu !
 Kuna na zulu ! (O Nzambi !)

Mvutu:

Mfumu, O Mfumu, mono ta tonda Nge
 (O Nzambi)
 Mfumu, O Mfumu, mono ta tonda Nge
 (O Nzambi)
 Mfumu, O Mfumu, mono ta tonda Nge
 Kuna na zulu !

Makabu kele kana beto
 Kanga ntima
 Makabu kele kana beto
 Kanga ntima
 Makabu kele kana beto
 Kanga ntima
 Kuna na zulu! (O Nzambi)

Mono me Sila Kulanda Yesu

Mono me sila kulanda Yesu (3X)

Kuvutuka, yo lunga ve.

Ata mono mosi (3X)
 Ee, mono ta landa
 Kuvutuka, yo lunga ve.

Ata mpasi ikele (3x)
 Mo' ta landa kaka
 Kuvutuka, yo lunga ve.

Nani Kele Ngolo? (Nani ke Kwikama ?)

Nani ke kwikama ?
 Nzambi ikele kwikama
 Kuluta bantu yonso.

Nge Mene Lunga

Nge mene lunga 2x
 Nge mene lunga, Mfumu
 Na kubaka nkembo, nkembo ti nzitusu
 Nkembo ti nzitusu ye ngolo !

Nkembo, Nkembo

Nkembo ! Nkembo ! Pesa Nzambi Nkembo !
 Nzambi ke zola! Nzambi ke zola !
 Nkembo ! Nkembo ! Pesa Nzambi Nkembo !
 Nzambi ke zola ! Nzambi ke zola !

Nsinga ya Bansinga Tatu (Beto Kwela Kaka Bakristo)

Nsinga ya bansinga tatu (3x)
 Ke ngolo mingi.
 Beto kwela kaka mukristo (3x)
 Makwela ya kiese.

◀ Nzambi Salaka Beto, Bakala ti Nkento

◀ O Bible Kele Kieleka

O, Bible kele kieleka, kieleka, kieleka,
 O, Bible kele kieleka
 Yo ke luvunu ve !

O, Bible kele kitoko, kitoko, kitoko,
 O, Bible kele kitoko
 Mo' zola yo mingi !

Sosa Ntete

Sosa ntete Kimfumu ya Zulu,
 Ye lunungu na Yandi

Bima yonso Yandi ta yika na nge !
Alelu, Aleluya !

Muntu kuzinga ve na madia kaka
Kansi na ndinga Nzambi !
Sosa ntete mambu ya kele mfunu
Alelu, Aleluya !

Tanga Bibila, Lumbu na Lumbu

Tanga Bi-bi-la !
Lumbu na lumbu !
Tanga tii na nsuka ye
Tanga yo diaka !
[Repeter Mbala Tatu]

Vutuka Afrika, Vutuka

Vutuka, Afrika! Vutuka !
Vutuka na Nzambi nge me vila
Beto bika bampeve yonso, biteki yonso,
Beto vutuka n'andi ya salaka beto !
Beto vutuka n'andi ya salaka beto !

Zitisa Zina ya Yesu

Zitisa zina ya Yesu ! Zitisa zina ya Yesu !
Ditadi na mono, Ngolo na mono,
Mvulusi na mono
Ye lukwikilu !
Zitisa zina ya Ye-e-e-su !

Zola

Zola ! Beto nata yo.
Zola ! Beto simba yo.
Zola ! Beto mwanga yo.
'Suka lufwa !

**Atasio, moniteur! Yai nsuka ya mikanda ya
Kuwakana ya Ntama. Mukanda ya ke
landa mukanda yai, K30, Luzingu ya Yesu 1.**